

বিশ্বভারত গ্রন্থমালা

শেক্সপিয়ারের গল্প

(Lamb's Tales from Shakespeare অনুসরণে)

শ্রীশিশিরকুমার নিয়োগী, ~~এম-এ~~ বি-এল

বরদা এজেন্সী

৩৪, কলেজ স্ট্রীট, কলিকাতা ।

স্মৃতি

রাজা লিয়র

ম্যাকবেথ

শীতের গল্প

রোমিও-জুলিয়েট

সব ভাল যার শেষ ভাল

ট্টেবু

...

তিমু

...

স্বরগে

তিলক

...

বৈশাখ, ১৩৪৩

লিয়র

অনেক দিন আগে ইংলণ্ডে লিয়র নামে এক রাজা ছিলেন। তাঁর তিনটি মেয়ে ছিল। বড় মেয়ে গনোরিলের আল্‌বেনির ডিউকের সঙ্গে বিয়ে হয়েছিল—মেজো মেয়ে রিগানের বিয়ে হয়েছিল কর্ণওয়ালের ডিউকের সঙ্গে। ছোট মেয়ে কডেলিয়ার তখনও বিয়ে হয়নি। ফ্রান্সের রাজা আর বার্গাণ্ডির ডিউক, দু'জনেই তাকে বিয়ে করবার জন্যে উৎসুক হয়েছিলেন এবং সেই জন্যে তাঁরা দু'জনেই এই সময়ে লিয়রের রাজধানীতে এসে বাস করছিলেন।

রাজা তখন খুব বুড়ো হয়েছিলেন—বয়েস হয়েছিল আশীরও উপর। রাজকার্য দেখাশুনো করেন এমন ক্ষমতা আর ছিল না। মনে ভাবলেন, উপযুক্ত লোকের হাতে সব ভার দিয়ে শেষ সময়টা পরকালের চিন্তায় কাটাবেন। তাই একদিন মেয়েদের ডেকে

লিয়র

জিজ্ঞেস করলেন, “তোমাদের মধ্যে কে আমাকে সকলের চেয়ে বেশী ভালবাসে? সেই অনুসারে আমার রাজ্য তোমাদের মধ্যে ভাগ করে দেবো।”

বড় মেয়ে গনোরিল বলল, “বাবা, তোমাকে আমি যে কত ভালবাসি তা কথায় প্রকাশ করা যায় না। তুমি আমার নিজের চোখের চাইতেও প্রিয়, তোমাকে আমার প্রাণের চাইতেও বেশী ভালবাসি।” গনোরিল মুখে এইরকম অনেক কথাই বলে বটে, কিন্তু রাজাকে যে সত্যি সে তেমন ভালবাসত তা নয়। রাজা তা মোটেই বুঝতে পারলেন না; তার কথা বিশ্বাস করে, মহা খুসী হ’য়ে তাঁর প্রকণ্ড রাজ্যের তিন ভাগের একভাগ গনোরিল ও তার স্বামীকে দিয়ে দিলেন। তারপর রাজা মেজো মেয়েকে জিজ্ঞেস করলেন, “রিগান, তুমি আমায় কেমন ভালবাস বলত?” মেজো মেয়েও বড় মেয়েরই মত। বলবার সময় সে তার বোনকেও ছাড়িয়ে উঠলো। সে বলে, “বাবা, দিদি তোমায় যে রূপ ভালবাসে বলল, আমার ভালবাসার তুলনায় তা কিছুই নয়। তোমাকে ভালবেসে আমি যত সুখ পাই, অন্য কিছুতেই আর তেমন সুখ পাই না।” মেয়েরা তাঁকে এত ভালবাসে শুনে লিয়র নিজেকে পরম ভাগ্যবান

শেঙ্গুপিয়রের গল্প

মনে করতে লাগলেন । গনেরিলের মত রিগান ও তার স্বামীকেও রাজ্যের এক-তৃতীয়াংশ দিয়ে দিলেন ।

এইবার ছোট মেয়ে কর্ডেলিয়ার দিকে ফিরে রাজা বল্লেন, “মা, তুমি কি বল ?” ছোট হ’লেও কর্ডেলিয়া রূপে গুণে বোন্দের মধ্যে শ্রেষ্ঠা, রাজাও তাকে সকলের চেয়ে বেশী ভালবাসতেন । রাজা ভেবেছিলেন, কর্ডেলিয়া না জানি আরও কত কি বলে’ তার ভালবাসা জানাবে । কিন্তু কর্ডেলিয়া তার বোন্দের ভালবাসার ভাণ করতে দেখে বড়ই বিরক্ত হয়েছিল । সে বল্লেন, “বাবা, মেয়ের যেমন উচিত আমি আপনাকে তেমনি ভালবাসি, তার চেয়ে কমও নয় বেশীও নয় ।”

এ কথায় রাজা মনে করলেন, কর্ডেলিয়া তাঁকে তাঁর অন্ত দু’ মেয়ের মত ভালবাসে না । এই ভেবে তিনি মনে খুব কষ্ট পেলেন । তিনি বল্লেন, “কর্ডেলিয়া, যা বলছ তা ভাল করে’ বুঝে বল ; তোমার ভবিষ্যৎ সৌভাগ্যের পথে কাঁটা দিও না ।” কর্ডেলিয়া খুব নম্রভাবে বল্লেন, “বাবা, আমি আপনার মেয়ে, আপনারই স্নেহে, ভালবাসায় আমি লালিত পালিত হয়েছি, আমিও আপনাকে যথেষ্ট ভক্তিশ্রদ্ধা করি এবং ভালবাসি । আপনার প্রতি আমার যা কর্তব্য তা পালন করতে

লিয়র

আমি সাধ্যমত চেষ্টা করে' থাকি। কিন্তু তাই বলে' দিদিদের মত আমি অত বাড়িয়ে বলতে জানি না। আপনাকে ছাড়া আর কাকেও ভালবাসি না বা বাস্ব না এ কথা কি করে' বলব? দিদিদের বিয়ে হয়েছে, স্বামীকে কি ঠারা মোটেই ভালবাসে না? যদি আমার কখনও বিয়ে হয়, তবে আমার স্বামী নিশ্চয়ই আমার সুখদুঃখের ভাগী হবেন, আমারও তাঁকে ভালবাসতে হবে, দিদিদের মত শুধু আপনাকেই ভালবাস্ব এ ভেবে ত আর বিয়ে করা চলবে না।”

বোন্রা পিতাকে যতটা ভালবাসার ভাগ কচ্ছিল, কর্ডেলিয়া সত্যি সত্যি তাঁকে সেইরূপ ভালবাসত। অন্য কোন সময় হ'লে সে হয়ত সে কথা খুলেই বলত, কিন্তু লাভের জগ্গে বোন্দের ভালবাসার ভাগ করতে দেখে সে এতই বিরক্ত ও দুঃখিত হয়েছিল যে, তার অন্তরের ভালবাসার কথা বাইরে প্রকাশ করে' বলতে তখন ঘৃণা বোধ হ'তে লাগল। সে স্থির করলে, মুখে প্রকাশ না করে' পিতাকে নীরবে ভালবাসাই হবে সব চেয়ে ভাল।

রাজা লিয়র চিরদিনই একটু উগ্রপ্রকৃতি ছিলেন এবং তোষামোদ খুব ভালবাসতেন। তার উপর বৃড়া হ'য়ে, তিনি বিচারবুদ্ধিও একরূপ হারিয়েছিলেন। তাই কার

শেখপিয়রের গল্প

কথা সত্যি—কার কথা মিথ্যে বুঝতে পারলেন না। কর্ডেলিয়ার আন্তরিক ভালবাসাও ভুল বুঝলেন এবং তার সরল কথাগুলিকেও দাস্তিকতা বলে' মনে করলেন। তিনি কর্ডেলিয়ার উপর এতই ক্রুদ্ধ ও বিরক্ত হয়েছিলেন যে, তখনই তার প্রাপ্য তৃতীয়াংশ ভাকে না দিয়ে অন্য দু' মেয়ের মধ্যে সমান ভাগ করে' দিলেন। তারপর দু' জামাইকে ডেকে এনে সমস্ত সভাসদের সামনে তাঁদের উপর রাজ্যের শাসন-সংরক্ষণের ভার অর্পণ করলেন। নিজে নামে মাত্র রাজা রইলেন। কথা রইল, তিনি শুধু একশত জন পারিষদ নিয়ে, পালা করে' একমাস মেয়েদের বাড়ীতে কাটাবেন।

রাজাকে এই রকম অন্যায়াভাবে রাজ্য ভাগ করতে দেখে পারিষদেরা ভারি বিস্মিত হ'লেন। সকলেই বুঝলেন, রাজা শুধু রাগের মাথায় এই কাজ করেছেন ; কিন্তু কারও প্রতিবাদ করতে সাহস হ'ল না। কেণ্টের আর্ল রাজার একজন বিশিষ্ট মন্ত্রী ছিলেন। তিনি লিয়রকে রাজার গ্যায় সম্মান করতেন, পিতার গ্যায় ভক্তি ও শ্রদ্ধা করতেন, বিশ্বস্ত অনুচরের গ্যায় তাঁর সকল আদেশই পালন করতেন। নিজের জীবন দিয়েও তিনি লিয়রের মঙ্গল করতে কুণ্ঠিত হ'তেন না। তা হ'লেও

লিয়র

তিনি লিয়রের এ অশ্রায় ব্যবহার নীরবে গ্রহণ করতে পারলেন না। কিন্তু লিয়র রাগলে তাঁকে বোঝায় সাধ্যকার ? কেণ্ট কর্ভেলিয়ার হ'য়ে বলতে আরম্ভ কর্তেই লিয়র তাঁকে ধম্কে বল্লেন, “যদি প্রাণের ভয় থাকে তবে কোন কথা ব'লো না।” কেণ্ট রাজার রাগে ভীত না হ'য়ে বল্লেন, “মহারাজ, চিরকাল আপনাকে সৎপরামর্শই দিয়ে এসেছি, এখনও দেবো; জীবনের ভয়ে সে কর্তব্য থেকে বিচলিত হব না। আপনি মিথ্যা তোষামোদে প্রতারিত হ'য়ে, সরলা কর্ভেলিয়ার প্রতি খুবই অশ্রায় কচ্ছেন; প্রকৃত পক্ষে কেবলমাত্র কর্ভেলিয়াই আপনাকে অন্তরের থেকে ভালবাসে। আমার একান্ত অনুরোধ, আপনি ধীরভাবে এ বিষয় ভেবে দেখুন।”

কেণ্টের কথা শুনে রাজার রাগ আরও বেড়ে গেল। তিনি সেই বিশ্বস্ত ও একান্ত অনুরক্ত আলকে নির্বাসনের আজ্ঞা দিয়ে বল্লেন, “আমার রাজ্য ছেড়ে চলে' যেতে পাঁচ দিন সময় দিচ্ছি, যদি তারপরও তোমায় আমার রাজ্যে দেখি তবে স্থির জেনো তোমার প্রাণদণ্ড হবে।” কেণ্ট উত্তর কর্লেন, “বেশ তাই হোক, আমি চলেই যাচ্ছি; আপনি যে রকম কাজ কচ্ছেন তাতে এখানে থাকাই শাস্তি।”— এই বলে' কর্ভেলিয়াকে আশীর্বাদ করে',

শেখাপিয়রের গল্প

সকলের কাছে বিদায় নিয়ে সেখান থেকে চলে' গেলেন।

কেণ্ট চলে' গেলে রাজা বার্গাণ্ডির ডিউক ও ফ্রান্সের রাজাকে ডেকে এনে বলেন, “আমি কর্ডেলিয়াকে ত্যাগ করেছি, কিছুই তাকে দেবো না, এ সঙ্গেও তোমরা তাকে বিয়ে করতে প্রস্তুত আছ কি ?” বার্গাণ্ডির ডিউক কপর্দকশূন্য কর্ডেলিয়াকে বিয়ে করতে রাজী হলেন না। কিন্তু ফ্রান্সের রাজা সব শুনে, কর্ডেলিয়ার গুণের পরিচয় পেয়ে মুগ্ধ হলেন, ও তাকে বিয়ে করে' নিয়ে যেতে চাইলেন। কর্ডেলিয়াও তাতে সম্মত হলেন। তখন ফ্রান্সের রাজা বলেন, “কর্ডেলিয়া, তুমি তোমার পিতার রাজ্যের কিছুই পেলে না বটে, কিন্তু আজ হ'তে তুমি ফ্রান্সের রাণী হ'লে। যাও, তোমার পিতা ও ভগ্নীদের কাছে বিদায় নিয়ে এস।”

বোনদের কাছে বিদায় নেবার সময় কর্ডেলিয়া কেঁদে বলে, “দিদি, আমি ত চল্লুম, তোমরা মুখে বাবাকে যা বলেছ কাজেও সেই রকম করবে আশা করি।” গনোরিল ও রিগান রুম্মভাবে উত্তর করলে, “সে কথা আর আমাদের তোমার কাছে শিখতে হবে না; নিজে কি করে' স্বামীর মন জোগাবে এখন তাই দেখবে, তিনি ত

লিয়র

তোমায় পেয়ে আপনাকে কতই ভাগাবান্ বলে' মনে
কচ্ছেন।" কর্ডেলিয়া এতে আরও দুঃখিত হ'য়ে কাঁদতে
কাঁদতে চলে' গেলেন।

কর্ডেলিয়া চলে' যাবার অল্প দিনের মধ্যেই লিয়র তাঁর
বড় ছ' মেয়ের কপটতা বুঝতে পারলেন। গনেরিলের
বাড়ী থাকবার প্রথম মাস না পেরুতেই তার ব্যবহারে
বেশ বুঝলেন, ওদের কথায় ও কাজে কত প্রভেদ! দুষ্টা
গনেরিল পিতার সর্বস্ব, এমন কি রাজমুকুট পর্য্যন্ত, নিয়েও
সন্তুষ্ট থাকতে পারলে না। তিনি যে কেবলমাত্র নামে
রাজা থাকবেন, এও তার সহ্য হ'ল না। লিয়র আর তাঁর
একশত পারিষদকে দেখলেই তার চোখ টাটাত। যতটা
পারত তাঁদের এড়িয়ে চলত, যদিই বা কখনও তাঁদের সঙ্গে
দেখা হ'ত তা হ'লে ক্রকুটি করে' মুখ ফিরিয়ে নিত, ভাল
মুখে কথাটি পর্য্যন্ত কইত না। বৃদ্ধ পিতাকে সে মনে
করতো জঞ্জাল, আর ঐ পারিষদগণের জন্মে যে ব্যয় হ'ত
সেগুলোকে মনে করতো নিতান্তই বাজে খরচ। শেষে
এমন হ'ল যে, ইচ্ছে করলেও লিয়র মেয়ের দেখা পেতেন
না। ডেকে পাঠালে বলত, মাথা ধরেছে, কিম্বা ঐ রকম
অশু একটা ওজর দিত। শুধু তাই নয়, দেখাদেখি
গনেরিলের দাসদাসীরাও রাজাকে সব বিষয়ে তুচ্ছ-

শেক্সপিয়রের গল্প

তাচ্ছিল্য ও অপমান করতে শুরু করলে। রাজা কোন কিছু করতে বললে তারা তা গ্রাহ্যই করতো না, কখনও বা শুনেও শোনেনি এইরূপ ভাণ করতো। এর পিছনে গনেরিলেরও যে একটু টিপুনি ছিল না তা নয়। আসল কথা, ওদের বিদেয় করে' দিতে পারলেই যেন গনেরিলের আপদ চূকে যায়। প্রথমটায় লিয়র এ সব দেখেও দেখতেন না, নিজের দোষেই এ হয়েছে বুঝে উড়িয়ে দিতে চেষ্টা করতেন।

এ দিকে লিয়র নির্বাসনের আদেশ দিলেও কেণ্ট কিন্তু তাঁকে এই অবস্থায় ফেলে চলে' যেতে পারলেন না; তিনি বেশই জানতেন যে, মেয়েদের হাতে লিয়রের দুর্দশার সীমা থাকবে না। তাই নিজের সুখ, ঐশ্বর্য—সব পরিত্যাগ করে', সামান্য একজন পরিচারকের বেশ ধরে' রাজার সেবায় নিযুক্ত হলেন। কেণ্ট তখন আসল নাম লুকিয়ে নিজেকে কেয়াস বলে' পরিচয় দিলেন—রাজাও তাঁকে এই ছদ্মবেশে চিন্তে না পেরে, তাঁর কাজকর্মের খুসী হ'য়ে আদর করে' কাছে রাখলেন। কেয়াস খুবই স্পষ্টবাদী। তোষামোদের নেশা কেটে যাওয়ায়, এখন কিন্তু তাঁর কথাই রাজার কাছে ভাল লাগতে লাগলো।

বরাতক্রমে কেয়াস শীগগিরই একদিন প্রভুর প্রতি

লিয়র

স্নেহ, ভক্তি ও আনুগত্যের পরিচয় দিবার সুযোগ পেলেন। গনেরিলের প্রধান ভাণ্ডারী সে দিন মুখের উপর রাজাকে অপমান করায় কেয়াস তা সহ করতে না পেরে, চক্ষের নিমিষে তার দু' পা ধরে' আছাড় মেরে কাছেই এক নর্দমায় ফেলে দিলেন। এইরূপে তিনি রাজার আরও প্রিয়পাত্র হ'য়ে উঠলেন।

এই দুঃসময়ে রাজার আর একটি বন্ধু ছিল তাঁর ভাঁড়। তখনকার দিনে প্রায় সব রাজারই এক এক জন করে' ভাঁড় থাকত ; অবসরকালে তারা নানারকম হাসিঠাট্টা করে' রাজাদের চিত্তবিনোদন করতো। লিয়র তাঁর সমস্ত রাজৈশ্বর্য মেয়েদের বিলিয়ে দিলেও তাঁর এই ভাঁড়টি স্নেহবশতঃ তাঁকে পরিত্যাগ করে নি। কোন কারণে লিয়রকে বিমর্ষ দেখলে হাসিঠাট্টা দ্বারা সে সাধ্যমত তাঁকে প্রফুল্ল করতে চেষ্টা করতো। আবার বোকামী করে' যথাসর্বস্ব মেয়েদের দিয়ে দেওয়ার জগ্গে তামাসা করে' রাজাকে মাঝে মাঝে দু'টো কথাও শুনিতে দিত। এমন কি সময়ে সময়ে গনেরিলের মুখের উপর বেশ ঠেস দিয়ে নানারূপ ঠাট্টাবিক্রম করতেও ছাড়ত না। সে কথা-বার্তায় স্পষ্টই বুঝিয়ে দিত যে, রাজা মেয়েদের হাতে সমস্ত সঁপে দিয়ে কি অন্যায়ই না করেছেন। গনেরিল

শেখপিয়রের গল্প

এতে হাড়ে হাড়ে চটে' যেত। যা মুখে আসে তাই বলে, তাই গনোরিল তাকে উপযুক্ত সাজা দেবে বলে' দু'-একদিন শাসিয়েও ছিল।

দু'টা মেয়েদের হাতে রাজার অপমানের তখনও শেষ হয় নি। গনোরিলের বিষদৃষ্টি চিরদিনই ছিল লিয়রের ঐ একশত পারিষদের উপর। তাই একদিন আর থাকতে না পেরে রাজাকে গিয়ে বলে, “বাবা, আমি তোমার এই অনুচরদের নিয়ে একেবারে জ্বালাতন হ'য়ে উঠেছি। এদের দিয়ে কোন লাভও হয় না, অথচ এদের পিছনে একরাশ টাকা খরচ হচ্ছে। কাজের মধ্যে কেবল মজা করে' খাচ্ছে দাচ্ছে আর চোঁচামিচি করে' রাজবাড়ী মাথায় করে' তুলছে। একটু শাস্তিতে যে থাকবে এ হতভাগাদের জন্মে সে উপায়ও নেই। তাই বলছি, কেবলমাত্র তোমারই মত বুড়া বুড়া জন-কয়েককে রেখে বাকীগুলোকে বিদেয় করে' দাও।”

কথাগুলি শুনে লিয়র হতভম্ব হ'য়ে গেলেন। তাঁরই স্নেহের কন্যা গনোরিল যে আজ তাঁকে এই সব শক্ত কথা শুনালে এ তিনি প্রথমে বিশ্বাসই করতে পাচ্ছিলেন না। কিন্তু গনোরিল যখন ঐ সকল কথা নিয়ে জিদ করতে লাগল, তখন তাঁর আর সন্দেহের কোন কারণ রইল না।

লিয়র

তিনি রাগে কাঁপতে কাঁপতে বলেন, “গনৈরিল, তুই আমাকে ভাল রকমই প্রতারণা করেছিস্। এখন আবার তুই আমার সম্ভ্রান্ত, প্রভুভক্ত পারিষদদের নামে মিথ্যা অপবাদ দিচ্ছিস্। তোর কথা যে সবই মিথ্যে তা বুঝতে কি আমার বাকী আছে ?”—প্রকৃতপক্ষেও লিয়রের সেই একশত অনুচরের সবাই খুব ভদ্র, সুশিক্ষিত, শান্ত ও সচ্চরিত্র ছিলেন, তাঁদের দিয়ে ওরকম কাজ মোটেই সম্ভব-পর ছিল না।

রাজা তখনই তাঁর সহস্রকে ঘোড়া আনতে পাঠালেন; গনৈরিলকে বলেন, “আমি আমার লোকজন নিয়ে এই মুহূর্তেই তোর বাড়ী ছেড়ে চলে’ যাচ্ছি। তোর মত অকৃতজ্ঞ সম্ভ্রান্তের প্রাণ পাথর দিয়ে গড়া। তুই বাঘ-ভালুকের চেয়েও ভয়ানক, রাক্ষসীর চাইতেও ভয়ঙ্কর।”—তারপর তিনি গনৈরিলকে এমন অভিসম্পাত করলেন যা শুনলেও গায়ে কাঁটা দিয়ে উঠে। বলেন, “পাপিষ্ঠা, তুই যেন সারা জীবনে সম্ভ্রান্তের মুখ দেখিস্ না। আর যদিইবা কখনও তোর সম্ভ্রান্ত হয়, তবে তুই আমাকে যত কষ্ট দিলি, অপমান করলি, সে বেঁচে থেকে যেন কড়ায়-গণ্ডায় তার শোধ দেয়, সে যেন হাড়ে হাড়ে তাকে বুঝিয়ে দেয় সম্ভ্রান্ত বাপমাকে জ্বালা দিলে সে জ্বালায় কত

শেখপিয়রের গল্প

বিষ।” গনেরিলের স্বামী আলবেনির ডিউক তখন রাজার কাছে বলতে গেলেন যে, তিনি তাঁর মেয়ের কাছে যে দুর্ব্যবহার পেয়েছেন তাতে তাঁর কোন হাত ছিল না। কিন্তু রাজা এমনি চটে’ গিয়েছিলেন যে, তাঁর সে সব কথা কানেও তুললেন না। রাগ করে’ লোকজন নিয়ে, ঘোড়ায় চড়ে’ তাঁর মেজো মেয়ে রিগানের বাড়ীতে চললেন। পথে যেতে যেতে তাঁর কত কথাই না মনে উঠতে লাগলো ; ভাবলেন, কর্ডেলিয়ার ত কোন দোষই নেই—যদিইবা কিছু থেকে থাকে, তার বোনদের তুলনায় সে অতি সামান্য। অথচ তার উপর কত অবিচারই না হয়েছে! তখন তাঁর চোখ ফেটে জল পড়তে লাগলো। আবার তাঁর লজ্জাও হতে লাগলো, যে, সেদিনকার মেয়ে গনেরিল সে তাঁকে আজ নাকে দড়ি দিয়ে ঘোরাচ্ছে।

রিগান আর তার স্বামী তাদের নিজ প্রাসাদে বহু লোকলস্কর, ধনদৌলত নিয়ে খুব জাকজমকের সাথে বাস করতেন। লিয়র তাঁর ভৃত্য কেয়াসকে পত্র দিয়ে রিগানের কাছে পাঠিয়ে দিলেন। তাতে লিখে দিলেন, “তুমি আমাদের উপযুক্ত অভ্যর্থনার আয়োজন কর, আমি আমার অনুচরদের নিয়ে তোমার ওখানে যাচ্ছি।” কিন্তু গনেরিলকে রাজা এঁটে উঠতে পারবেন কেন? সে ভয়ানক

লিয়র

চালাক । আগে থাকতেই সে রিগানের কাছে এক চিঠি পাঠিয়েছিল, তাতে লিখেছিল—রাজা আজকাল ভারি বদমেজাজী হয়েছেন, তাতে আবার সঙ্গে এক দল লোক ; রিগান যেন কোন মতেই এদের তার বাড়ীতে স্থান না দেয় । এখন এই চিঠি যে নিয়ে গিয়েছিল সে আর কেয়াস দু'জনে একই সময়ে সেখানে গিয়ে উপস্থিত । দেখামাত্র কেয়াস চিন্লেন, এ সেই বেটা—লিয়রকে অসম্মান করার জন্তে যাকে ক'দিন আগে তিনি ঠ্যাং ধরে' তুলে আছা করে' এক আছাড় মেরেছিলেন । কিন্তু এ বেটা এখানে কেন ? রকম-সকম দেখেও কেয়াসের ভাল লাগলো না । তখন মনে সন্দেহ হ'ল, বোধহয় পাজী বেটা গনৈরিল রাজার বিরুদ্ধে কোন চিঠিপত্র পাঠিয়েছে—আর ঐ বেটা এসেছে সেই চিঠি দিতে । আর যাবে কোথা ? কেয়াস তার ঘাড় ধরে' খুব কসে' পিটুনী লাগিয়ে দিলেন । যেমন কাজে এসেছিল তেমনি তার শিক্ষা হ'ল । কিন্তু রিগান আর তার স্বামীর কানে এই কথা উঠতেই তারা কেয়াসকে ধরে' নিয়ে গিরে গারদে রাখলে । তিনি রাজা লিয়রের দূত, সকলেরই সম্মানের পাত্র, সেজন্তেও তাঁকে কোন খাতির করলে না । কাজেই রাজাকে রিগানের দুর্গে প্রবেশ করে' প্রথমেই

শেক্সপিয়রের গল্প

দেখতে হ'ল, তাঁর প্রিয় ভৃত্য কি দুর্দশা ভোগ
কচ্ছেন।

রাজা ভেবেছিলেন, তাঁকে কতই না অভ্যর্থনা করা
হবে, কিন্তু লক্ষণ যা দেখলেন তা বড় শুভ বলে' বোধ
হ'ল না। মেয়েকে আর জামাইকে না দেখে মন
তাঁর উদ্বিগ্ন হ'য়ে উঠলো। জিজ্ঞাসা করে' জানতে
পারলেন, সারা রাত্রির পথশ্রমে তারা বড়ই ক্লান্ত হ'য়ে
পড়েছে—এখন দেখা হবে না। কিন্তু যখন দেখলে,
রাজা ভয়ানক রেগে গিয়ে বারবার দেখা করবার জগ্বে
জিদ কচ্ছেন, তখন আর কি করবে—অগত্যা দেখা করতে
এল। কিন্তু কি আশ্চর্য—রাজা দেখেন, তাদের সঙ্গে সেই
পাপিষ্ঠা গনোরিল ! গনোরিল যে আগে থাকতেই সেখানে
এসে বসেছিল তার কারণ, নানা রকম বুঝিয়ে পড়িয়ে
বোনকে রাজার উপরে চটিয়ে দেওয়া, আর তাকে বেশ
করে' বুঝিয়ে দেওয়া যে, তার আর তার স্বামীর কোন
অপরাধই নেই, যত দোষ সব সেই বুড়ো রাজার।

গনোরিলকে ওদের সঙ্গে দেখেই রাজার ভয়ানক
রাগ হ'ল। আবার যখন দেখলেন, রিগান আর সে
হাত ধরাধরি করে' আসছে, তখন তিনি একেবারে অধীর
হ'য়ে পড়লেন। বল্লেন, “গনোরিল, আজ তো'র বুড়ো

লিয়র

বাপের দিকে চাইতে লজ্জা বোধ হচ্ছে না ?” রিগান বলে, “বাবা, আমার কথা শোন ; তোমার লোকজন অর্ধেক বিদেয় করে’ দিয়ে, একটু শাস্তিশিষ্ট হ’য়ে দিদির বাড়ীতেই গিয়ে থাক । যা করে’ ফেলেছ তার জন্তে দিদির কাছে মাপ চাও, তা হ’লেই সে ক্ষমা করবে । আজকাল তুমি বুড়ো হয়েছ, সব ত ভাল করে’ বুঝতে পার না ; এখন আমরা তোমাকে যে ভাবে চালাই সেই ভাবে চল ।” রাজা বলেন, “রিগান, একি কথা ? আমি কি শেষে নিজের মেয়ের সামনে জানু পেতে বসে’, জোড়হাতে ক্ষমা চেয়ে পেটের ভাতের জোগাড় করবো ? তা কখনও হবে না । তুমি ঠিক জেনো, আমি কখনই ওর সঙ্গে ফিরে যাব না । আমার একশ’ অর্ঘ্য নিয়ে আমি তোমার এখানেই থাকবো । কারণ আমি জানি, তুমি এখনও ভুলে যাওনি যে, আমিই তোমাকে আমার অর্ধেক রাজত্ব দিয়েছি, আর তুমি ঐ পাপিষ্ঠার মত কঠিন নও—তোমার প্রাণে এখনও দয়ামায়া আছে । অর্ধেক লোক বিদেয় করে’ দিয়ে গনেরিলের বাড়ীতে ফিরে যাওয়ার চেয়ে বরং আমি আমার ছোট জাহাজ ফ্রান্সের রাজার দোরে গিয়ে ভিক্ষে মেগে খাব ।”

এখানেও রাজার ভুল হ’ল—ভাবলেন, রিগান মুষ্টি

শেক্সপিয়রের গল্প

তার সঙ্গে ভাল ব্যবহার করবে। কিন্তু সে যা উত্তর দিলে, তা তার দিদির কথার চেয়েও কঠোর। সে বলে, “পঞ্চাশ কেন, পঁচিশ জন লোক সঙ্গে রাখাও আমি তোমার পক্ষে বেশী বলে’ মনে করি।”—কথা শুনে দুঃখে, ক্ষোভে রাজার বুকখানা যেন ভেঙ্গে গেল। ভাবলেন, তবে গনোরিলের বাড়ীতে যাওয়াই ভাল। বলেন, “গনোরিল, তবে তোমার ওখানেই যাই, চল। তুমি তবু পঞ্চাশ জন রাখবে বলছ, রিগান বলছে পঁচিশ, তোমার অর্ধেক। কাজেই তুমি ওর চাইতে আমাকে দ্বিগুণ ভালবাস। চল, তোমার বাড়ীতেই যাই।” গনোরিল তখন স্ত্রীবিধা পেয়ে বলে, “পঁচিশ জনেরই বা তোমার কি দরকার? আমি ত দশ জনের—এমন কি পাঁচ জনেরও কোন দরকার দেখিনে। তোমার যা-কিছু কাজকর্ম সে ত আমাদের চাকরবাকর দিয়েই চলতে পারে।” বাপের প্রতি নির্ভুর আচরণ করতে ছ’ বোনে যেন প্রতিদ্বন্দ্বিতা চলছিল! যিনি একদিন এত বড় রাজ্যের অধীশ্বর ছিলেন, আজ তাঁকে এতটুকু রাজসম্মান দিতেও এদের প্রাণে সইছে না! একে একে সবই ত নিয়েছে; থাকবার মধ্যে আছে শুধু দেহরক্ষী ক’জন অনুচর! এরা তাদেরও তাড়বার মতলব করলে—

লিয়র

বাসনা, লিয়র যে কোন দিন রাজা ছিলেন তার কিছুমাত্র চিহ্নও না থাকে ; বলতে পার, অনুচর না হ'লে কি কেউ সুখী হ'তে পারে না ? তা পারে.; তবে রাজসিংহাসন ছেড়ে হঠাৎ একেবারে পথে দাঁড়ান, লক্ষ লক্ষ লোকের উপর হুকুম চালিয়ে হঠাৎ একেবারে অনুচরশূন্য হওয়া—এ কি যেমন তেমন কথা ? রক্তমাংসের মানুষ হ'য়ে এ কি কেউ সহ্য করতে পারে ? রাজা লিয়র আজ পথের ফকির, এ তাঁর কম দুঃখ নয় ; কিন্তু তাঁর সব চেয়ে বেশী দুঃখ এই যে, তাঁর নিজের মেয়েরাই আজ তাঁকে পথে বসাচ্ছে ! তখন রাজার বুকের ভিতরটা পুড়ে যেন খাঁক হ'য়ে যেতে লাগলো । নিজের উপরেও রাগ হ'তে লাগলো, কেন তিনি বোকার মত নিজের রাজ্য এমন করে' মেয়েদের বিলিয়ে দিয়েছেন ! রাগে, দুঃখে, ক্ষোভে রাজা পাগলের মত হ'য়ে গেলেন ; এমনি প্রতিশোধ নিবেন বলে' প্রতিজ্ঞা করলেন যে, তা শুনে পৃথিবীসুদ্ধ লোক ভয়ে শিউরে উঠবে । কিন্তু বলে কি হয়—সে প্রতিজ্ঞা কাজে পরিণত করবার শক্তি তাঁর আদপেই ছিল না ।

রাজা বকাবকি কচ্ছেন, এদিকে ক্রমে রাত্রি হ'য়ে এল । সঙ্গে সঙ্গে বিষম ঝড়, বৃষ্টি আর বিদ্যুৎ । যেন প্রলয়-কাল উপস্থিত ! রাজা যখন দেখলেন, মেয়েদের

শেক্সপিয়রের গল্প

গোঁ এততেও থামলো না, এখনও তেমনি ভাবে বলছে, তাঁর অনুচরদের বাড়ীতে ঢুকতে দেবে না—তখন আর তিনি সেখানে দাঁড়ালেন না ; লোকজন ডেকে, ঘোড়া নিয়ে রিগানের বাড়ী থেকে বেরিয়ে পড়লেন । ভাবলেন, এমন অকৃতজ্ঞ, নিষ্ঠুর মেয়েদের আশ্রয়ে নিরাপদে থাকার চেয়ে নিরাশ্রয়ে, বাড়জলের মধ্যে, বজ্রাঘাতে মরাও ভাল । মেয়েরা বলে, “একগুঁয়ে লোকেরা নিজেদের উপযুক্ত শাস্তি নিজেরাই ডেকে আনে ।”—এই বলে’ বাপকে ত আর ডাকলেই না, বরং তাঁর মুখের উপরেই দরজা বন্ধ করে’ দিলে ।

বাইরে তখন ভয়ানক ঝড় ; বৃষ্টিও ক্রমেই বেড়ে যাচ্ছিল । কিন্তু মেয়েদের দুর্ভাবহারের তুলনায় বৃদ্ধ লিয়রের কাছে সে দুর্যোগ সামান্য বোধ হ’তে লাগলো । সামনে মস্ত খোলা মাঠ, ক্রোশের পর ক্রোশ চলে’ গেছে, কোথাও একটু দাঁড়াবার স্থান পর্য্যন্ত নেই, এমন একটা গাছ পর্য্যন্ত নেই যার নীচে দাঁড়িয়ে একটু বিশ্রাম করতে পারেন । ঘোর অন্ধকারে লিয়র ক্রমাগত চলেছেন ; ঝড়, বৃষ্টি, মেঘগর্জন—কিছুতেই ক্রক্ষেপ নেই ! এক এক বার তাঁর প্রাণের ভিতর থেকে যেন বেজে উঠছে—“ওঠ ঝড় ওঠ, দে পৃথিবীকে উড়িয়ে নিয়ে সমুদ্রের

লিয়র

ভিতর ডুবিয়ে; না হয়ত যা সমুদ্রের সমস্ত জল টেনে এনে দে পৃথিবীকে ভাসিয়ে, যেন নেমকহারাম মানুষের আর চিহ্নমাত্রও না থাকে।” রাজার সাথে তখন আর বিশেষ কেউ ছিল না, শুধু সেই মূর্থ বিদূষক তখনও রাজাকে ছেড়ে যায় নি—তখনও নানা কৌশলে, নানা রকম মজার কথা বলে’ সে রাজাকে ভুলিয়ে রাখতে চেষ্টা করছিল।

রাজা এই ভাবে যাচ্ছেন, এমন সময়ে কেয়াসের সঙ্গে তাঁর দেখা হ’ল। কেয়াস আগাগোড়াই রাজার পিছনে পিছনে আসছিলেন; তিনি রাজাকে এই অবস্থায় দেখে বলেন, “মহারাজ, যে দুর্যোগ, এতে পশু-পক্ষীরাও আশ্রয় নিয়েছে, আর আপনি এর ভিতরে কোথায় যাচ্ছেন? এসব কি আপনার সহ্য হ’তে পারে?” রাজা রেগে উঠে বলেন, “কেউ যদি বড় একটা আঘাত পায়, তা হ’লে অণু কোন ছোট আঘাতের কথা তাঁর মনে আসে কি, কেয়াস? প্রাণের ভিতর যার ভীষণ ঝড় ব’য়ে যাচ্ছে, তার শরীরের ভাবনা থাকে কি? কেয়াস, তুমি জান কি, যে সন্তানদের এত করে’ লালনপালন করেছি তাদের দুর্ব্যবহার, অকৃতজ্ঞতা কত মর্মান্তিক?”

কেয়াস কিন্তু কিছুতেই তাঁকে ছাড়লেন না; বুঝিয়ে

শেখপিয়রের গল্প

সুঝিয়ে তাঁকে কাছেই পথের ধারে একটা ভাঙ্গা বাড়ীতে নিয়ে গেলেন। রাজার ভাঁড় কিন্তু সেখানে ঢুকেই “ভূত! ভূত !!” বলে’ চীৎকার করতে করতে বেরিয়ে এল। পরে দেখা গেল, ভূতটুত কিছু নয়, একটা ভিখারী ঝড়জলে ঐ ঘরে আশ্রয় নিয়েছে। সম্বলের মধ্যে তার পরনে ছেঁড়া এক টুকরো কম্বল—আর তার কিছুই নেই। রাজা তার এই শোচনীয় অবস্থা দেখে বলতে লাগলেন, “এরও আমারই মত অবস্থা। নিশ্চয়ই এও এর যথাসর্বস্ব সম্বলানদের দিয়ে আজ আমার মত দুর্দশাগ্রস্ত হয়েছে। সম্বলানের দুর্ব্যবহার ছাড়া মানুষের কি কখনও এমন দুর্বস্থা হয়?”

রাজার এই রকম আরও দুটো-একটা খাপছাড়া কথাতে কেয়াস বুঝলেন, মেয়েদের ব্যবহারে মনে দারুণ আঘাত লাগায় রাজা সত্যি সত্যি পাগল হয়েছেন। রাজসভায় থেকে কেটে রাজার যেরূপ সেবা করতে পারেন নি, আজ কেয়াস সেজে রাজার এই বিপদে তার চেয়ে ঢের বেশী উপকার করবার সুযোগ পেলেন। ডোভারে কেটের অনেক বন্ধুবান্ধব ছিলেন—সেখানে তাঁর যথেষ্ট প্রতিপত্তিও ছিল। রাজার তখনও যা দু’-একজন বিশ্বস্ত অনুচর ছিল পরদিন প্রাতে তাদের সাথে দিয়ে রাজাকে

লিয়র

ডোভারের দুর্গে পাঠিয়ে দিলেন, আর নিজে কর্ভেলিয়ার সঙ্গে দেখা করবার জন্তে ফ্রান্সে যাত্রা করলেন। কেণ্ট কর্ভেলিয়ার সঙ্গে দেখা করে' তাঁর দিদিরা রাজার উপর কি রকম অমানুষিক অত্যাচার করেছে এবং তিনি এখন কি দুর্দশা ভোগ কচ্ছেন, এ সব খুলে জানালেন। শুনে কর্ভেলিয়ার চোখ ফেটে জল বেরুতে লাগলো। তার পর কর্ভেলিয়া স্বামীকে সব কথা বল্লেন ; আর তাঁর অনুমতি নিয়ে একদল সৈন্য সঙ্গে করে' ডোভার যাত্রা করলেন— উদ্দেশ্য, তাঁর সেই পাপিষ্ঠা বোনদের দূর করে' দিয়ে রাজা লিয়রকে আবার তাঁর সিংহাসনে বসাবেন।

রাজা পাগল হয়েছেন দেখে কেণ্ট তাঁকে সব সময়ে চোখে চোখে রাখবার জন্তে কয়েকজন লোক নিযুক্ত করে' দিয়েছিলেন। যে দিন কর্ভেলিয়া ডোভারে এসে পৌঁছলেন, ঠিক সেই দিনই রাজা তাদের হাত থেকে পালিয়ে ঘুরতে ঘুরতে ডোভারে গিয়ে উপস্থিত হন। কর্ভেলিয়ার কয়েকজন সৈনিক ঐ সময় বেড়াতে বেড়াতে দেখতে পেলে, পাগল লিয়র খড়-কুটো ও লতাপাতার তৈরী একটা মুকুট মাথায় দিয়ে নেচে নেচে গান গেয়ে বেড়াচ্ছেন। এ কথা শুনে কর্ভেলিয়া বাপকে দেখবার জন্তে একেবারে অস্থির হয়ে' উঠলেন ; কিন্তু এ অবস্থায় দেখা

শেঙ্গপিয়রের গল্প

করা ভাল হবে না, ওষুধপত্র খেয়ে রাজা একটু সুস্থ হ'লেই দেখা করতে পারবেন, সঙ্গে ডাক্তারেরা এইরূপ বলে' তাঁকে থামালেন। রাজা সেরে উঠলে কর্ডেলিয়া ডাক্তারদের খুব পুরস্কৃত করবেন বলে' তাদের বিদায় দিলেন। রাজাও কিছুদিন এইসব বড় বড় চিকিৎসকের ওষুধপত্র খেয়ে অনেকটা সেরে উঠলেন।

তার পর লিয়রের সঙ্গে কর্ডেলিয়ার দেখা হ'ল। সে করুণ দৃশ্যে পাষণ্ড হৃদয়ও গলে' যায়। বহুকাল পর তাঁর বড় আদরের কর্ডেলিয়াকে দেখে বৃদ্ধ লিয়রের প্রাণ আনন্দে ভরে' উঠলো—আবার সঙ্গে সঙ্গে এমন পিতৃবৎসল মেয়ের প্রতি অণ্যায় ব্যবহার করেছিলেন মনে করে' মরমে মরে' যেতে লাগলেন। এই রকম নানা সুখদুঃখের মধ্যে বারবার পড়ে' লিয়রের দুর্বল মস্তিষ্ক আবার বিকৃত হ'য়ে পড়লো। কোথায় রয়েছেন, কার সঙ্গে কথা কইছেন, কে তাঁকে এমন করে' আদর কচ্ছে, সব ভুল হ'য়ে গেল। বলেন, “হাঁ মা, তুই কি আমার সেই হারানো ধন কর্ডেলিয়া?” আবার তখনই যেন লজ্জিত হ'য়ে আর সবাইকে লক্ষ্য করে' বলছেন, “দেখুন, এঁকে যে আমি আমার কন্যা কর্ডেলিয়া বলে' মনে করেছিলুম, সেজ্ঞে আপনারা আমাকে উপহাস

লিয়র

করবেন না। বুড়ো মানুষ আমি, আমার ভুল হয়েছিল।”
আবার একটু পরেই রাজা কর্ভেলিয়ার সামনে জানু পেতে
ব’সে জোড়হাতে নিজকৃত অপরাধের জন্তে মাপ চাইতে
লাগলেন। কর্ভেলিয়া বাপের এই অবস্থা দেখে, কাঁদতে
কাঁদতে তাঁর পায়ে পড়ে’ বলতে লাগলেন - “বাবা, অমন
করে’ আমার অপরাধী কোরো না। আমি তোমারই
আদরের মেয়ে কর্ভেলিয়া, আমারই উচিত তোমার পায়ে
পড়ে’ প্রণাম করা। তুমি ওঠ, আমার আশীর্বাদ কর।”
—এই বলে’ কর্ভেলিয়া আদর করে’ ছেলোবেলার মত
বাপের গালে চুমু খেলেন। এত লিয়রের সকল জ্বালা,
সকল ব্যথা মুহূর্তের মধ্যে যেন দূর হ’য়ে গেল। একটু
স্থির হ’লে কর্ভেলিয়া বলেন, “বাবা, আমি সবই
শুনেছি। দিদির যে কাজ করেছে, মানুষে তা কখনও
করতে পারে না। অতি বড় শত্রুকেও লোকে এত কষ্ট
দেয় না। বাড়ীর কুকুর-ধেড়ালকেও অমন দুর্যোগে
কেউ বাড়ী থেকে বের করে’ দেয় না। যখনই এই সব
কথা আমার কানে গেছে, তখনই আমি সৈন্যসামন্ত নিয়ে
তোমায় সাহায্য করবার জন্তে ছুটে এসেছি।”
কর্ভেলিয়ার কথা শুনে লিয়রের প্রাণটা যেন জুড়ুলো।
বড় মেয়েদের দুর্ব্যবহারে রাজা পাগল হ’য়ে গিয়েছিলেন—

শেক্সপিয়রের গল্প

এখন কর্ডেলিয়ার যত্ন-আদরে আর ভাল ভাল চিকিৎসকের ঔষধে অল্পদিনের মধ্যেই পূর্বের মত সুস্থ হ'লেন।

এদিকে বড় মেয়েরা রাজার সঙ্গে ব্যবহারে ত অকৃতজ্ঞতার চূড়ান্ত দৃষ্টান্ত দিয়েছিলই, এখন আবার যার যার স্বামীর সঙ্গে বিশ্বাসঘাতকতা করতে আরম্ভ করলে। স্বামীর উপর তাদের ভক্তিশ্রদ্ধা কি ভালবাসার লেশমাত্রও ছিল না। পাপ বেশী দিন লুকানো থাকে না ; শেষে এ কথাও প্রকাশ হ'য়ে পড়ল যে, তাদের দু'জনেরই দ্ভাব খারাপ হয়েছে। অদৃষ্টের ফেরে আবার দু' বোনের একই লোককে বিয়ে করবার ইচ্ছে হয়েছিল। নাম তার এড্‌মণ্ড—লোকটি গ্লোস্টারের আর্লের জারজ সন্তান। আর্লের বড় ছেলেও জমিদারীর প্রকৃত উত্তরাধিকারী এড্‌গারকে ঠকিয়ে ধৃত্ত এড্‌মণ্ড এখন সম্পত্তি অধিকার করে' নিজেই আর্ল হয়েছিল।

এই সময়ে রিগানের স্বামী কর্ণওয়ালের ডিউক মারা গেলেন। আপদ্ চুকে গেল দেখে রিগান এড্‌মণ্ডকে বিয়ে করবার ইচ্ছা প্রকাশ করলে। এ খবর শুনে গনেরিল হিংসায় একেবারে জ্বলে উঠলো এবং গোপনে বোনকে তীব্র বিষ খাইয়ে মেরে ফেললে। কিন্তু এই ভয়ঙ্কর হত্যাকাণ্ডের কথা চাপা রইল না। শীগ্গিরই

লিয়র

এ কথা গনোরিলের স্বামীর কানে উঠলো। তিনি সমস্ত ব্যাপার জানতে পেরে গনোরিলকে কারাগারে আটক করলেন। বিফল মনোরথ হ'য়ে গনোরিল সকল দুঃখ-কষ্টের হাত এড়াবার জগ্বে নিজেই বিষ খেয়ে আত্মহত্যা করলে। দুষ্টাদের সমুচিত শাস্তিই হ'ল।

এই দু' বোনের মৃত্যুতে চারদিকে ধর্মের জয়জয়কার পড়ে' গেল। কিন্তু শীগ্গিরই আবার লোকে সুশীলা কর্ডেলিয়ার শোচনীয় পরিণামের কথা জানতে পেরে মনে করতে লাগলো যে, এ সংসারে সকল সময় ধর্মের, স্মায়ের, পবিত্রতার জয় হয় না। আহা, কর্ডেলিয়া অমন ভাল মেয়ে, তার কপালে যে এমন হবে তা কে জান্ত ! রিগান ও গনোরিল অনেক সৈন্ত দিয়ে সেই দুর্বৃত্ত গ্লোস্টারের আর্ল এড্‌মণ্ডকে কর্ডেলিয়ার বিরুদ্ধে পাঠিয়েছিল। যুদ্ধে এড্‌মণ্ডেরই জয় হ'ল। সে কর্ডেলিয়াকে বন্দী করেও নিশ্চিন্ত হ'তে পারলে না, তাঁকে মেরে ফেলে—ভয়, পাছে সে বেঁচে থাকলে তাদের সিংহাসন অধিকার করার পক্ষে কোন ব্যাঘাত জন্মে। কর্ডেলিয়ার মৃত্যুসংবাদে রাজার মন একেবারে ভেঙ্গে পড়ল, অল্পদিনের মধ্যে তিনিও মারা গেলেন।

প্রভুভক্ত কেট শেষ পর্যন্ত রাজার সঙ্গে সঙ্গেই

শেক্সপিয়রের গল্প

ছিলেন ; আপদে বিপদে ছায়ার মত তিনি তাঁর সাথে সাথে ফিরতেন । রাজার মৃত্যুর পূর্বে, তিনিই যে কেয়াস সেজে তাঁর সঙ্গে সঙ্গে ফিরেছেন—এই কথা কেণ্ট তাঁকে বুঝাবার চেষ্টা করেছিলেন, কিন্তু রাজা কর্ভেলিয়ার শোকে আবার পাগল হওয়ায় সে কথা বুঝে উঠতে পারেন নি । তাঁর মাথায় এ কথা কিছুতেই ঢুকলো না যে, কি করে' মন্ত্রী কেণ্ট আর কেয়াস একজন লোক হ'তে পারে । কেণ্টও দেখলেন, রাজা বন্ধপাগল—তাই ও-কথা বুঝাবার জগে বেশী চেষ্টা করলেন না । রাজার মৃত্যুর অল্পদিন পরেই তাঁর শোকে প্রভুভক্ত কেণ্টও প্রাণত্যাগ করলেন ।

ছুরাচার এডমণ্ডকে ভগবান শীগগিরই উপযুক্ত শাস্তি দিলেন । তার সব বিশ্বাসঘাতকতার কথা প্রকাশ হ'য়ে পড়লো । তাঁর পিতার প্রকৃত উত্তরাধিকারী এড্গার তাকে যুদ্ধে নিহত করে' নিজ জমিদারী অধিকার করলেন । গনোরিলের স্বামী আলবেনির ডিউক যে স্ত্রীর দুষ্কার্যে কখনও প্রশ্রয় দেন নি এবং কর্ভেলিয়ার হত্যাবিষয়েও যে তিনি সম্পূর্ণ নিরপরাধ তাও সবাই জানতে পারলে । তখন সকলে আদর করে' তাঁকে লিয়রের সিংহাসনে বসিয়ে তাঁর অধীনে পরম সুখে বাস করতে লাগলো ।

ম্যাকবেথ

স্কটল্যান্ডের রাজা ডানক্যানের রাজত্বকালে ম্যাকবেথ নামে একজন সম্ভ্রান্তবংশীয় উচ্চপদস্থ বীরপুরুষ বাস করতেন। ম্যাকবেথ ছিলেন রাজার নিকট আত্মীয় ; তার উপর তিনি আবার খুব সমরকুশল বলে রাজদরবারে সকলেই তাঁকে বিশেষ সম্মানের চোখে দেখতেন ও সমীহ করতেন। সম্প্রতি দেশের একদল সৈন্য বিদ্রোহী হয়েছিল, নরওয়ের রাজাও তাদের সাহায্য করবার জন্যে অনেক সৈন্য পাঠিয়েছিলেন ; এই মিলিত বিদ্রোহী সৈন্যদলকে দমন করে' নিজ বীরত্ব ও সমরকুশলতার পরিচয় দিয়ে ম্যাকবেথ রাজার আরও বেশী প্রিয়পাত্র হ'য়ে উঠলেন— তাঁর খ্যাতি প্রতিপত্তিও বেড়ে গেল।

ব্যাঙ্কে। নামে রাজার আর একজন সেনাপতি ঐ বিদ্রোহ দমনে ম্যাকবেথের সহযোগী ছিলেন। বিদ্রোহ দমনের পর বিজয়ী সেনাপতিদ্বয় যখন এক মরুভূমিসদৃশ বন্য প্রান্তরের উপর দিয়ে রাজধানীতে ফিরছিলেন, তখন তিনটি কিশু তকিমাকার জীব হঠাৎ এসে তাঁদের পথ রোধ

শেখপিয়রের গল্প

করে' দাঁড়ালে। অদ্ভুত তাদের চেহারা ; দেখতে
স্ত্রীলোকের মত, কিন্তু আবার দাড়িও ছিল। তাদের
জীর্ণ-শীর্ণ চেহারা, লোল চর্ম ও বিক্রী সাজসজ্জা দেখলে
কে বলবে যে, তারা এ পৃথিবীর জীব ? ম্যাকবেথ
প্রথমে কথা বলেন, কিন্তু এতে তারা একটু বিরক্তির ভাব
প্রকাশ করে' তাদের শীর্ণ আঙ্গুল চর্মসার মুখে লাগিয়ে
ম্যাকবেথ ও ব্যানকোকে চুপ করে' থাকতে ইঙ্গিত
করলে। তার পর তাদের প্রথমটি ম্যাকবেথকে
গ্লেমিসের অধীশ্বর বলে' অভিবাদন করলে। এই
অদ্ভুত জীব তিনটি তাঁর পরিচয় জানে দেখে ম্যাকবেথ
খুবই আশ্চর্য্যান্বিত হলেন। কিন্তু দ্বিতীয়টি এর পরই
যখন তাঁকে কডোরের অধীশ্বর বলে' সম্ভাষণ জানালে
তখন ম্যাকবেথ আরও বেশী বিস্মিত হলেন, কারণ
কডোরের অধিপতি হবেন একথা তিনি যে কখনও
কল্পনাও করতে পারেন নি। এর পর তৃতীয়টি যখন
তাঁকে “জয়, স্কটল্যান্ডের ভাবী রাজা ম্যাকবেথের জয় !”
বলে' সম্ভাষণ করলে, তখন আর তাঁর বিস্ময়ের পরিসীমা
রইল না। এ যে স্বপ্নেরও অগোচর ব্যাপার ! রাজা
ডানক্যান তখনও জীবিত, তাঁর পুত্রেরাও বর্তমান, এরা
থাকতে তিনি স্কটল্যান্ডের রাজা হবেন, সেও কি সম্ভব ?

ম্যাকবেথ

পরে ব্যাক্সোর দিকে ফিরে তারা বলে, “ম্যাকবেথ থেকে তুমি ছোট, কিন্তু বড়ও বটে ; তার মত সুখী হ’তে পারবে না, কিন্তু আবার বেশী সুখীও হবে।” আরও বলে, যদিও তিনি নিজে কখনও রাজা হ’তে পারবেন না, তা হ’লেও তাঁর বংশধরেরা স্কটল্যান্ডের রাজা হবে। এ সব ব্যাক্সোর কাছে হেঁয়ালি বলেই বোধ হ’ল ; তিনি এর মানে কিছুই বুঝে উঠতে পারলেন না। এর পরেই তারা বাতাসে মিলিয়ে গেল দেখে, সেনাপতিদ্বয়ের আর বুঝতে বাকী রইল না যে, এরা ডাইনি।

উভয়ে এই অদ্ভুত ঘটনার কথা ভাবছেন, এমন সময় রাজার কাছ থেকে জন কয়েক দূত এসে ম্যাকবেথকে জানালে যে, রাজা তাঁর বীরত্বে সন্তুষ্ট হ’য়ে তাঁকে কডোরের অধিপতি নিযুক্ত করেছেন। ডাইনিদের ভবিষ্যদ্বাণী এমন আশ্চর্য্যভাবে ফলতে দেখে ম্যাকবেথ যার পর নাই বিস্মিত হলেন ; কিছুকাল স্তম্ভিত হ’য়ে দাঁড়িয়ে রইলেন, দূতদের কথার উত্তর দেবার মত শক্তিটুকু পর্য্যন্ত তাঁর থাকল না। নানা রকম উচ্চাশায় তাঁর মনকে বড়ই বিব্রত করে’ তুলল ; তবে কি তৃতীয় ডাইনির কথাও ফলবে ? সত্যি কি তিনি একদিন স্কটল্যান্ডের রাজা হবেন ? এইরূপে তাঁর মনে অল্পে অল্পে দুৰাকাঙ্ক্ষার

শেক্সপিয়রের গল্প

সঞ্চার হ'ল। ব্যাক্কোকে সম্বোধন করে' তিনি বলেন, আমার বিষয়ে ওদের ভবিষ্যদ্বাণী ত হাতে হাতেই ফল্গল, আপনি কি আশা করেন না যে, সত্যি সত্যি আপনার বংশধরেরাও রাজা হবে?" ব্যাক্কো উত্তর করলেন, "ওরূপ আশা না করাই ভাল; হয়ত সে আশা আমাদের রাজসিংহাসন অধিকার করবার জন্তে উত্তেজিত করে' তুলবে। এই সব নরকের প্রেতেরা ছোটখাট দু'-একটা বিষয়ে সত্যি কথা বলে' আমাদের এমনতর সব কাজ করতে প্রলুব্ধ করে, যার ফলাফল অতি ভীষণ।" কিন্তু ডাইনিদের কথাগুলি ম্যাকবেথের মনের পরতে পরতে বসে' গিয়েছিল—সেই থেকে কি করে' স্কটল্যান্ডের রাজা হবেন কেবল সেই চিন্তাতেই তিনি বিভোর হ'য়ে পড়েছিলেন। এ অবস্থায় ব্যাক্কোর কথার সারগ্রহণ করবার মত অবসরইবা তাঁর কোথায়? কাজেই ব্যাক্কোর সদুপদেশে কোনই ফল হ'ল না।

ম্যাকবেথ তাঁর স্ত্রী লেডি ম্যাকবেথকে সেই ডাইনিদের ভবিষ্যদ্বাণী ও তা আংশিকভাবে পূর্ণ হ'বার কথা না জানিয়ে থাকতে পারলেন না। লেডি ম্যাকবেথ ছিলেন অতি নীচ প্রকৃতির; তাঁর দুরাকাঙ্ক্ষারও সীমা ছিল না। তাঁর স্বামী ও তিনি নিজে যাতে উচ্চপদ লাভ করতে

ম্যাকবেথ

পারেন, তাই ছিল তাঁর একমাত্র চেষ্টা ; এজ্ঞে কোনরূপ কাজ করতেই তিনি বিধা বোধ করতেন না—হোক না সে কাজ অতি জঘন্য ! স্কটল্যান্ডের রাজা হ'বার বাসনা ম্যাকবেথের খুবই প্রবল—কিন্তু রাজা ও তাঁর পুত্রদের হত্যা না করে' তা যে সম্ভবপর নয় ! এই হত্যার কথা মনে আসতেই তিনি ক্রোধের জন্মে শিউরে উঠলেন, কিন্তু আবার ভবিষ্যতের মোহন ছবি মনে আসতেই তাঁকে আনন্দে আত্মহারা করে' তুলল । লেডি ম্যাকবেথ স্বামীর সুপ্ত বাসনাকে জাগিয়ে তুলতে ও তাঁকে উৎসাহ দিতে সাধ্যমত চেষ্টা করতে লাগলেন ; ডাইনিদের ভবিষ্যদ্বাণী সফল হ'তে হ'লে রাজা ও রাজপুত্রদের মেরে ফেলা যে একান্ত আবশ্যিক, তা ম্যাকবেথকে ক্রমাগতই শোনাতে লাগলেন । এ দিকে ধীরে ধীরে ম্যাকবেথের মনেও একটা উদ্যম ভাব জেগে উঠছিল ।

রাজা ডানক্যান রাজোচিত সৌজন্য ও উদারতার বশবর্তী হ'য়ে তাঁর রাজ্যের অভিজাতসম্প্রদায়ের সাথে প্রায়ই দেখাশুনো করতে যেতেন । অনেক যুদ্ধে জয়লাভ করেছেন—তার উপর এবার বিদ্রোহ দমন করে' দেশে ফিরেছেন, তাই ম্যাকবেথকে বিশেষ ভাবে সম্মানিত ও আপ্যায়িত করবার জন্মে নিজের দুই ছেলে, ম্যাকম ও

শেখপিয়রের গল্প

ডোনালবেন এবং অনেক সম্ভ্রান্ত পারিসদ ও অনূচর সঙ্গে নিয়ে রাজা এই সময়ে একদিন ম্যাকবেথের প্রাসাদে এসে উপস্থিত হ'লেন ।

ম্যাকবেথের দুর্গটি অতি সুন্দর স্থানে অবস্থিত । সুমধুর নির্মল বাতাস ঝির ঝির ক'রে ব'য়ে যাচ্ছে । স্থানটি রাজার কাছে খুবই মনোরম ব'লে বোধ হ'ল—তার উপর লেডি ম্যাকবেথের সাদর অভ্যর্থনা ও যত্নে বিশেষ পরিতৃষ্ণা হ'লেন । সরলতার অভিনয়ের আড়ালে কি ক'রে অস্তুরে বিশ্বাসঘাতকতার ভাব লুকিয়ে রাখতে হয় তা' লেডি ম্যাকবেথ বেশ ভাল রকমই জানতেন ।

পরিশ্রমে ক্লান্ত হ'য়ে পড়েছিলেন ব'লে রাত্রে খাওয়া-দাওয়ার পর রাজা একটু সকাল সকালই শুয়ে ঘুমিয়ে পড়লেন । অভ্যর্থনায় রাজা খুবই সম্মুগ্ধ হয়েছিলেন, শুভে যাবার আগে তিনি তাঁর প্রধান প্রধান কর্মচারীদের নানারূপ উপহার দিয়ে পরম আপ্যায়িত করলেন, এবং লেডি ম্যাকবেথকে একখানি বহুমূল্য হীরক উপহার দিলেন । রাজার শোবার ঘরে দু'জন ক'রে রক্ষী থাকবার প্রথা ছিল ; কিন্তু লেডি ম্যাকবেথ তাদের এমন ক'রে মদ খাইয়ে দিয়েছিলেন যে, তারাও অল্প সময়ের মধ্যে ঘুমে অচেতন হ'য়ে পড়ল ।

মধ্য রাত্রি, অতি ভীষণ সময় । অন্ধকটা জগৎ যেন

ম্যাকবেথ

মৃত অবস্থায় প'ড়ে রয়েছে । কেউ বা নানা রকমের বিশ্রী স্বপ্ন দেখে নরক-যন্ত্রণা ভোগ কচ্ছে, কেউ বা শাস্তিগে ঘুমুচ্ছে । ত্রিশ্র জাদজন্তু শিকারের খোঁজে চারদিকে ঘুরে বেড়াচ্ছে । হত্যাকারীর কু-মতলব হাসিল করবার এ-ই উপযুক্ত সময় ।—লেডি ম্যাকবেথ ধীরে ধীরে বিছানা ছেড়ে উঠলেন, রাজাকে খুন করবার এমন সুযোগ হয়ত আর মিলবে না । স্ত্রীজাতির স্বভাববিরুদ্ধ এমন কাজ তিনি অন্য কোন সময়ে করতে যেতেন না ; কিন্তু তাঁর স্বামীকে তিনি মোটেই বিশ্বাস করতে পাচ্ছিলেন না । কি জানি, যদি কাজের বেলা তাঁর প্রকৃতিসুলভ কোমলতার জন্মে তিনি রাজাকে এমন গুপ্তভাবে নিশ্চয় বিশ্বাসঘাতকের মত হত্যা ক'রে উঠতে না পারেন ! তিনি বেশই জানতেন যে, তাঁর স্বামীর উচ্চাকাঙ্ক্ষার সীমা নেই, আর কডোরের অধাশ্বর হ'য়ে রাজসম্মান লাভের জন্মে তাঁর লালসা বেড়েই গিয়েছে । কিন্তু শত হ'লেও অকুণ্ঠিতভাবে যে-কোন দুষ্কর্ম করবার মত অবস্থায় তিনি তখনও এসে পৌঁছোন নি ! স্বামীকে উত্তেজিত করতে কসুর করেন নি ; তিনিও রাজাকে হত্যা করবেন ব'লে রাজী হয়েছিলেন বটে ; কিন্তু লেডি ম্যাকবেথ তাঁর উপর নির্ভর ক'রে থাকতে পাচ্ছিলেন না । তাঁর স্বামী তাঁর চেয়ে স্বভাবতই কিছু বেশী কোমল-হৃদয় ; হয়ত

শেক্সপিয়রের গল্প

তাই এ-কাজ তাঁকে দিয়ে ত'য়ে উঠবে না। এই ভেবে তিনি নিজেই ছোরা ভাতে ক'রে রাজা যে ঘরে ঘুমুচ্ছিলেন আশু আশু সেই ঘরে গিয়ে উপস্থিত হ'লেন। পথের পরিশ্রমে ক্লান্ত ডানক্যান গভীর নিদ্রায় অভিভূত হ'য়ে আছেন; কিন্তু একি! নির্দ্রিত রাজাকে ঠিক লেডি ম্যাকবেথের পিতার মত দেখাচ্ছে না? তিনি বতই দেখতে লাগলেন ততই তাঁর ঐ-কথা আরও বেশী ক'রে মনে হ'তে লাগলো। হত্যা করা দূরের কথা, রাজার দিকে আর একটু এগুবার সাহস পয্যন্ত তাঁর হ'ল না। তিনি স্বামীর সঙ্গে পরামর্শ করবার জন্যে ধীরে ধীরে ফিরে এলেন।

এদিকে ম্যাকবেথের মনে ভীষণ ঝড় ব'য়ে যাচ্ছিল, প্রতি মুহূর্তেই তাঁর সমস্ত শিঁগল হ'য়ে আসছিল। তিনি বতই ভাবছিলেন ততই বুঝতে পাচ্ছিলেন যে, ঐ-কাজ কিছুতেই ঠিক হবে না। একে তিনি ডানক্যানের প্রজা, তার আবার নিকট আত্মীয়, এদ উপর রাজা তাঁকে সম্মানিত ও আপ্যায়িত করবার জন্যেই তাঁর গৃহে আর্হাণ হয়েছেন; এরূপ অবস্থায় তাঁরই কল্যাণ হ'লে, রাজাকে সব রকম বিপদ-আপদ থেকে রক্ষা করা. আর তিনি নিজেই কিনা তাঁকে হত্যা করবেন! ম্যাকবেথের বুক কেঁপে উঠল, গা শিউরে উঠল। তারপর মনে হ'ল, রাজা কেমন ন্যায়-

ম্যাকবেথ

পরায়ণ, দয়ালু ও প্রজাবৎসল—তিনি ভুলেও কখনো তাঁর প্রজাদের প্রতি অন্যায় ব্যবহার করেন নি। রাজ্যের সম্ভ্রান্ত ও গণ্যমান্য লোকদের, বিশেষতঃ তাঁকে, তিনি কত না স্নেহ করেন ! তাঁর চরিত্রগুণে তিনি প্রজাদেরও কত না প্রিয় ! এমন মহামতি, সদাশয়, ন্যায়পর রাজা নিশ্চয়ই দেবগণের বিশেষ আশ্রিত ; এঁর হত্যা প্রজারাও নীরবে সহ্য করবে না ; নিশ্চয়ই নিদারুণ প্রতিশোধ নেবে। আরও ভাবলেন, “রাজা আমাকে অশেষ সম্মানে সম্মানিত করেছেন, তাই প্রজাগণও আমার সুযশ গেয়ে বেড়ায়। ঐরূপ পৈশাচিক কাজ ক’রে সবার কাছে নিজেকে হেয় করা কি খুবই অনুচিত হবে না ? আর এর ভীষণ পরিণামই বা এড়াব কি ক’রে ?”

ম্যাকবেথের মনে যখন এইরূপ একটা সংশয়ের ভাব জেগে উঠেছে, যখন ‘সু’-এর দিকেই মতিটা একটু ফিরবার উপক্রম হয়েছে, ঠিক সেই সময়ে লেডি ম্যাকবেথ এসে উপস্থিত হ’লেন। পাপিনীর পাপ বাসনার কিন্তু মোটেই নিবৃত্তি হয় নি ! স্বামীকে ইতস্ততঃ করতে দেখে তিনি যেন একেবারে তেলে বেগুনে জ্বলে উঠলেন। নানারকম কারণ দেখিয়ে, ভবিষ্যতের উজ্জ্বল মোহন ছবি তাঁর সামনে ধ’রে, তাঁকে প্রলুব্ধ ও উত্তেজিত করতে সাধ্যমত

শেক্সপিয়রের গল্প

চেষ্টা করতে লাগলেন। কাজটি খুবই সহজ, সব শেষ করতে সময়ও অতি অল্পই লাগবে; কোন রকমে শেষ করে ফেলতে পারলেই জীবনের শ্রেষ্ঠ পুরস্কার রাজসিংহাসন লাভ হবে। এমন সুযোগ কি সকলের জীবনে আসে? আসলেও একবারের বেশী দু'বার আসে না। এও কি হেলায় হারাতে হবে? এমনি আরও কত কি বলে তিনি যেন তাঁর নিজের কলুষিত মনোভাব দিয়ে ক্রমে ক্রমে স্বামীর মনকেও আচ্ছন্ন করে ফেলতে লাগলেন। ধীরে ধীরে ম্যাকবেথের মনে আবার সেই নিশ্চয় লালসাকে জাগিয়ে তুললেন। শেষটাতে লেডি ম্যাকবেথ এতটা উত্তেজিত হয়ে পড়লেন যে, স্বামীকে মিথ্যাবাদী, ভীক, কাপুরুষ ইত্যাদি বলে তাঁর প্রতি অবজ্ঞা প্রকাশ করতেও ছাড়লেন না। আরও বললেন, “তুমিই প্রথমে আমাকে এ-কথা বলেছিলে—তুমিই আমাকে প্রলুব্ধ করেছিলে, কিন্তু তুমি এমনই বীর পুরুষ যে, এখন ভয়ে সে সঙ্কল্প পর্যাঙ্ক ত্যাগ করতে যাচ্ছ! এত অল্পতেই সঙ্কল্প ত্যাগ করা তোমার মত চঞ্চলপ্রকৃতি ভীক লোকেরই সাজে বটে! তোমার মত যদি আমি প্রতিজ্ঞা করতাম, তা' হলে যে শিশুকে আমি নিজে বুকে করে স্নেহে দুধ দিয়েছি, যাকে আমি কত না ভালবাসি, আমার মুখের দিকে চেয়ে

ম্যাকবেথ

যে হাসির লহর তুলে থাকে, যার হাসিতে আমি বিমল স্বর্গীয় আনন্দের আভাস পাই, সেই হাস্যোজ্জ্বল শিশুকে নিজের বুক থেকে ছিনিয়ে নিয়ে আচ্ছড়িয়ে তার মাথা চূর্ণ-বিচূর্ণ ক'রে দিতে পারতেন। আমি মেয়ে-মানুষ হ'য়ে এ পারি, আর কিনা পুরুষ হ'য়েও তোমার এত সামান্য কাজটি করবার মত সাহস নেই ! ধিক্ তোমার বীরত্বে ! রাজার শরীররক্ষীদের মদ খাইয়ে এমন অচেতন ক'রে রেখেছি যে, তারা এ-কাজের বিন্দুমাত্রও জানতে পারবে না ; আবার তাদের উপরেই অনায়াসে সব দোষ চাপিয়ে দেওয়া যাবে। রাজার মৃত্যুতে শোক-প্রকাশের ঘটটা এমনি ক'রেই করা যাবে যে, কেউ আমাদের সন্দেহ ক'রে কথাটি পর্যন্ত বলতে সাহস পাবে না।”

লেডি ম্যাকবেথের পাপ উত্তেজনায় আবার সত্যি সত্যি ম্যাকবেথকে দৃঢ়প্রতিজ্ঞ ও কৃতসঙ্কল্প ক'রে তুললো। ছোরা হাতে নিয়ে তিনি অন্ধকারে চোরের মত নিঃশব্দে পা টিপে টিপে রাজার ঘরের দিকে চললেন। সহসা যেন দেখতে পেলেন যে, রক্তমাখান আর একখানা ছোরা শূন্যে তাঁর সামনে ঝুলছে—মনে হ'ল যেন হাত বাড়ালেই ধ'রতে পারেন ; হাত বাড়ালেন, কিন্তু কোথাও ত কিছু নেই। বুঝতে পারলেন, তাঁর মাথা গরম হ'য়ে উঠেছে, তাই

শেক্সপিয়রের গল্প

বিভীষিকা দেখ্ছেন ; ক্রমে ক্রমে আবার তিনি প্রকৃতিস্থ হ'লেন—ভয় চ'লে গেল, সাহসে বুক বেঁধে রাজার শোবার ঘরে ঢুকে ছোরার এক আঘাতেই নিদ্রিত ডানক্যানকে হত্যা করলেন । যেই রাজাকে হত্যা করা শেষ হয়েছে, অমনি রাজার রক্ষীদের একজন ঘুমের মধ্যেই হেসে উঠলো, আর একজন চোঁচিয়ে ব'লে উঠলো, “খুন !” এতে ক'রে তারা দু'জনেই জেগে পড়লো । হাত জোড় ক'রে দু'জনে একটু প্রার্থনা করলো ; প্রার্থনার শেষে একজন বলে, “ঈশ্বর আমাদের কল্যাণ করুন !” অন্য জন বলে, “তথাস্তু !” এর পরেই তারা আবার ঘুমিয়ে পড়লো । ম্যাকবেথ দাঁড়িয়ে সবই দেখলেন ও শুনলেন । প্রথম রক্ষীর কল্যাণ কামনার উত্তরে তিনি “তথাস্তু” বলতে চেষ্টা করলেন, কিন্তু তাঁর কণ্ঠরোধ হ'য়ে এল ; তিনি ঐ-কথাটি কিছুতেই উচ্চারণ করতে পারলেন না—অথচ তাঁরই তখন সব চেয়ে বেশী ভগবানের কৃপার প্রয়োজন ছিল ।

আবার যেন তিনি শুনতে পেলেন কে বলছে, “আর ঘুমিও না, হত্যাকারী ম্যাকবেথ নিদ্রা নাশ করলে—যাতে ক'রে শ্রান্তি দূর হয়, জীবন পুষ্ট হয় সেই স্ননিদ্রা নাশ করলে !” আবার যেন কে বাড়ীর নিদ্রিত লোকদের সম্বোধন ক'রে বলে, “আর ঘুমিও না ! গ্রামিসের অধিপতি স্নথনিদ্রা

ম্যাকবেথ

নাশ করলে—কডোরাধিপতি আর ঘুমবে না, ম্যাকবেথ আর কখনো ঘুমতে পারবে না।”—ম্যাকবেথ শিউরে উঠলেন।

লেডি ম্যাকবেথ উৎকণ্ঠিত হ'য়ে ম্যাকবেথের জন্যে অপেক্ষা করছিলেন ; তাঁর আশঙ্কা হ'চ্ছিল যে, ম্যাকবেথ বোধ হয় রাজাকে হত্যা করতে পারেন নি, হয়ত বা কোন রকমে সব চেষ্টাই বিফল হয়েছে। ম্যাকবেথকে উদ্ভ্রান্তভাবে আস্তে দেখে তিনি তাঁকে অস্থিরমতি ব'লে ব্যঙ্গ করতেও ছাড়লেন না ; তারপর হাতে রক্ত দেখে তাঁকে হাত ধুয়ে ফেলতে পাঠিয়ে দিলেন। এদিকে তিনি নিজে ম্যাকবেথের রক্তমাখান ছোরা নিয়ে রাজার রক্ষীদের হাতে পায়ে রক্ত মাখিয়ে দিতে ও ছোরাখানা তাদের কাছে রেখে আস্তে চললেন ; ভাবলেন, এতে সবাই তাদেরই হত্যাকারী ব'লে বিশ্বাস করবে, তাঁকে ও তাঁর স্বামীকে কেউ সন্দেহ মাত্র করবে না।

এমন হত্যাকাণ্ড ত আর ছাপিয়ে রাখবার বিষয় নয় ; তাই পরদিন প্রাতেই সবাই জানতে পেলেন। ম্যাকবেথ ও লেডি ম্যাকবেথ কপট শোক প্রকাশ করতে কিছুমাত্র ক্রটি করলেন না। রক্ষীদের বিরুদ্ধে প্রমাণের অভাব ছিল না, তাদের হাতে পায়ে রক্ত মাখান—রক্তমাখান ছোরাও তাদের কাছেই পাওয়া গেছে। ম্যাকবেথ রাজাকে

শেক্সপিয়রের গল্প

হত্যা করার অপরাধে এই নিরপরাধ নিরীহ রক্ষীদের প্রাণদণ্ডের ব্যবস্থা করলেন ; ভাবলেন, এতেই সব আপদ চুকে যাবে । কিন্তু এত ক'রেও লোকের সন্দেহের হাত এড়াতে পারলেন না : রাজাকে হত্যা করায় বেচারী রক্ষীদের চেয়ে তাঁরই স্বার্থ বেশী, তাই সবাই তাঁকেই সন্দেহ করছিল । সব দেখে শুনে রাজার ছেলেদের আর সেখানে থাকতে সাহস হ'ল না ; তাঁরা তখনই সেখান থেকে পালিয়ে গেলেন । বড় রাজপুত্র ম্যাকম ইংলণ্ডের রাজার আশ্রয় নিলেন, আর ছোট রাজপুত্র ডোনালবেন গেলেন আয়ারল্যান্ডে ।

রাজপুত্রেরা পালিয়ে যাওয়ায় তাঁদের পরে নিকটতম আত্মীয় ব'লে ম্যাকবেথই রাজ্যভিষিক্ত হ'লেন । এমনি ক'রে ডাইনিদের ভবিষ্যদ্বাণী সফল হ'ল ।

রাজা হ'লেন বটে, কিন্তু ডাইনিদের ভবিষ্যদ্বাণীর শেষ অংশের কথা মনে ক'রে ম্যাকবেথ ও তাঁর রাণীর মনে শাস্তি ছিল না । ডাইনিরা যে বলেছিল, ব্যাঙ্কোর বংশধরেরাই পরে রাজা হ'বে, এ-কথা তাঁদের সব সময়ই মনে পড়ত । তাঁদের নিজেদের ছেলেরা রাজা না হ'য়ে ব্যাঙ্কোর ছেলেপুলেরা রাজা হ'বে, এ-চিন্তা তাঁদের আর সহ্য হচ্ছিল না । তবে কি তাঁরা ব্যাঙ্কোর বংশধরদের রাজা

ম্যাকবেথ

করবার জন্যেই ডানক্যানের রক্তে তাঁদের হাত কলুষিত
ক'রেছেন ?—এত পাপ করেছেন ? ডাইনিদের ভবিষ্যদ্বাণী
তাঁদের বেলা যেমন ফলেছে ব্যাক্কোর ছেলেপুলেদের
বেলাও যদি তেমনি ফলে, তবে ত সবই বৃথা হবে ! কোন
রকমেই কি ঐটুকু বিফল করা যায় না ? অনেক পরামর্শের
পর স্বামী-স্ত্রীতে ঠিক করলেন, যে ক'রেই হোক ব্যাক্কো
ও তাঁর ছেলেকে মেরে ফেলতে হ'বে—তা' হ'লেই
ডাইনিদের কথা মিথ্যে হ'বে ।

মনে এই ফন্দি এঁটে তাঁরা একদিন রাত্রে এক
মহাভোজের আয়োজন করলেন ; তাতে রাজ্যের প্রধান
প্রধান ও গণ্যমান্য লোকদের সবাই নিমন্ত্রিত হ'লেন ;
ব্যাক্কো ও তাঁর ছেলে ফ্লিয়েন্সকে একটু বিশেষ ক'রেই
নিমন্ত্রণ করা হ'ল । তারপর যে পথে ব্যাক্কো ও তাঁর
ছেলেকে ম্যাকবেথের প্রাসাদে আসতে হবে, সেই পথে
তাঁদের মেরে ফেলবার জন্যে জন কয়েক গুপ্তঘাতক রেখে
দিলেন । রাত্রে পিতাপুত্রে যখন সেই পথে নিমন্ত্রণে
যাচ্ছিলেন তখন ঐ ঘাতকদের হাতে ব্যাক্কো নিহত হ'লেন,
কিন্তু এদের ধস্তাধস্তি থেকে কোন রকমে আত্মরক্ষা ক'রে
ফ্লিয়েন্স পালিয়ে গেলেন । এই ফ্লিয়েন্স ও তাঁর বংশ-
ধরেরাই পরে স্কটল্যান্ডের রাজা হ'ন ; এই বংশের

শেক্সপিয়রের গল্প

রাজা ষষ্ঠ জেমস্ পরে ইংলণ্ড ও স্কটল্যাণ্ড উভয় রাজ্যেরই রাজা হ'য়ে ইংলণ্ডের প্রথম জেমস্ নাম গ্রহণ করেন।

এদিকে ভোজের সময় রাণীর কৃত্রিম আদর-অভ্যর্থনায় ও অমায়িকতায় উপস্থিত সকলেই বিশেষ আপ্যায়িত বোধ করতে লাগলেন। ম্যাকবেথও শিফটলাপে সবাইকে পরিতুষ্ট কচ্ছিলেন। তিনি বলছিলেন, আর কেবলমাত্র তাঁর উদারহৃদয় বন্ধু ব্যাঙ্কো এলেই আজ তাঁদের গৃহে স্বদেশের অভিজাতসম্প্রদায়ের সবাই একত্রিত হ'তেন ; তাঁর মনে হ'চ্ছে, অশুভ কিছু ঘটেছে ব'লে যে ব্যাঙ্কো আসেন নি তা নয়, প্রকৃত স্নেহের অভাব বশতঃই বোধ হয় তিনি এখনও আসছেন না।—এই ব'লে ব্যাঙ্কোর অনুপস্থিতির জন্যে কৃত্রিম দুঃখ প্রকাশ ক'রে যেই তিনি বসতে যাচ্ছেন, অমনি দেখতে পেলেন, যেন ব্যাঙ্কোর প্রেতাঙ্গা ঘরে ঢুকে তাঁরই (ম্যাকবেথের) বসবার আসনে বসলেন। তাঁর মুখ ভয়ে একেবারে ফ্যাকাসে হ'য়ে গেল, তিনি সেই প্রেতের দিকে একদৃষ্টে চেয়ে স্তম্ভিত ভাবে দাঁড়িয়ে রইলেন। রাণী ও আর সবাই এর কিছুই দেখতে পাচ্ছিলেন না ; ম্যাকবেথকে শূন্য আসনের দিকে অমন ভাবে তাকিয়ে থাকতে দেখে তাঁরা তাঁর মতিভ্রম হ'য়েছে ব'লে মনে করলেন। লেডি ম্যাকবেথ স্বামীকে সম্বন্ধিয়ে দেবার

ম্যাকবেথ

চেষ্টা ক'রে চুপি চুপি বল্লেন, ডানক্যানকে হত্যা করবার সময় সেই শূন্যে রক্তমাখান ছোরা বুলতে দেখবার মত আজও বোধহয় তাঁর দৃষ্টিবিভ্রম ঘটেছে ; কিন্তু তাতে কোন ফলই হ'ল না। ম্যাকবেথ ব্যাঙ্কোর প্রেতাআকে তেমনি ভাবে দেখতে থাকলেন—দেখলেন, যেন তাঁর সর্ব্বাঙ্গ ক্ষতবিক্ষত, তা' থেকে যেন অনবরত রক্ত পড়ছে ; ম্যাকবেথ ভয়ে শিউরে উঠলেন। কারও কথায় কান না দিয়ে তিনি আর সকলের কাছে অবোধ্য অথচ বেশ অর্থযুক্ত ভাষায় প্রেতাআকে সম্বোধন ক'রে কথা বলতে শুরু করলেন। এই নিশ্চয় কাহিনী পাছে বেরিয়ে পড়ে, এই ভয়ে রাণী নিমন্ত্রিত সবাইকে ফাঁকি দিয়ে বিদায় ক'রে দিলেন ; বল্লেন, ম্যাকবেথের মাঝে মাঝে এই একরকম পীড়া উপস্থিত হয়—এ বিশেষ কিছুই নয় ; একটু নিঃসর্জনে থাকলেই সেরে যাবে। এর পর হ'তে অনেক সময়ই ম্যাকবেথ ঐ রকমের বিভীষিকা দেখতেন। স্বামী-স্ত্রী কারও মোটেই স্নানিদ্রা হ'ত না, কত যে ভয়ানক স্বপ্ন দেখতেন তার আর শেষ ছিল না।

ব্যাঙ্কোর ছেলে ফ্লিয়েন্স যে পালিয়ে আত্মরক্ষা করেছে, সে যে এখনও জীবিত, এতে তাঁদের অশান্তির সীমা ছিল না ; এমন কি ব্যাঙ্কোকে হত্যা ক'রে যে অশান্তি ভোগ

শেখপিয়রের গল্প

কচ্ছিলেন তার চেয়েও এ অশাস্তি হয়েছিল বেশী। এখন ক্রিয়েন্সকে তাঁরা স্কটল্যান্ডের ভবিষ্যৎ রাজবংশের আদিপুরুষ বলেই মনে করতেন—আর এরাই ত হ'বে তাঁদের ছেলেপুলেদের রাজা না হ'বার কারণ !

এই সব ক্লেশকর চিন্তাতে তাঁরা মনে একেবারেই শাস্তি পেতেন না ; তাই ভবিষ্যতে বরাতে আরও কি আছে, আরও কত অশাস্তিভোগ আছে, তা' জানবার জন্যে ম্যাকবেথ আবার একবার সেই ডাইনিদের খোঁজে যাবেন বলে স্থির করলেন।

পরদিন ম্যাকবেথ সেই প্রাস্তরের এক গহ্বর মধ্যে ডাইনিদের দেখা পেলেন। তারা আগে থেকেই জানত যে, ম্যাকবেথ তাদের কাছে আবার আসবেন, তাই তারা নানারূপ ভয়াবহ ভেল্কীর সৃষ্টি করে ভবিষ্যৎ জানবার জন্যে প্রেতাঙ্গাদের ডেকে আনছিল। সে এক বীভৎস ব্যাপার—একটা প্রকাণ্ড কড়ার মধ্যে কোলা বেঙ, বাছড়, সাপ, আঞ্জুনির চোখ, কুকুরের জিভ, গিরগিটির ঠ্যাং, প্যাঁচার ডানা, পাখাওয়ালা সাপের আঁস, নেকড়ে বাঘের দাঁড়, হাঙ্গরের পাকস্থলী, শুটকী করা মড়া ডাইনি, আঁধার রাতে খুঁড়ে তোলা বিষগাছের শেকড়, ছাগলের পিত্তি, ইহুদীর মেটে (লিবার), গ্রহণের রাতে কাটা কবর ভূঁয়ের

ম্যাকবেথ

ঝাউ গাছের ডাল, মড়া ছেলের আঙ্গুল, বাঘের ভুঁড়ি—এই সব বিদ্যুটে জ্বিনিসপত্তর একত্র ক'রে নিয়ে তারা সেক্ষ কচ্ছিল। কড়া যখন খুব তেঁতে উঠছিল তখন আবার তাতে হনুমানের রক্ত দিয়ে সেটা ঠাণ্ডা কচ্ছিল। এতে আবার চানাথেকো মাদৌ শূয়রের রক্ত মিশিয়ে দিয়ে ফাঁসিকাঠের গা থেকে আনা মড়া মানুষের চর্বিব আঙুনে ঢেলে দিচ্ছিল। এই রকম ক'রেই নাকি ঐ ডাইনিরা প্রেতাত্মাদের কাছ থেকে ভবিষ্যৎ জেনে থাকে।

এতক্ষণ দাঁড়িয়ে দাঁড়িয়ে ম্যাকবেথ ডাইনিদের এই সব কাণ্ডকারখানা দেখছিলেন। অন্য কেউ হ'লে হয়ত ভয় খেয়ে যেত ; কিন্তু তিনি বিন্দুমাত্রও বিচলিত হ'লেন না। ডাইনিরা জিজ্ঞেস করলে যে, তিনি তাঁর প্রশ্নের উত্তর তাদের মুখেই শুন্বেন—না, খোদ প্রেতাত্মাদের কাছ থেকেই জবাব নেবেন ? ম্যাকবেথ তাতে মোটেই না যাব্রিয়ে বল্লেন, প্রেতদের কাছ থেকে কথার উত্তর পেলেই তিনি বেশা খুসী হবেন। তখন ডাইনিদের আহ্বানে একে একে তিনটি প্রেতমূর্তির আবির্ভাব হ'ল। প্রথমে আবির্ভাব হ'ল একটি কাটামুণ্ডের, সেটা ম্যাকবেথকে নাম ধরে ডেকে বল্লেন, “ম্যাকবেথ, ফাইফের অধিপতি ম্যাকডফ থেকে সাবধানে থেকে।” ম্যাকবেথ নিজেও ম্যাকডফকে সন্দেহের

শেক্সপিয়ারের গল্প

চোখেই দেখতেন, কাজেই কাটামুণ্ডোর কথা তাঁর খুবই বিশ্বাস হ'ল।

কাটামুণ্ডোর অন্তর্ধানের সাথে সাথেই একটি রক্তাক্ত-কলেবর শিশুমূর্তির আবির্ভাব হ'ল ; সে বলে, “ম্যাকবেথ, কোনও ভয় নেই—মায়ের পেটে জন্মেছে এমন কেউ তোমার কিছু করতে পারবে না।” এ-কথা শুনে ম্যাকবেথ ব'লে উঠলেন, “ম্যাকডফ, তবে তুমি বেঁচে থাকতে পার, তোমাকে আর আমি ভয় করিনে ; না, তবু তোমাকে বাঁচতে দেব না—শত্রুর শেষ রাখতে নেই।”

দ্বিতীয় প্রেতমূর্তি অস্তহিত হ'ল—একটি মুকুটধারী শিশুমূর্তি হাতে একটি গাছের ডাল নিয়ে তার স্থানে আবিভূত হ'ল। সে বলে, “ম্যাকবেথ, যড়যন্ত্রে, লোকের কানাকানিতে বা অসন্তোষে কিছুমাত্র নিচলিত হ'য়ো না, যতদিন বার্নাম বন ডানসিনেন পাহাড়ে এসে না পড়ে, ততদিন তোমার পরাজয় নেই।” এই কথা ব'লে প্রেতাত্মা তিরোহিত হ'ল। ম্যাকবেথ ব'লে উঠলেন, “এ তো বেশ ভাল খবর, বন আবার কবে এক জায়গা থেকে উঠে অন্য জায়গায় গিয়ে থাকে ? তাও কি কখনও সম্ভব হয় ? যাক, তা' হ'লে আর যা-ই হোক আমার অপমৃত্যু হ'বে না—আমি পূর্ণ বয়স পর্য্যন্ত বেঁচে থেকে রাজ্যস্থখ ভোগ করতে

ম্যাকবেথ

পার্ব। এখন অনেকটা নিশ্চিত হওয়া গেল ; কিন্তু একটা কথা বড়ই জানতে ইচ্ছে হয়”—এই বলে ডাইনিদের সম্বোধন ক’রে তিনি বলেন, “তোমরা আমাকে নিশ্চয় ক’রে বলতে পার কি যে, ব্যাক্কোর বংশধরেরা সত্যি সত্যি রাজা হ’বে কিনা ?”—এই কথা জিজ্ঞেস করবার সঙ্গে সঙ্গেই কড়াটা মাটির ভিতর ঝসে গেল এবং এক রকমের সঙ্গীতধ্বনি উঠল। একে একে আটটি রাজমূর্তি ম্যাকবেথের সামনে দিয়ে চ’লে গেল, সকলের শেষে ব্যাক্কো একখানা দর্পণ হাতে ক’রে উপস্থিত হ’লেন—তাতে আরও অনেকের মূর্তি ফুটে উঠেছে—আর রক্তাক্তকলেবর ব্যাক্কো যেন ম্যাকবেথের দিকে চেয়ে হাসছেন ও তাদের দেখিয়ে দিচ্ছেন ! ম্যাকবেথ বেশই বুঝতে পারলেন যে, এরাই ব্যাক্কোর বংশধর, এরাই তাঁর পরে স্কটল্যান্ডের রাজা হ’বে। মধুর সঙ্গীতের তালে তালে নাচতে নাচতে তাঁকে অভিবাদন ক’রে ও স্বাগত সম্বাষণ জানিয়ে ডাইনিরা সহসা যেন বাতাসে মিলিয়ে গেল ! এর পর থেকে ম্যাকবেথের মনে আর তিলমাত্রও শাস্তি রইল না ; কেবল যা’-কিছু ভীষণ, যা’-কিছু ভয়ানক সেই সব চিন্তাতেই তাঁকে পেয়ে বসল।

ডাইনিদের গহ্বর থেকে রাজধানীতে ফিরে প্রথমেই তিনি শুনতে পেলেন যে, ফাইফের অধিপতি ম্যাকডফ ইংলণ্ডে

শেক্সপিয়রের গল্প

পালিয়ে গিয়ে ডানক্যানের বড় ছেলে ম্যাকমের সঙ্গে যোগ দিয়েছেন—উদ্দেশ্য, ম্যাকবেথকে সিংহাসনচ্যুত ক'রে প্রকৃত উত্তরাধিকারী ম্যাকমকে রাজা করবেন। এতে ম্যাকবেথের তার রাগের সীমা থাকল না ; তিনি একেবারে হাড়ে হাড়ে চটলেন : ম্যাকডফ স্ত্রী-পুত্রদের তাঁর দুর্গেই রেখে গিয়েছিলেন, ম্যাকবেথ হঠাৎ একদিন তাঁদের আক্রমণ ক'রে সবাইকে মেরে ফেলেন, এমন কি ম্যাকডফের অতিদূর আত্মীয়েরাও রেহাই পেলেন না।

এইরূপ নানাপ্রকার অত্যাচারে রাজ্যের গণ্যমান্য সম্রাস্ত্র লোকেরা সকলেই ম্যাকবেথের উপর যার-পর-নাই বিরুদ্ধ হ'য়ে উঠলেন। এই সময়ে ইংলণ্ড থেকে প্রকাণ্ড একদল সৈন্য সংগ্রহ ক'রে ম্যাকম ও ম্যাকডফ তাঁকে আক্রমণ করবার জন্য স্কটল্যান্ডের দিকে অগ্রসর হ'তে লাগলেন। যারা পারলেন পালিয়ে গিয়ে এই দলের সঙ্গে যোগ দিলেন ; আর যারা ভয়ে প্রকাশ্য ভাবে ম্যাকবেথের বিরুদ্ধে যোগ দিতে সাহসী হ'লেন না তাঁরাও মনে মনে সেই চুরাচারের পতন কামনা করতে লাগলেন। সুতরাং ম্যাকবেথের সৈন্যসংগ্রহ অতি ধীরভাবেই চলতে লাগল। রাজ্যমধ্যে মহা অশান্তি, হাহাকার ও অনর্থ উপস্থিত হ'ল। ছোট বড় সবাই ম্যাকবেথকে ঘৃণা করতে ও সন্দেহের চোখে দেখতে

ম্যাকবেথ

স্বরূপ করেছিল। তাঁকে ভালবাসে বা অস্তুরের থেকে শ্রদ্ধা করে এমন কেউ ছিল না। ক্রমে তাঁর মনে হ'তে লাগল, যে ডানক্যানকে তিনি হত্যা করেছেন, না জানি সে ডানক্যানও এখন তাঁর চেয়ে কত বেশী সুখী! আরও মনে হ'ল যে, তাঁর বিশ্বাসঘাতকতায় ডানক্যানের যা' ক্ষতি করবার তার চরমই করেছে বটে, কিন্তু আজ ডানক্যানে ও তাঁতে কত প্রভেদ! তিনি আজ মহানিদ্রায় অভিভূত, ছোরার ঘায় কিংবা বিষপ্রয়োগে, দেশের লোকের হিংসাদ্বেষে কিংবা বিদেশীর আক্রমণে, এ পৃথিবীর কিছুতেই এখন তাঁর কিছু করতে পারে না—তিনি আজ এ-সবের অতীত। আর রাজা হ'য়েও ম্যাকবেথ আজ কত না অসুখী, কত না ঘৃণ্য! এ অবস্থায়ও ম্যাকবেথ একটু শাস্তি পেতেন তাঁর স্ত্রীর কোলে মাথা রেখে, কিন্তু এমনি দূরদৃষ্ট যে, তাঁর পাপের একমাত্র সঙ্গিনী সেই স্ত্রীও লোকের অবজ্ঞা ও কৃতপাপের জগ্নু আত্মগ্লানিতে জীবনটাকে নিতান্ত দুর্বিষহ বোধ ক'রে একদিন সকল জ্বালা থেকে মুক্তি পাবার জগ্নু আত্মহত্যা করলেন। রাণীর এই আকস্মিক মৃত্যুতে ম্যাকবেথের আপনার বলবার আর কেউ রইল না, এমন কেউ রইল না যে ভালবেসে তাঁর দুঃখে এক ফেঁটা চোখের জল ফেলে বা যার কাছে পাপাত্মা নিজের পাপবাসনা ব্যক্ত করতে পারে।

শেক্সপিয়রের গল্প

যতই দিন যেতে লাগল ততই ম্যাকবেথ জীবনের প্রতি মমতাশূন্য হ'য়ে মৃত্যুকামনা করতে লাগলেন। যখন খবর পেলেন যে, ম্যাকম সৈন্যসামন্ত নিয়ে অনেকটা কাছে এসে পড়েছেন, তখন তাঁর সেই আগেকার শৌর্যের যা-কিছু তখনও ছিল, তার-ই বলে যুদ্ধের জন্য প্রস্তুত হ'তে লাগলেন; স্থিরসঙ্কল্প করলেন, প্রাণ দিতে হয় যুদ্ধ ক্ষেত্রেই দিবেন। এ ছাড়া “মায়ের পেটে জন্মেছে এমন কেউ তোমার কিছু করতে পারবে না” ও “যতদিন বার্নাম বন ডান্সিনেন পাহাড়ে এসে না পড়ে ততদিন তোমার পরাজয় নেই”— ডাইনিদের এই দু'টি কথার উপর নির্ভর ক'রে তিনি আপনাকে আশ্বস্ত করেছিলেন; ভেবেছিলেন, প্রথম কারণে মানুষ থেকে তাঁর মৃত্যু ভয় নেই, আর বার্নাম বন স্থান ছেড়ে চ'লে আসা, সে ত একেবারেই অসম্ভব, তাই তাঁর পতনের ভয়ও নেই। এই মনে ক'রে তিনি তাঁর দুর্ভেদ্য দুর্গের দ্বার রুদ্ধ ক'রে দিয়ে এক রকম নিশ্চিতভাবেই ম্যাকম ও ম্যাকডফের আক্রমণের প্রতীক্ষা করতে লাগলেন। একদিন ব'সে আছেন, এমন সময় একজন দূত এসে উপস্থিত হ'ল। ভয়ে তার মুখ বিবর্ণ হ'য়ে গেছে, সমস্ত শরীর কাঁপছে, ভাল ক'রে কথা পর্য্যন্ত বলতে পারছিল না। অনেক কষ্টে সে বলে, “মহারাজ, সে এক অদ্ভুত ব্যাপার ;

ম্যাকবেথ

পাহাড়ের গায়ে দাঁড়িয়ে পাহারা দিচ্ছিলাম, হঠাৎ একবার বার্নাম বনের দিকে নজর পড়ায় মনে হ'ল, যেন বন সচল হয়েছে—যেন ক্রমে আমাদের এই দুর্গের দিকে এগিয়ে আসছে।” ম্যাকবেথ কিন্তু প্রথমটায় দূতের কথায় মোটেই বিশ্বাস করেন নি, তাই চোঁচিয়ে ব'লে উঠলেন, “মিথ্যাবাদী—প্রবঞ্চক, যদি তোমার কথা মিথ্যা হয়, তবে প্রথমেই যে গাছ আমার নজরে প'ড়বে তাতেই তোকে জীবন্ত ঝুলিয়ে রাখব, যে পর্যন্ত না অনাহারে তোমার প্রাণ যায়। আর যদি তোমার কথাই সত্যি হয়, তা' হ'লে আমাকে ঐরূপ করলেও কোন অপশোধ থাকবে না।” ক্রমেই যেন ম্যাকবেথ নিরুৎসাহ হ'য়ে পড়ছিলেন, ক্রমেই সেই প্রেতাত্মাদের প্রহেলিকাময় কথায় তাঁর সন্দেহ উপস্থিত হচ্ছিল। বার্নাম বন ডান্সিনেন পাহাড়ে এসে না পড়া পর্যন্ত তাঁর ভয়ের কোন কারণই নেই, কিন্তু আজ ত বার্নাম বন সচল হয়েছে, ডান্সিনেনের দিকে আসছে, তবে কি সত্যি সত্যি এতদিনে তাঁর পতনের সময় উপস্থিত? তিনি মুখে বল্লেন, “দূতের কথাই যদি সত্যি হ'য়ে থাকে, তা' হ'লে আর দেৱী করলে চলবে না; এখনই সজ্জিত হ'য়ে আমাদের বেরুতে হ'বে। এখান থেকে পালাবার উপায় নেই, কিন্তু এখানে ব'সে থাকলেও আর চলবে না। আর সহ্য হয় না, যে ক'রেই হোক জীবনের

শেখাপিয়রের গল্প

শেষ হ'লেই বাঁচি।” ম্যাকবেথ একেবারে মরিয়া হ'য়ে উঠেছিলেন। বিপক্ষ দলও দুর্গের কাছে এসে পড়েছিল। তাই আর বিলম্ব না ক'রে সসৈন্যে বেরিয়ে গিয়ে ম্যাকবেথ তাদের আক্রমণ করলেন।

এক রকমে ধরতে গলে দূত ঠিক কথাই বলেছিল। সুদক্ষ সেনাপতির ন্যায় নিজেকে সৈন্যসংখ্যা ম্যাকবেথের কাছ থেকে গোপন করবার উদ্দেশ্যে, ম্যাকম বার্নাম বনের ভিতর দিয়ে আসবার সময়, সৈন্যদের প্রত্যেককে একথানা ক'রে গাছের ডাল কেটে নিয়ে নিজের সামনে ধরে চলতে আদেশ করেছিলেন। কাজেই দূর থেকে সত্ৰি মনে হচ্ছিল, যেন বার্নাম বনটি-ই সচল হ'য়ে উঠেছে। দূত বেচারাও তাই দেখে অত ভয় পেয়েছিল। ম্যাকবেথ ষা বুঝেছিলেন, তার থেকে সম্পূর্ণ বিপরীত ভাবে এমনি ক'বেই প্রেতাঙ্গাদের কথার খানিকটা ফলল; অজ্ঞ তাঁর দু'টি দৃঢ় বিশ্বাসের একটি দূর হ'য়ে গেল।

দু' দলে ভাঁষণ যুদ্ধ হ'তে লাগল। ম্যাকবেথের সৈন্যসংখ্যা তেমন বেশী ছিল না; যা' ছিল তাও দুর্মতির অত্যাচারে ও উৎপীড়নে তাঁর উপর মোটেই সন্দুহ ছিল না, বরং তাঁকে খুব ঘণাই করত এবং অনেকেই অশুরে অশুরে তাঁর নিধন ও রাজপুত্র ম্যাকমের জয় কামনা করত।

ম্যাকবেথ

ম্যাকবেথ নিজে অতুল বিক্রমে যুদ্ধ করছিলেন, তাঁর সেই আগেকার বীরত্ব যেন ফিরে এসেছিল—বিপক্ষ সৈন্য তাঁর সামনে কিছুতেই টিকে থাকতে পারছিল না। এমনি ভাবে যুদ্ধ করতে করতে ম্যাকবেথ ম্যাকডফের সম্মুখে এসে পড়লেন। ম্যাকডফকে দেখেই ম্যাকবেথের সেই কাটামুণ্ডের কথা মনে পড়ল, তাই তিনি অন্য দিকে চলে যাচ্ছিলেন; কিন্তু ম্যাকডফ বাধা দিলেন। ম্যাকডফ যুদ্ধের আগাগোড়াই ম্যাকবেথকে খুঁজে বেড়াচ্ছিলেন, এখন একত্র হওয়ার দু'জনের মধ্যে তুমুল যুদ্ধ আরম্ভ হ'ল। তাঁর স্ত্রী-পুত্র ও আত্মীয়স্বজনকে নিষ্ঠুর ভাবে পশুর ন্যায় হত্যা করার জন্যে ম্যাকডফ ম্যাকবেথকে যা'-তা' ব'লে গালাগালি দিতেও ছাড়লেন না; ম্যাকবেথের উপর তাঁর রাগের কিছুতেই উপশম হচ্ছিল না।

ম্যাকবেথের আত্মা ম্যাকডফের স্বজনবর্গের রক্তে কলুষিত, তাই তখনও তিনি ম্যাকডফের সাথে যুদ্ধ এড়াতে চেষ্টা করছিলেন, কিন্তু ম্যাকডফ তাঁকে নরাধম, নরহস্তা, নারকা কুকুর ইত্যাদি ব'লে এমনই উত্তেজিত ক'রে তুললেন যে, শেষটায় ম্যাকবেথও প্রচণ্ড ভেজে ম্যাকডফকে আক্রমণ করলেন। উভয়ের মধ্যে ঘোর যুদ্ধ চলতে লাগল।

হঠাৎ ম্যাকবেথের সেই দ্বিতীয় প্রেতমূর্তির ভবিষ্যদ্বাণীর

শেঙ্গুপিয়রের গল্প

কথা মনে পড়ল—যে, মায়ের পেটে জন্মেছে এমন কেউ তাঁর কিছু করতে পারবে না। হেসে সাহস্কারে তিনি ম্যাকডফকে বললেন, “ম্যাকডফ, বৃথা চেষ্টা তোমার—বরং এই অচ্ছেদ্য অশরীরী বায়ুকে তোমার ত্রীক্ষুধার তরবারি দিয়ে তুমি আঘাত করতে পার, কিন্তু আমার কেশাগ্রও তুমি স্পর্শ করতে পারবে না ; নোহিনাশক্তি দ্বারা আমার জীবন রক্ষিত, আমি গর্ভপ্রসূত ব্যক্তির অবধা।”

ম্যাকডফ উত্তর করলেন, “ও-সব মন্ত্রবলের কথা ছেড়ে দাও। স্বাভাবিক ভাবে মাতৃগর্ভ থেকে আমার জন্ম হয় নি ; অসময়ে চিকিৎসকের অঙ্গপ্রভাবে আমার জন্ম হয়েছিল।”

ম্যাকবেথ নিজের কানকে বিশ্বাস করতে পাচ্ছিলেন না ; পরে শিউরে উঠে কাঁপতে কাঁপতে বললেন, “যথেষ্ট হয়েছে, আর নয়—ডাইনিদের কথায় বিশ্বাস করে বেশ শিক্ষা পেয়েছি ! আর যেন কেউ কোন দিন ওদের কথায় বিশ্বাস না করে। ওদের সব কথারই দু’রকম অর্থ—এক রকম বুঝে লোকে প্রলুব্ধ হয়ে উঠে ; পরে কিন্তু আশাতঙ্গ হয় !—না, তোমার সাথে আমি আর যুদ্ধ করব না।”

অবজ্ঞাতরে ম্যাকডফ উত্তর করলেন, “বেশ, তবে তাই হোক, কাপুরুষের মত অধীনতা স্বীকার করে সকলের

ম্যাকবেথ

দেখবার জিনিস হ'য়ে জীবন যাপন কর। হিংস্র জন্তু
দেখবার মত সবাই এসে তোমাকে দেখে যাবে। একখানা
তক্তায় বড় বড় হরপে লিখে রাখ, “সবাই দেখে যাও,
এখানে এক নিশ্চয়, অত্যাচারী নরহন্তা রয়েছে।”

হতাশায় মরিয়া হ'য়ে উঠে ম্যাকবেথ বলেন, “না, কখনই
পরাজয় স্বীকার করব না, কখনই বালক ম্যাকমের পদানত
হ'ব না, আর বাজে লোকের ঠাট্টা-বিদ্রপও সহ্য করতে
পারব না। যদিও বার্নাম বন ডান্সিনেন পাহাড়ে এসে
উপস্থিত হয়েছে, যদিও নাকি ভূমি স্বাভাবিক ভাবে মায়ের
গর্ভ থেকে জন্মাও নি, তবুও শেষ পর্যন্ত দেখব।” এই
কথা বলে ম্যাকবেথ বিপুল বিক্রমে আবার ম্যাকডফকে
আক্রমণ করলেন। আবার উভয়ে তুমুল যুদ্ধ চলতে
লাগল। অনেকক্ষণ যুদ্ধের পর ম্যাকডফ জয়লাভ করলেন
এবং ম্যাকবেথের ছিন্নমুণ্ড নিয়ে গিরে নবীন রাজা ম্যাকমকে
উপহার দিলেন। পাপীর উপযুক্ত পরিণামই লাভ হ'ল।

প্রেতাআদের প্রথম তিনটি ভবিষ্যদ্বাণী এত দিনে সত্যি
সত্যি ফ'লল। এতদিনে ম্যাকম তাঁর হারানো পিতৃরাজ্য
ফিরে পেলেন। রাজ্যের সম্রাট ব্যক্তির ও প্রজাবৃন্দ
সবাই মিলে মহাসমারোহে তাঁকে সিংহাসনে বসালেন ;
রাজ্যে সুখ-শান্তি ফিরে এল।

শেক্সপিয়রের গল্প

ডাইনিদের শেষ কথাটিও ফলেছিল—শেষে সতি
ব্যান্কার বংশধরেরা স্কটল্যান্ডের এবং পরে স্কটল্যান্ড ও
ইংলণ্ডের রাজা হয়েছিলেন ।

শীতের গল্প

সিসিলির রাজা ছিলেন লিয়ন্টিস, আর তাঁর রাণী ছিলেন হারমিয়নি। তিনি যেমন সুন্দরী তেমনি সাধবী। উভয়ে মিলে বেশ আনন্দে দিন কেটে যাচ্ছিল। রাণীর ভালবাসায় রাজা পরম সুখে ছিলেন, কোন সাধই তাঁর অপূর্ণ ছিল না। কেবল মাঝে মাঝে তাঁর বাল্যবন্ধু ও সহপাঠী বোহেমিয়ার রাজা পলিক্সেনিসকে দেখতে এবং তাঁকে হারমিয়নির সঙ্গে পরিচয় করিয়ে দিতে ইচ্ছা হতো। তাঁরা দু'টিতে ছেলেবেলা থেকেই এক সঙ্গে লালিত পালিত হয়েছিলেন; পরে পিতার মৃত্যুতে দু'জনকেই নিজ নিজ রাজ্যের ভার নিতে হ'ল। সে জন্ম অনেক দিন আর দু'জনে দেখাসাক্ষাৎ হয়নি—তবে চিঠিপত্র লেখালেখি, উপহার বিনিময় ও খোঁজখবর লওয়া অনেক সময়ই চলত।

অনেক নিমন্ত্রণ-আমন্ত্রণের পর, শেষটায় পলিক্সেনিস একবার সিসিলিতে বন্ধুর সঙ্গে দেখা করতে এলেন। প্রথমে পলিক্সেনিসকে পেয়ে লিয়ন্টিস ত মহা খুসী! বাল্যবন্ধুকে রাণীর সঙ্গে ভাল রূপ পরিচয় ক'রে দিলেন; প্রিয় বন্ধুকে পেয়ে সেদিন যেন তাঁর আনন্দের আর সীমা

শেক্সপিয়রের গল্প

রইল না । দু'জনে মিলে সেই ছেলেবেলার কথা হ'তে লাগল । সেই স্কুলে পড়বার সময়ের কথা, প্রথম যৌবনের কত রকমের কত ছেলেমানুষির কথা তাঁরা হারমিয়নিকে শোনাতে লাগলেন—রাণীও বেশ আনন্দে তাতে যোগদান করলেন । অনেক দিন থাকবার পর পলিক্সেনিস যখন যাবার কথা তুললেন, তখন লিয়টিস—এবং স্বামীর অনুরোধে হারমিয়নিও, তাঁকে আরও কিছুদিন থাকবার জন্যে অনুরোধ করতে লাগলেন ।

এইবার রাণীর দুঃখের পালা আরম্ভ হ'ল । পলিক্সেনিস লিয়টিসের অনুরোধে থাকতে স্বীকার হচ্ছিলেন না, কিন্তু রাণীর সানু নয় অনুরোধ তিনি এড়াতে পারলেন না । লিয়টিস বরাবর জানতেন যে, তাঁর বন্ধু পলিক্সেনিস সাধু এবং সচ্চরিত্র—আর তাঁর রাণীও খুব স্ত্রীশীলা এবং ধর্মপরায়াণা ; তবু এই ঘটনায় তাঁর মনে বিষম ঈর্ষা দেখা দিল । স্বামীকে খুসী করবার জন্যে, তাঁরই অনুরোধে, হারমিয়নি পলিক্সেনিসকে খুব খাতির যত্ন করতেন ; কিন্তু লিয়টিস বুঝলেন অন্য রকম । তিনি বন্ধুকে এত যে স্নেহ করতেন, রাণীকে এত যে ভালবাসতেন—সে-সব একেবারে ভুলে গিয়ে সহসা পশুবৎ নিশ্চম ও নিষ্ঠুর হ'য়ে উঠলেন । ক্যামিলো ব'লে একজন অমাত্যকে রাজা তখনই

শীতের গল্প

ডেকে আনলেন, আর তাঁর সন্দেহের কথা তাঁকে খুলে ব'লে পলিক্সেনিসকে বিষ খাইয়ে মেরে ফেলতে আদেশ করলেন ।

ক্যামিলো খুব সৎলোক ছিলেন । তিনি বেশ জানতেন, এ সন্দেহের সত্যিকার কোন কারণই নেই—তাই বিষ না খাইয়ে, পলিক্সেনিসকে রাজার আদেশ জানিয়ে তাঁর সঙ্গে সিসিলি রাজ্য ছেড়ে পালিয়ে যাবার পরামর্শ করলেন । ক্যামিলোর সাহায্যে পলিক্সেনিস নিরাপদে নিজ রাজ্যে এসে পৌঁছলেন । ক্যামিলোও পলিক্সেনিসের বিশেষ প্রিয়পাত্র ও একজন প্রধান বন্ধু হ'য়ে তাঁর সভায় র'য়ে গেলেন ।

পলিক্সেনিস পালিয়ে যাওয়ায় হিংসায় রাজা আরও রেগে গেলেন । একেবারে রাণীর ঘরে গিয়ে হাজির । রাণী তখন তাঁর শিশুপুত্র ম্যামিলিয়সকে কোলে নিয়ে ব'সে ছিলেন, আর সে তার মাকে খুসী করবার জগ্যে বেশ ভাল একটা গল্প বলবার যোগাড় করছিল । এমন সময় রাজা এসে ছেলেকে রাণীর কাছ থেকে ছিনিয়ে নিয়ে তাঁকে গারদে পাঠিয়ে দিলেন ।

ম্যামিলিয়স শিশু হ'লেও তার মাকে বড়ই ভালবাসত । মায়ের এই অপমান, আর তাঁকে গারদে নিয়ে

শেক্সপিয়রের গল্প

আটকে রাখলে দেখে, তার মনে ভারি আঘাত লাগল। মনের দুঃখে সে দিন দিন শুকিয়ে যেতে লাগল এবং আহাৰ-নিদ্রাও প্রায় ত্যাগ করল; শেষে সবাই বুঝতে পারলেন, মায়ের জন্তে ভেবে ভেবেই সে মারা যাবে। রাণীকে গারদে পূরে, সত্যি তিনি অসতী কিনা জানবার জন্তে, রাজা ক্লিওমিনিস ও ডিয়ন বলে দু'জন পারিষদকে আপোলোর মন্দিরের দৈববাণী শুনতে ডেল্‌ফিতে * পাঠিয়ে দিলেন।

অল্পদিন কাৰাগারে থাকবার পরেই রাণীর সুন্দর একটি মেয়ে হ'ল। তার মুখ দেখে এত দুঃখেও তিনি মনে অনেকটা শান্তি পেলেন। তার মুখ পানে চেয়ে রাণী বললেন, “বাছারে, তোর মত নিষ্পাপ হ'য়েও আজ আমি বন্দিনী!”

এন্টিগোনাস নামে সিসিলিতে একজন সম্ভ্রান্ত ভদ্রলোক ছিলেন। তাঁর স্ত্রী পলিনা রাণীর একজন প্রিয় সখী। রাণীকে তিনি প্রাণের চাইতেও ভালবাসতেন, আর তাঁর মনটাও ছিল খুব উদার। রাণীর মেয়ে হওয়ার খবর পেয়ে তিনি কাৰাগারে গিয়ে রাণীর পরিচারিকা এমিলিয়াকে

* ডেল্‌ফি প্রাচীন গ্রীসের একটি নগর—সেখানকার আপোলোর মন্দিরের অস্ত্র বিখ্যাত। বহুলোক নিজেদের মনোগত প্রশ্নের উত্তর শুনবার জন্য সেখানে উপস্থিত হ'ত।

শীতের গল্প

বল্লেন, “তুমি রাণীকে গিয়ে বল যে, তিনি তাঁর মেয়েটিকে আমার কাছে দিয়ে বিশ্বাস পেলে আমি তাকে রাজার কাছে নিয়ে যেতে পারি ; হয়ত এই শিশুকে দেখলে তাঁর মনটা একটু নরম হ’তে পারে।” এমিলিয়া বল্লে, “তা, আপনার এ-কথা আমি রাণীকে বলতে পারি। তিনিও আজই বল্ছিলেন, যদি তাঁর কোন বন্ধু সাহস করে’ এই মেয়েটিকে রাজার কাছে নিয়ে যেতে পারতেন, তবে বড়ই ভাল হ’ত।” পলিনা বল্লেন, “তাঁকে ব’লো, আমি তাঁর হ’য়ে নির্ভয়ে রাজাকে সব কথাই বলবো।” এমিলিয়া শুনে খুব খুসী হ’ল, বল্লে, “আমাদের রাণীকে আপনি খুবই স্নেহ করেন ; ভগবান আপনার মঙ্গল করুন।” এমিলিয়া গিয়ে রাণীকে সব কথা বল্লে। তিনি খুসী হ’য়ে মেয়েটিকে পলিনার কাছে পাঠিয়ে দিলেন—তাঁর ভয় ছিল, হয়ত কেউ মেয়েটিকে তার বাপের কাছে নিয়ে যেতে সাহস করবে না !

রাজা হয়ত রাগ করবেন, এই ভেবে পলিনার স্বামী তাঁকে নিবৃত্ত করবার চেষ্টা করা সত্ত্বেও তিনি রাজসভায় উপস্থিত হ’য়ে নবজাত শিশুটিকে রাজার পায়ের কাছে শুইয়ে দিলেন। রাণীর হ’য়ে রাজাকে অনেক বুঝিয়ে বল্লেন এবং তাঁর নিশ্চয়তার জন্যে বেশ দু’কথা শুনিয়া দিয়ে নির্দোষ রাণী ও তাঁর ছোট মেয়েটির প্রতি সদয় হ’তে অনেক অনুনয়

শেক্সপিয়রের গল্প

বিনয় করলেন। পলিনার স্পর্শ কথায় রাজার রাগ আরও বেড়ে গেল। তাঁর সামনে থেকে পলিনাকে নিয়ে যেতে তিনি এন্টিগোনাসকে আদেশ করলেন। পলিনা যাবার সময় শিশুটিকে, তার বাপের পায়ের কাছেই রেখে গেলেন। ভাবলেন, যখন শুধু শিশুটি নিকটে থাকবে, তখন তার মুখের পানে নিশ্চয়ই তাকাবেন এবং বেচারীর উপর তাঁর মায়াও হ'বে। কিন্তু সরলা পলিনা ভুল বুঝেছিলেন। তিনি ওখান থেকে চ'লে যেতেই নির্ম্ম লিয়ন্টিস পলিনার স্বামী এন্টিগোনাসকে ডেকে বল্লেন, “এখনই এটাকে নিয়ে গিয়ে দূরে সমুদ্রের ধারে কোন জন-মানবশূন্য স্থানে ফেলে দিয়ে এস।” এন্টিগোনাস ত আর ক্যামিলো নন, রাজার আদেশ তিনি কড়ায়-গণ্ডায় পালন করলেন, তখনই তিনি মেয়েটিকে জাহাজে ক'রে বা'র সমুদ্রে নিয়ে গেলেন—মনে করলেন, সামনে যেখানে জন-প্রাণীহীন স্থান পাবেন সেখানেই তাকে ফেলে দিয়ে আসবেন।

হারমিয়নি দোষী, এ ধারণা রাজার মনে এমনি গেঁথে গিয়েছিল যে, ক্লিওমিনিস ও ডিয়নের ডেল্ফি থেকে দৈববাণী শুনে ফিরে আসা পর্য্যন্তও তাঁর সবুর সইল না। মেয়ের জন্য রাণীর শোকের কিছুমাত্র কর্ম্মতি না হ'তেই রাজা

শীতের গল্প

প্রকাশ্য দরবারে পারিষদবর্গের সামনে তাঁর বিচারের আয়োজন করলেন। যখন পারিষদগণ, বিচারকগণ এবং রাজ্যের সমস্ত গণ্যমান্য ব্যক্তিগণ রাজসভায় জড় হয়েছেন, আর সেই হতভাগিনী হারমিয়নি নিজের প্রজাগণের কাছে বিচারপ্রার্থিনী হ'য়ে, বন্দি অবস্থায় দাঁড়িয়ে আছেন, ঠিক সেই সময় ক্লিওমিনিস ও ডিয়ন রাজসভায় প্রবেশ ক'রে সিলমোহর করা ডেল্‌ফর দৈববাণী রাজার হাতে দিলেন। লিয়ন্টিস মোহর ভেঙ্গে ফেলে সেই দৈববাণী চোঁচিয়ে পড়তে বললেন। তাতে লেখা ছিল—“হারমিয়নির কোন অপরাধ নেই, পলিক্সেনিস নিষ্পাপ, ক্যামিলো রাজভক্ত প্রজা, লিয়ন্টিস অত্যাচারী রাজা। যা' হারিয়ে গেছে তা' ফিরে না পেলো, রাজাকে উত্তরাধিকারীহীন হ'য়েই থাকতে হ'বে।” রাজার কিন্তু এতে মোটেই বিশ্বাস হ'ল না, তিনি বললেন, এ-সব রাণীর বন্ধুবান্ধবদের কারসাজি; আর বিচারকদের রাণীর বিচার আরম্ভ করতে আদেশ করলেন। রাজা যখন এই সব বলছেন, সেই সময় একজন লোক সেখানে এসে বলে, “রাজকুমার ম্যামিলিয়স মায়ের বিচার হ'বে শুনে শোকে, দুঃখে ও অপমানে হঠাৎ মারা গেছেন।”

হারমিয়নি তাঁর প্রাণাধিক পুত্রের মৃত্যুসংবাদে একেবারে মূর্ছিত হ'য়ে পড়লেন। লিয়ন্টিসও এতে খুব মর্মান্বিত হ'লেন,

শেক্সপিয়রের গল্প

আর তখন তাঁরও রাণীর জন্যে কষ্ট হতে লাগল। তিনি পলিনা ও রাণীর পরিচারিকাদের তাঁকে নিয়ে গিয়ে শুশ্রূষা করতে বল্লেন। একটু পরেই পলিনা ফিরে এসে রাজাকে জানালেন যে, রাণী মারা গেছেন।

রাণীর মৃত্যুসংবাদে তাঁর প্রতি নিজের অযথা নিষ্ঠুরতার কথা স্মরণ ক'রে লিয়ন্টিসের মনে খুবই আত্মগ্লানি উপস্থিত হ'ল। যখন মনে হ'ল তাঁরই দুর্ব্যবহারে রাণীর হৃদয় ভেঙ্গে গিয়েছিল, তখন তাঁর বিশ্বাস হ'ল যে, রাণী বাস্তবিকই কোন দোষে দোষী ছিলেন না। রাজকুমার ম্যামিলিয়স মারা গেছেন, এখন “যা হারিয়ে গেছে তা ফিরে না পেলো”—অর্থাৎ মেয়েকে না পেলো—তাঁকে “উত্তরাধিকারীহীন হ'য়েই থাকতে হবে,” ডেল্ফির দৈববাণীর এই সব কথা মনে পড়ায় তিনি বেশই বুঝলেন যে, সেগুলো মিথ্যা নয়। তখন ভাবতে লাগলেন, সমস্ত রাজ্য নিয়েও যদি তাঁর হারানো মেয়েটিকে কেউ এনে দিত! তাঁর অনুতাপের আর সীমা রইল না। এই ভাবে শোকে ও দুঃখে রাজার দিন কাটতে লাগল।

এদিকে যে জাহাজে এন্টিগোনাস রাজকন্যাকে নিয়ে যাচ্ছিলেন, ঝড়ে তাকে ঠেলতে ঠেলতে লিয়ন্টিসের বন্ধু পলিক্সেনিসের রাজ্য বোহেমিয়াতে নিয়ে ফেলল।

শীতের গল্প

এন্টিগোনাস ত তা' জানেন না, তিনি সেইখানে রাজকন্যাকে ফেলে রেখে চ'লে এলেন। এন্টিগোনাস সিসিলিতে ফিরে এসে যে লিয়ন্টিসকে ঐ খবর দিবেন তা' আর হ'য়ে উঠল না। জাহাজে ফিরে যাবার পথে বন থেকে একটা ভালুক বেরিয়ে এসে তাঁকে টুকুরো টুকুরো ক'রে ফেলে। দুর্ঘটমতি রাজার হুকুম পালন করার উপযুক্ত ফলই ফলল।

মেয়েটির গায়ে দামী দামী পোষাক ও জড়োয়া গয়না ছিল, কারণ হারমিয়নি তাকে রাজার কাছে পাঠাবার সময় বেশ সাজিয়ে গুজিয়ে পাঠিয়েছিলেন। এন্টিগোনাস মেয়েটিকে সেখানে ফেলে রেখে আসবার সময় এক টুকুরা কাগজে 'পার্ডিটা' এই নামটি লিখে আর তা'তে তার উচ্চবংশে জন্মের ও দুর্দৃষ্টির একটু আভাস দিয়ে তার পোষাকের সঙ্গে এটে দিয়েছিলেন। এক গরিব মেঘ-পালক পার্ডিটাকে দেখতে পেলে এবং যত্ন ক'রে তাকে বাড়িতে স্ত্রীর কাছে নিয়ে গেল। তার স্ত্রীও পরম যত্নে তাকে মানুষ করতে লাগল। তারা বড় গরিব, তাই গয়নাগুলো লুকোবার লোভ সামলাতে পারলে না। পাছে লোকে টের পায়, কোথা থেকে হঠাৎ তাদের এত টাকা-পয়সা হ'ল, সেই ভয়ে তারা সে জায়গা ছেড়ে অন্য স্থানে

শেক্সপিয়রের গল্প

গিয়ে অনেকগুলো মেষ কিনে ঘর-সংসার পেতে বসল। পার্‌ডিটাকে সে নিজের মেয়ের মতই মানুষ করতে লাগলো। পার্‌ডিটাও জানতো যে, সে ঐ মেষ-পালকেরই মেয়ে।

বয়সের সঙ্গে সঙ্গে পার্‌ডিটার সৌন্দর্য্য দিন দিন বাড়তে লাগল। লেখাপড়া বেশী হ'ল না; মেষ-পালকের মেয়ের যেমন হ'য়ে থাকে তেমনি হ'ল। তবু তার মা রাণী হারমিয়নির গুণ আর স্বভাব-সৌন্দর্য্য পার্‌ডিটার মধ্যে এমনি ভাবে ফুটে উঠেছিল যে, চালচলন দেখে মনে হ'ত যেন সে রাজার ঘরেরই মেয়ে।

বোহেমিয়ার রাজা পলিক্সেনিসের একটি মাত্র ছেলে; তাঁর নাম ফ্লোরিজেল। একদিন শিকার করতে গিয়ে রাজপুত্র সেই মেঘপালকের বাড়ীর কাছে তার পালিতা কন্যা পার্‌ডিটাকে দেখতে পেলেন। পার্‌ডিটার সৌন্দর্য্য, নম্রতা ও রাজার মেয়ের মত চালচলন দেখে ফ্লোরিজেলের তাকে বিয়ে করতে ইচ্ছে হ'ল। সেই থেকে তিনি সামান্য একজন ভদ্রলোক সঙ্গে, ডোরিক্লিস ব'লে নিজের পরিচয় দিয়ে, প্রায়ই সেই বুড়ো মেঘপালকের বাড়ীতে যেতে লাগলেন।

ফ্লোরিজেল প্রায়ই রাজধানীতে থাকেন না দেখে

শীতের গল্প

পলিক্সেসেনিসের মনে কেমন সন্দেহ হ'তে লাগল। পেছনে লোক লাগিয়ে তিনি ছেলের গতিবিধির কথা সবই জানতে পারলেন। পলিক্সেসেনিস তখন তাঁর জীবনদাতা ক্যামিলোকে সঙ্গে ক'রে একদিন সেই মেষপালকের বাড়ীতে এসে উপস্থিত হ'লেন। সেদিন সেখানে একটা উৎসব হচ্ছিল। তাঁরা অপরিচিত হ'লেও মেষপালক তাঁদের সাদরে অভ্যর্থনা ক'রে উৎসবে যোগ দিতে অনুরোধ করল। সেখানে তখন খুব আমোদ চলছে। টেবিলে রকম রকম সব খাবার সাজান হয়েছে; অবস্থানুযায়ী আয়োজনেরও ত্রুটি হয় নি। ছোট ছোট ছেলেমেয়েরা বাড়ীর সামনে সবুজ মাঠের উপর আনন্দে ছুটোছুটি ক'রে খেলা করছিল, আর তাদের চেয়ে যারা বয়েসে একটু বড় তারা দোরগোড়ায় এক ফিরিওয়ালার কাছ থেকে নানা-রকমের সামান্য সামান্য উপহারের জিনিস সব কিনছিল। ফ্লোরিজেলও সেদিন সেখানে ছিলেন। তিনি আর পার্ভিটা কিন্তু এ-সব আমোদের দিকে মন না দিয়ে নিরিবিলি একটি কোণে ব'সে বেশ মনের সুখে গল্প করছিলেন।

রাজা এমনি ছদ্মবেশ ধরেছিলেন যে, তাঁর ছেলেরও সাধ্য ছিল না তাঁকে চিন্তে পারেন। তাই স্বচ্ছন্দে খুব কাছে এগিয়ে গিয়ে কাথাবার্তা সব শুনতে লাগলেন। তাঁর

শেঙ্গুপিয়রের গল্প

ছেলের সঙ্গে পার্ভিটাকে এমন সহজ ও সুন্দর ভাবে কথাবার্তা বলতে শুনে রাজা ভারি আশ্চর্য্য বোধ করতে লাগলেন । মেয়েটিকে দেখে ক্যামিলোকে বললেন, “গরিবের ঘরে এর চেয়ে সুন্দরী মেয়ে আমি আর কখনো দেখি নি । একে যতই দেখছি ততই যেন মনে হচ্ছে, এ কোন বড় ঘরের মেয়ে ।” ক্যামিলো বললেন, “সত্যি মহারাজ, এ যেন গোবরে পদ্মফুল ফুটেছে ।” রাজা তখন মেঘপালককে ডেকে ফ্লোরিজেলকে দেখিয়ে বললেন, “মশায়, ঐ সুন্দর যুবকটি কে ?” মেঘপালক উত্তর করল, “ওর নাম ডোরিক্লিস, ও আমার মেয়েকে বিয়ে করতে চায় । আমার মেয়েরও যে এ বিয়েতে ইচ্ছে আছে তাও জানতে পেরেছি । ডোরিক্লিস কিন্তু স্বপ্নেও ভাবতে পারে না যে, পার্ভিটাকে বিয়ে করতে পারলে কি সব জিনিস পাবে !”— তার মানে সেই সব জড়োয়া গয়না । মেঘ প্রভৃতি কিনে যা’ বাকি ছিল, সে-সবই বিয়ের সময় পার্ভিটাকে যৌতুক দেবে বলে মেঘপালক যত্ন ক’রে তুলে রেখে দিয়েছিল ।—তখন পলিক্সেনিস ছেলেকে ডেকে বললেন, “ওহে বাপু, চারদিকের আমোদ-প্রমোদে দেখছি তোমার মন নেই । শুনছি, তুমি এই মেয়েটিকে বিয়ে করতে চাও । ফিরিওয়ালা চ’লে গেল, কিন্তু তুমি ত একে সামান্য একটা পুতুলও কিনে দিলে না !” রাজকুমার

শীতের গল্প

বুঝতে পারেন নি যে, তিনি তাঁর বাপের সঙ্গে কথা বলছেন । তিনি বলেন, “মশায়, এ-সব তুচ্ছ জিনিস পার্‌ডিটা পছন্দ করে না । বিয়ে হ’লে আমি সবই ত ওকে দেব । পার্‌ডিটা আমার কাছে যে উপহার চায়, তা’ আমার এই হৃদয়ের মধ্যে লুকান রয়েছে ।” তার পর পার্‌ডিটার দিকে ফিরে বলেন, “পার্‌ডিটা শোন, আমি ঈশ্বরের নাম নিয়ে বলছি, তোমাকে বিয়ে করব—আর এই বুড়ো ভদ্রলোক আমার কথার সাক্ষী থাকলেন ।” এই ব’লে রাজাকে বলেন, “মশায়, আমার অঙ্গীকার শুনলেন ত ?” রাজা তৎক্ষণাৎ তাঁর ছদ্মবেশ ফেলে দিয়ে ফ্লোরিজেলকে বলেন, “আর তুমিও শোন, তোমার এ অঙ্গীকার মত কাজ কখনো হ’তে পারবে না ।” ছেলে নীচবংশে বিয়ে করতে চেয়েছিলেন ব’লে তাঁকে পলিক্সেনিস খুব তিরস্কার করলেন । পার্‌ডিটাকেও ‘ছোটলোকের নেয়ে,’ ‘চাষার মেয়ে’ এই রকম যা-মুখে-এল তাই ব’লে গালাগাল দিলেন । আর ভয় দেখালেন যে, আবার যদি তাঁর ছেলেকে তার কাছে আসতে দেয়, তবে তাকে ও তার বাপকে নিষ্ঠুরভাবে মেরে ফেলবেন । এই ব’লে রাজকুমারকে নিয়ে আসতে ক্যাগিলোকে আদেশ করে রাজা খুব রাগভরে সেখান থেকে চ’লে গেলেন ।

পার্‌ডিটা হাজার হ’লেও রাজারই ত মেয়ে, সহ্য হ’বে

শেখাপিয়রের গল্প

কেন ? পলিক্সেনিস চ'লে গেলে তিনি বল্লেন, “আমাদের যা' হ'বার তা' ত হ'লই । আমি কিন্তু মোটেই ভয় পাইনি । দু'-একবার মনে হচ্ছিল, মুখের উপর ব'লে ফেলি, রাজা হ'লেও তাঁর অহঙ্কার কর'বার কিছুই নেই, ভগবানের চোখে তিনিও যেমন আমরাও তেমন ।” শেষে খুব দুঃখভরে ফ্লোরিজেলকে বল্লেন, “আজ আমার সুখের স্বপ্ন ভেঙ্গে গেল—রাণীগিরিতে আমার কাজ নেই, আপনি আমাকে ভুলে যান, আমার অদৃষ্টে যা' আছে তাই হ'বে ।”

সহৃদয় ক্যামিলো পার্‌ডিটার তেজ ও সুসঙ্গত ব্যবহার দেখে মুগ্ধ হ'লেন । আরো যখন বুঝলেন, রাজপুত্র পার্‌ডিটাকে বিয়ে কর'বেনই, তখন তিনি এদের দু'জনের উপকার ও সঙ্গে সঙ্গে নিজেরও একটা মতলব হাসিল কর'বার উপায় স্থির কর্লেন । ক্যামিলো আগেই জেনেছিলেন যে, এখন সিসিলির রাজা লিয়ন্টিস নিজের অন্যায় কাজের জন্যে সত্যি সত্যি অনুতপ্ত হয়েছেন । রাজা পলিক্সেনিসের প্রিয় বন্ধুরূপে পরমসুখে দিন কাটালেও, ক্যামিলোর এখন একবার নিজের দেশে ফিরে গিয়ে লিয়ন্টিসকে দেখতে বড়ই ইচ্ছা হ'ল । পার্‌ডিটা ও ফ্লোরিজেলকে তিনি বল্লেন, “তোমরা আমার সঙ্গে সিসিলি দেশে চল । আমি নিশ্চয় ক'রে বল্ছি, সেখানে লিয়ন্টিস তোমাদের আশ্রয় দিবেন । তার পর

শীতের গল্প

যাতে রাজা পলিক্সেনিস তোমাদের ক্ষমা করেন আর বিয়েতে মত দেন আমি ব'লে ক'রে তার চেষ্টা করব।” তাঁরা অত্যন্ত আহ্লাদের সঙ্গে এই প্রস্তাবে সন্মত হ'লেন। ক্যামিলো তাঁদের পালাবার সমস্ত বন্দোবস্ত করলেন। বুড়ো মেঘপালক ও তার স্ত্রীকেও সাথে ক'রে নিয়ে গেলেন। যাবার সময় মেঘপালক পার্ভিটার বাকী গয়নাগুলো, তাঁর ছেলেবেলার পোষাক-পরিচ্ছদ আর জামায় আটকান সেই কাগজটুকু সঙ্গে ক'রে নিয়ে গেল।

ফ্লোরিজেল, পার্ভিটা, ক্যামিলো আর সেই মেঘপালক ও তার স্ত্রী জাহাজে চ'ড়ে নিরাপদে লিয়ন্টিমের রাজ্যে গিয়ে পৌঁছলেন। রাণী হারমিয়নি ও তাঁর সেই ছোট মেয়েটির শোকে রাজা তখনও খুব কাঁতর। এতদিন পরে ক্যামিলোকে দেখে রাজা খুব খুসী হ'লেন; বন্ধুপুত্র ফ্লোরিজেলকেও তিনি মহা সমাদরে অভ্যর্থনা করলেন। পার্ভিটাকে যুবরাজ তাঁর পত্নী ব'লে পরিচয় দিয়েছিলেন। এখন এই পার্ভিটা, কি যেন কেন, সকল সময়ের জন্টেই রাজার মন টানতে লাগলেন। রাণী হারমিয়নির সঙ্গে এর অনেকটা সাদৃশ্য দেখে রাজার শোক আবার নূতন হ'য়ে উঠল—তিনি ভাবতে লাগলেন, তাঁর মেয়েটিকে যদি তিনি নিষ্ঠুর ভাবে ফেলে না দিতেন, তবে সেও হয়ত আজ

শেঙ্গপিয়রের গল্প

এমনটি-ই হ'ত। শেষে ফ্লোরিজেলকে বলেন, “কুমার, নিজ দোষে আজ আমি তোমার বাপের বন্ধুত্ব ও সঙ্গ হারিয়েছি। এখন আবার আমার তাঁকে দেখতে ইচ্ছে হ'চ্ছে।”

মেঘপালক যখন শুন্নে, রাজা পার্ভিটাকে খুব স্নেহের চক্ষে দেখছেন আর এই রাজারই এক মেয়েকে শিশুকালে ফেলে দেওয়া হয়েছিল, তখন কত দিন আগে কেমন ক'রে সে পার্ভিটাকে পেয়েছিল, কত দামী দামী জড়োয়া গয়না আর দামী দামী কাপড় তার সঙ্গে ছিল—এই সব তার মনে পড়তে লাগল। এখন এ-সব থেকে সে বুঝলে, এই পার্ভিটা আর রাজা লিয়ন্টিসের সেই হারানো মেয়ে এক না হ'য়েই যায় না।

ফ্লোরিজেল, পার্ভিটা, ক্যামিলো, পলিনা প্রভৃতির সামনে মেঘপালক রাজাকে সব খুলে বলে। কেমন ক'রে একদিন মেয়েটিকে পথের মাঝে কুড়িয়ে পেয়েছিল, কেমন ক'রে চোখের সামনেই এক ভালুক এসে এন্টিগোনাসের উপর প'ড়ে তাঁকে টুকুরো টুকুরো ক'রে ফেলেছিল, এক এক ক'রে সব কথাই বলে। যে জামাটা মেয়েটিকে পরানো ছিল সেই জামা বের ক'রে দেখালে পলিনা চিন্লেন, এই জামা রাণী হারমিয়নি তাকে পরিয়ে দিয়েছিলেন। তার

শীতের গল্প

পর, সেই সব জড়োয়া গয়না বের ক'রে দেখালে পলিনা তাও চিন্লেন—বল্লেন, “এই হার রাণী নিজ হাতে মেয়ের গলায় পরিয়ে দিয়েছিলেন।” শেষে মেঘপালক সেই কাগজখানা দিলে পলিনা তাঁর স্বামীর হাতের লেখাও চিন্লেন। পার্‌ডিটা যে লিয়ন্টিসেরই সেই মেয়ে এখন আর এতে কোন সন্দেহ-ই রইল না। পলিনার যে তখন মনের কি ভীষণ অবস্থা তা' ব'লে বুঝান যায় না ; এক দিকে স্বামীর মৃত্যু-সংবাদে দারুণ মনঃকষ্ট, আবার অন্যদিকে রাজার হারানো মেয়ে ফিরে পাওয়ার আনন্দ। লিয়ন্টিস যখন জান্লেন, পার্‌ডিটা তাঁরই মেয়ে, তখন হারমিয়নি আজ বেঁচে নেই মনে ক'রে তিনি শোকাবুল হ'লেন— তাঁর তখন এত বেশী কষ্ট হ'তে লাগল যে, বহুক্ষণ পর্যন্ত তিনি আর কোন কথাই বলতে পার্লেন না, শুধু নীরবে চোখের জল ফেলতে লাগ্লেন।

এই সুখদুঃখের প্রবাহের মাঝে পলিনা ব'লে উঠ্লেন, “মহারাজ, আমি ইটালী দেশের বিখ্যাত শিল্পী জুলিও রোমানিওকে দিয়ে মহারাণীর এমন একটি প্রতিমূর্ত্তি তৈরী করিয়েছি যে, আপনি যদি অনুগ্রহ ক'রে আমার বড়ীতে গিয়ে সেটিকে একবার দেখেন, তা' হ'লে নিশ্চয়ই মনে করবেন, জীবন্ত হারমিয়নি আপনার সামনে দাঁড়িয়ে

শেক্সপিয়রের গল্প

আছেন।” তখন সকলেই পলিনার বাড়ীতে গেলেন। রাজা ব্যস্ত, কখন তাঁর প্রিয়তমা রাণীর প্রতিমূর্ত্তিখানি দেখবেন। আর পার্‌ডিটা, আতা, মাকে ত কখনও দেখেন নি! তাই কেমন তাঁর চেহারা ছিল দেখতে উৎকণ্ঠিত।

তার পর পলিনা যখন সেই প্রতিমূর্ত্তির সামনে থেকে পর্দাখানা টেনে নিলেন, তখন রাণী হারমিয়নির সঙ্গে তার আশ্চর্য্য সাদৃশ্য দেখে রাজা শোকে একেবারে অধীর হ’য়ে পড়লেন; অনেকক্ষণ পর্য্যন্ত নির্বাক্ ‘ও নিশ্চল হ’য়ে রইলেন।

পলিনা বল্লেন, “মহারাজ, আপনাকে নারব দেখে বুঝতে পাচ্ছি যে, আপনি খুব বিস্মিত হয়েছেন। এখন বলুন ত এই প্রতিমূর্ত্তি ঠিক মহারাণীর মতই হয়েছে কিনা?” রাজা নিজেকে একটু সামলে নিয়ে বল্লেন, “ঠিক বটে, যখন প্রথম তাকে দেখেছিলুম তখন সে এমনি ভাবেই দাঁড়িয়েছিল। কিন্তু পলিনা, এই মূর্ত্তি দেখে যে বয়েস মনে হচ্ছে, তখন তার অতটা বয়েস হয় নি।” পলিনা উত্তর করলেন, “এতেই বুঝুন মহারাজ, শিল্পীর বাহাদুরী কত! আজ রাণী হারমিয়নি বেঁচে থাকলে তিনি দেখতে যেমনটি হ’তেন, শিল্পী মূর্ত্তিটিকে ঠিক তেমনটি ক’রেই তৈরী করেছেন। এখন তা’ হ’লে একটু সরুন, মহারাজ, পর্দাটা টেনে দি,

শীতের গল্প

নইলে হয়ত এখনই আপনি ভাববেন, মূর্তি বুঝি নড়্ছে।” রাজা বল্লেন, “না—না, পর্দা টেনে দিও না পলিনা! ক্যামিলো, মূর্তিটি নিঃশ্বাস ফেলে ব’লে বোধ হচ্ছে না? চোখ দেখে মনে হচ্ছে যেন নড়্ছে।” পলিনা বল্লেন, “মহারাজ, পর্দাটা ফেলে দিতে দিন, আনন্দে আপনি বিহ্বল হ’য়ে পড়েছেন—ভাবছেন, এ বুঝি জীবন্ত হারমিয়নি।” রাজা বল্লেন, “পলিনা, এ ভুল যেন আমার জীবনেও না যায়। এর নিঃশ্বাস এখনও যেন আমার গায়ে লাগ্ছে। এমন শিল্পী কে আছে পলিনা, যে পাথরের ভিতর নিঃশ্বাস এনে দিতে পারে? তোমরা আমায় পাগল ব’লো না—আমি এ মূর্তিকে আলিঙ্গন করব।” পলিনা বল্লেন, “না—না, অমন করবেন না মহারাজ, মূর্তির রং এখনও শুকোয় নি, আপনার গায়ে রং লেগে যাবে। সরুন, পর্দা ফেলি।” রাজা বল্লেন, “কি বল্ছ পলিনা? কখনো এ পর্দা ফেলতে দেবো না।”

এতক্ষণ পর্যন্ত পার্ভিটা হাঁটু গেড়ে ব’সে অবাক হ’য়ে মায়ের অতুলনীয় রূপ দেখ্ছিলেন, বাপের কথার সঙ্গে সঙ্গে এখন তিনিও ব’লে উঠ্লেন, “হা, যতদিন পর্যন্ত মাকে দেখে দেখে আমার তৃপ্তি না হ’বে ততদিন এ পর্দা ফেলে কাজ নেই।”

শেক্সপিয়রের গল্প

পলিনা রাজাকে বল্লেন, “মহারাজ, আপনি স্থির হ’ন, আমি পর্দা ফেলি—নয়ত আরো অদ্ভুত ব্যাপার দেখতে প্রস্তুত হ’ন। আমি এমন করতে পারি যে, ঐ মূর্তি ন’ড়ে বেড়াবে, এখনি ঐখান থেকে নেমে এসে আপনার হাত ধ’রে অভ্যর্থনা করবে। তা’ হ’লে আপনি হয়ত বলবেন, আমি ডাইনি মন্তুর জানি, কিন্তু সত্যি বলছি সে-সব আমি কিছু জানি না।”

রাজা খুব আশ্চর্যান্বিত হ’য়ে বল্লেন, “একে দিয়ে তুমি যা’ করাবে তা’ আমি দেখব, যা’ বলাবে তা’ আমি শুনব। যদি সত্যি একে হাঁটাতে পার, তবে কথা বলাতেও পারবে।”

পলিনা তখন নিজের তৈরী কয়েকটি গান সখীদের গাইতে বল্লেন। গানের সঙ্গে সঙ্গে সেই মূর্তি উপর থেকে নেমে এসে লিয়ন্টিসের গলা জড়িয়ে ধরল। সকলে ত অবাক! মূর্তি তখন কথা বলল, ভগবানের কাছে স্বামীর আর মেয়ের জন্যে প্রার্থনা করতে লাগল।

কিন্তু আশ্চর্য্য হ’বার এতে কিছুই নেই। সেই মূর্তি আর কিছু নয়, স্বয়ং হারমিয়নি। পলিনা রাণীর মৃত্যু সম্বন্ধে রাজাকে মিথ্যা সংবাদ দিয়েছিলেন, কারণ এ ছাড়া তাঁকে বাঁচাবার অন্য কোন উপায় ছিল না। তার

শীতের গল্প

পর থেকে রাণী বরাবর পলিনার বাড়ীতেই ছিলেন। কিন্তু তিনি যে বেঁচে আছেন, পার্‌ডিটাকে ফিরে পাবার আগে পর্যন্ত হারমিয়নি রাজাকে তা' জানাতে স্বীকার হ'ন নি। রাজা তাঁকে যত কষ্ট দিয়েছিলেন তার জন্যে তিনি বহুপূর্বেই তাঁকে ক্ষমা করেছিলেন, কিন্তু মেয়ের প্রতি রাজার নিষ্ঠুর ব্যবহারের কথা তিনি কখনো ভুলতে পারেন নি।

তাঁর রাণীকে ও হারানিধি মেয়েকে ফিরে পেয়ে লিয়ন্টিসের আর আনন্দের—সুখের সীমা রইল না। সকলের মনেই আনন্দ আর ধরে না।

অমন দুর্দশার দিনেও রাজকুমার ফ্লোরিজেল তাঁদের মেয়েকে ভালবাসতেন জেনে রাজা ও রাণী দু'জনেই তাঁকে প্রাণ খুলে আশীর্বাদ করলেন। মেঘপালক তাঁদের কন্যাকে রক্ষা করেছিল, সেজন্য তাকেও তাঁরা যথেষ্ট ধন্যবাদ দিলেন। ক্যামিলো ও পলিনার ত আজ আনন্দের সীমাই নাই। এতকাল প্রাণ ঢেলে তাঁরা রাজার জন্যে কত কষ্ট স্বীকার করেছেন, আজ চোখের সামনে তাঁরা তাঁদের পরিশ্রম সার্থক হ'তে দেখলেন, একি কম সুখের কথা ?

আজকের আনন্দে কিছুমাত্র খুঁত রাখা যেন ভগবানের

শেক্সপিয়রের গল্প

ইচ্ছা নয়, সেই জন্মেই যেন পলিক্‌সেনিসও তখন সেখানে এসে উপস্থিত হ'লেন। পলিক্‌সেনিস বেশই জানতেন, ইদানীং ক্যামিলো তাঁর স্বদেশ সিসিলিতে ফিরে যাবার জন্মে উদ্‌গ্রীব হয়েছিলেন; তাই রাজপুত্র ও ক্যামিলোকে না দেখে প্রথমেই বুকুতে পেরেছিলেন যে, তাঁরা নিশ্চয়ই সিসিলিতে গেছেন। কিছুমাত্র দেরী না ক'রে তিনি সিসিলি রওনা হ'লেন ও ঠিক সময়েই সেখানে এসে পৌঁছলেন।

পলিক্‌সেনিস সকলের আনন্দে খুব আহলাদের সাথেই যোগ দিলেন। তিনি লিয়ন্টিসকে এর পূর্বেই ক্ষমা করেছিলেন। আবার দু' বন্ধুতে সেই ছেলেবেলার মত মন খুলে মিশতে লাগলেন। পলিক্‌সেনিসের এখন পার্‌ডিটার সঙ্গে ফ্লোরিজেলের বিয়েতে অমতের কোন কারণই থাকল না—তিনি তাঁদের বিয়েতে অন্তর থেকে অনুমতি দিলেন; পার্‌ডিটা ত আর এখন যে-সে নয়, রাজারই মেয়ে। খুব জাঁক-জমকের সঙ্গে ফ্লোরিজেল ও পার্‌ডিটার বিয়ে হ'য়ে গেল।

পরমগুণবতী, সতী-সাধবী রাণী হারমিয়নির দুঃখের পালা এত দিনে শেষ হ'ল; এখন তাঁর সোনার সংসার—তিনি স্বামী ও মেয়ে-জামাই নিয়ে সুখে কাল কাটাতে লাগলেন।

রোমিও-জুলিয়েট

ইটালী-দেশে ভেরোনা নামে একটি নগর আছে। বহুদিন পূর্বে সেখানে ক্যাপিউলেট ও মণ্টেগ নামে দু'টি বিশেষ প্রতিপত্তিশালী জমিদার পরিবার বাস করতেন। এই ক্যাপিউলেট ও মণ্টেগদের মধ্যে পুরুষানুক্রমে বিষম শত্রুতা চ'লে আসছিল। সে বিদ্বেষের ভাব ক্রমে এত বেড়ে গিয়েছিল যে, শেষে উভয় পরিবারের জ্ঞাতিকুটুম্ব, এমন কি চাকরবাকর পর্যন্ত, পরস্পরের শত্রু হ'য়ে দাঁড়িয়েছিল। এর ফলে, পথেঘাটে দেখা হ'লেও এদের মধ্যে একটা মারামারি রক্তারক্তি না হ'য়ে যেত না।

একদিন রাত্রে বুড়ো ক্যাপিউলেট-কর্ত্তা তাঁর বাড়ীতে এক মহাভোজের আয়োজন করলেন। মণ্টেগরা বাদে ভেরোনার যত সম্ভ্রান্ত ভদ্রলোক ও ভদ্রমহিলা সবাই এই ভোজে উপস্থিত হয়েছিলেন। ক্যাপিউলেট-কর্ত্তাও অতিথি অভ্যাগত সবাইকে সাদর অভ্যর্থনায় ও সুমিষ্ট ব্যবহারে পরম আপ্যায়িত ক'চ্ছিলেন। নিমন্ত্রিত দলের মধ্যে সুন্দরী রোজালিনও ছিলেন। এই রোজালিনকে বুড়ো মণ্টেগ-কর্ত্তার ছেলে রোমিও খুব ভালবাসতেন। কিন্তু রোজালিন

শেক্সপিয়রের গল্প

রোমিওকে ভালবাসা ত দূরের কথা, বরং ঘৃণার চোখেই দেখতেন—এমন কি ভালমুখে কথাটি পর্য্যন্ত কইতেন না। এতেও রোমিও রোজালিনকে ভুলতে পারেন নি। তিনি লোকের সাথে মেলামেশা করা এক রকম ছেড়েই দিয়েছিলেন, আহারনিদ্রা ত্যাগ ক'রে নিরিবিলি ব'সে ব'সে সব সময় কেবল রোজালিনের কথাই ভাবতেন। রোমিওর প্রিয়বন্ধু বেনভোলিও রোমিওকে নানা রকমের লোক ও বিদুষী সুন্দরীদের মধ্যে টেনে এনে এবং তাঁদের সাথে মিশতে বাধ্য ক'রে, যাতে তিনি রোজালিনকে ভুলে যান সেজন্মে চেষ্টার ক্রটি করতেন না; কিন্তু এ পর্য্যন্ত তাতে বিশেষ কোন ফল হয় নি। তাই তাঁদের পক্ষে ক্যাপিউলেট বাড়ীর ভোজে যাওয়া খুব বিপত্তজনক হ'বে জেনেও, আর একবার চেষ্টা করবার জন্মে বেনভোলিও রোমিওকে নিয়ে সেখানে যাবার সঙ্কল্প করলেন, এবং তাঁকে বললেন, “রোমিও, চল ছদ্মবেশে ক্যাপিউলেট বাড়ীর ভোজে যাই। সেখানে ভেরোনার তরুণীরা প্রায় সবাই আজ একত্রিত হয়েছে; দেখবে রূপেগুণে তোমার আদরিণী রোজালিন তাদের অনেকেরই পায়ের কাছে দাঁড়াতে পারে না।” বেনভোলিওর কথা বিশ্বাস না করলেও, সেখানে গেলে রোজালিনকে অন্ততঃ একবার দেখতে পাবেন, এই আশাতেই

রোমিও-জুলিয়েট

রোমিও শেষটায় তাঁর প্রস্তাবে রাজী হ'লেন। তার পর রোমিও, বেনভোলিও ও মারকিউসিও ব'লে তাঁদের এক বন্ধু, এই তিন জন ছদ্মবেশে ক্যাপিউলেট বাড়ীর ভোজে গিয়ে উপস্থিত হ'লেন। ক্যাপিউলেট-কর্তা তাঁদের চিন্তে পারেন নি, তাই নিমন্ত্রিত আর সকলের মত তাঁদেরও সাদর অভ্যর্থনা ক'রে ভিতরে নিয়ে গেলেন ও তরুণীদের সঙ্গে নাচ-গানে যোগ দিতে অনুরোধ করলেন। বুড়া ক্যাপিউলেট-কর্তা বেশ খোসমেজাজী ও আমুদে লোক ; একটু পরিহাস ক'রে বলেন, “আমরাও তোমাদের মত বয়সকালে সুন্দরী যুবতীদের সঙ্গে নানারূপ প্রেমালাপ করেছি।” এর পরে তাঁরা নাচ-গানে যোগ দিলেন। হঠাৎ সেই নৃত্যের মধ্যে অসামান্য রূপলাবণ্যবতী এক যুবতীকে দেখে রোমিও একেবারে চমৎকৃত ও বিমোহিত হ'য়ে গেলেন। এমন অপরূপ রূপ তিনি আর কখনো দেখেন নি ; তাঁর বোধ হ'ল যেন এ রূপের কাছে বাতিগুলোর উজ্জ্বল আলো পর্য্যন্ত মলিন দেখাচ্ছে। এমন সৌন্দর্য্য নরলোকে দুর্লভ। এর অতুলনীয় সৌন্দর্য্য আর সবাইকে নিম্প্রভ ও ম্লান ক'রে দিয়েছে। রোমিও এতটা আত্মবিস্মৃত হ'য়ে পড়েছিলেন যে, মনের এই ভাব তিনি অকপটে বন্ধুদের কাছে প্রকাশ ক'রে ফেলেন। ক্যাপিউলেট-গিন্নীর ভাইপো টাইবন্টও নিকটেই

শেক্সপিয়রের গল্প

দাঁড়িয়ে ছিলেন। তিনি কণ্ঠস্বরে রোমিওকে চিনে ফেলেন। টাইবল্ট বড় বদরাগী মানুষ, মণ্টেগ পরিবারের কেউ যে ছদ্মবেশে এসে তাঁদের কোন উৎসবঅনুষ্ঠানে যোগ দিচ্ছে— হয়তবা তা' নিয়ে নানারূপ ঠাট্টাবিক্রপও কচ্ছে, এ তাঁর একান্ত অসহ্য হ'য়ে উঠল। টাইবল্ট রাগে ও ক্ষোভে গর্-গর্ কচ্ছিলেন; তখনই রোমিওকে খুন করেন এই তাঁর মতলব। কিন্তু ক্যাপিউলেট-কর্তার মোটেই ইচ্ছা নয় যে, টাইবল্ট কোন বিভ্রাট বাধিয়ে বসেন, তাই বলেন—“দেখ টাইবল্ট, তুমি এ নিয়ে কোন গোলমাল কর তা' আমি একেবারেই চাইনে। তা' হ'লে আজকের সব আমোদপ্রমোদই মাটি হ'য়ে যাবে এবং নিমন্ত্রিতেরাও সবাই মহাবিরক্ত ও অসন্তুষ্ট হবেন। আর রোমিও ত এখানে এসে কোন রকম অভদ্র বা অণ্যায় ব্যবহারই করে নি; ভেরোনার সহরশুদ্ধ লোক তার প্রশংসাই ক'রে থাকে, তাকে সুশীল, বিনয়ী ও সচ্ছরিত্র ব'লেই সকলে জানে।” বাধ্য হ'য়ে ইচ্ছার বিরুদ্ধেও তখনকার মত টাইবল্টকে চুপ ক'রে যেতে হ'ল, কিন্তু তিনি মনে মনে শপথ করলেন যে, মণ্টেগ-তনয় রোমিওকে এর জন্মে একদিন সমুচিত শিক্ষা না দিয়ে ছাড়বেন না।

নাচ-গান শেষ হ'বার পর সেই নিরুপমা সুন্দরী যেখানে

রোমিও-জুলিয়েট

দাঁড়িয়ে বিশ্রাম কচ্ছিলেন, রোমিও একদৃষ্টিতে সেই দিকে তাকিয়ে ছিলেন। যতই দেখছিলেন ততই আরো মুগ্ধ হচ্ছিলেন। শেষে তিনি ধীরে ধীরে সেই সুন্দরীর কাছে গিয়ে উপস্থিত হ'লেন। ছদ্মবেশে থাকায় এখন সেই তরুণীর সঙ্গে প্রেমালাপ করবার বেশই সুবিধা হ'ল। দু'টিতে কথাবার্তা হচ্ছে, এমন সময় সেই যুবতী তাঁর মায়ের ডাকে সেখান থেকে চলে যেতে বাধ্য হ'লেন। পরে তাঁর মা কে, এই খোঁজ নিতে গিয়ে রোমিও জানতে পারলেন যে, সেই অতুলনীয় রূপসী আর কেউ নয়, স্বয়ং তাঁদের চিরশত্রু ক্যাপিউলেট-কর্তারই একমাত্র কন্যা ও উত্তরাধিকারিণী জুলিয়েট! তিনি আরও টের পেলেন যে, নিজে সম্পূর্ণ অজ্ঞাতসারে সেই শত্রু-কন্যাকেই ভালবেসে ফেলেছেন। অবস্থাটা ভাল করে বুঝতে পেরে তাঁর আর দুঃখের—পরিভাপের সীমা রইল না; কিন্তু তবুও তাঁর পক্ষে জুলিয়েটকে না ভালবেসে থাকা সম্ভবপর হ'ল না! আবার জুলিয়েটেরও সেই অবস্থা—তিনিও যখন জানতে পারলেন, যে ভদ্রলোকের সঙ্গে এতক্ষণ আলাপ কচ্ছিলেন, কিছুমাত্র না বুঝে একবারমাত্র দেখেই যাকে মনপ্রাণ সঁপে দিয়েছেন, সে আর কেউ নয়, তাঁদেরই পরমশত্রু মণ্টেগ-কর্তার পুত্র রোমিও, তখন তিনিও দুঃখে কষ্টে অনুতাপে

শেক্সপিয়রের গল্প

ত্রিয়মাণ হ'লেন। এমনতর যে হবে বা হ'তে পারে, এ তিনি আগে স্বপ্নেও ভাবেন নি। পারিবারিক হিসাবে যেখানে কেবলমাত্র ঘৃণাবিদ্বেষই সম্ভব, সেখানে যে কি ক'রে এত তাড়াতাড়ি—এমন অজ্ঞাতসারে ভালবাসা জন্মাতে পারে, তা' তিনি তখন পর্য্যন্তও ভাল ক'রে বুঝে উঠতে পাচ্ছিলেন না; সবই যেন তাঁর কাছে অদ্ভুত ব'লে—রহস্যময় ব'লে বোধ হচ্ছিল। কিন্তু আর যে কোন উপায়-ই নেই; সে স্বর্গীয় ভালবাসার যে আর বিনাশ নেই!

রাত দুপুর হ'য়ে গেছে, কাজেই রোমিও ও তাঁর দুই বন্ধু ক্যাপিউলেট বাড়ী থেকে বেরিয়ে পড়লেন। খানিকটা যাবার পরই তাঁর বন্ধুরা লক্ষ্য করলেন যে, রোমিও আর তাঁদের সাথে নেই। এদিকে রোমিও কিছুতেই ক্যাপিউলেট বাড়ী ছেড়ে যেতে পাচ্ছিলেন না; তাঁর মন প'ড়ে রয়েছিল জুলিয়েটের কাছে। শেষটায় আর থাকতে না পেরে তিনি লুকিয়ে জুলিয়েটদের বাড়ীর পিছনের বাগানের কাছে গিয়ে উপস্থিত হ'লেন। পাঁচিল টপ্কে বাগানের ভিতরে পড়লেন। এর অল্পক্ষণ পরেই জুলিয়েটসুন্দরী তাঁর শোবার ঘরের জানালায় এসে দাঁড়ালেন; জানালা দিয়ে তাঁর অনুপম রূপরাশি যেন নবোদিত সূর্যের মত জ্যোতিঃ বিকিরণ করতে লাগল।

রোমিও-জুলিয়েট

এতক্ষণ তাঁদের আলো বাগানখানিকে আলোকিত ক'রে রেখেছিল ; রোমিওর মনে হ'ল, জুলিয়েটের বিমল রূপ-চ্ছটায় যেন তাঁদের আলো অপ্রতিভ, ম্লান হ'য়ে গেল । জুলিয়েট গালে হাত দিয়ে ব'সে কি যেন ভাব'ছিলেন, তাঁকে খুবই চিন্তাশ্রিতা ব'লে বোধ হচ্ছিল । নিজেকে একলাটি মনে ক'রে জুলিয়েট দীর্ঘনিঃশ্বাস ফেলে ব'লে উঠলেন, “হা অদৃষ্ট !” তাঁর এই সামান্য কথাটিমাত্র শুনে রোমিও একেবারে বিমোহিত হ'য়ে গেলেন—তাঁর মনে হ'ল, যেন জুলিয়েট তাঁর কানে মধু ঢেলে দিলেন । জুলিয়েট টের পান নি যে, তাঁর কথা আবার কেউ শুনছে । ভোজের সময় রোমিওকে দেখে অবধি তাঁর মনে যে অনুরাগের সৃষ্টি হয়েছিল তাতে তাঁর মনপ্রাণ ভ'রে উঠেছিল, তাই তাঁর প্রণয়ীর নাম ধ'রে ডেকে তিনি বলেন, “রোমিও, রোমিও, তুমি কেন রোমিও হ'লে ? কেন তুমি আমাদের চিরশত্রু মণ্টেগদের ছেলে হয়েছ ? আমার জানো তোমার ও নাম ছেড়ে দাও ; বোলো না যে, তুমি মণ্টেগদের ছেলে । তা' যদি না কর, তবে দিব্যি ক'রে বল যে, তুমি আমার হ'বে—তা' হ'লে আমি-ই ক্যাপিউলেটদের সম্বন্ধ জন্মের মত ছেড়ে দেবো ; বল, এতে রাজী আছ ?” এ-কথা শুনে রোমিও আরো উৎসাহিত হ'য়ে উঠলেন, তাঁর

শেক্সপিয়রের গল্প

আনন্দের আর সীমা রইল না। তিনি আর চুপ ক'রে থাকতে না পেরে প্রেমবিহ্বল কণ্ঠে ব'লে উঠলেন, “প্রিয়তমে, তাই হোক, আমি আর রোমিও নই ; ও নাম যখন তুমি পছন্দ কর না তখন তাতে আমার প্রয়োজন নেই। তুমি আজ থেকে আমায় তোমার যে নাম ধ'রে ইচ্ছে ডেকে।” হঠাৎ বাগানে একজন পুরুষের কথা শুনে জুলিয়েট চমকে উঠলেন ; রাত্রির অন্ধকারে কে যে এমন ভাবে লুকিয়ে তাঁর মনের কথা শুনতে আসতে পারে, তা' তিনি প্রথমটায় বুঝে উঠতে পারেন নি। কিন্তু রোমিও আর একবার কথা বলতেই তিনি বেশ বুঝতে পারলেন যে, এ তাঁর প্রিয়তমেরই কণ্ঠস্বর। পাঁচিল টপকে বাগানে ঢুকে রোমিও যে বড়ই অগ্নায় করেছেন, এ যে তাঁর নিজের পক্ষে বড়ই বিপজ্জনক,— তিনি মর্মেগ, স্তূতরাং জুলিয়েটের আত্মীয়স্বজন কেউ তাঁকে দেখলে তাঁর যে প্রাণ পর্যন্ত যেতে পারে, এ-সব ব'লে জুলিয়েট রোমিওকে খুবই অনুযোগ করলেন। রোমিও বল্লেন, “প্রিয়ে জুলিয়েট, তুমি আমার প্রতি সদয় হ'লে আমি কোন শত্রুকেই গ্রাহ্য করি না। তোমার ভালবাসায় বঞ্চিত হ'য়ে বেঁচে থাকার চেয়ে তাদের হাতে প্রাণ যাওয়া আমার পক্ষে শতগুণে ভাল।” এমনি ধারা তাঁদের মধ্যে অনেক কথাই হ'চ্ছিল ;

রোমিও-জুলিয়েট

দু'জনে দু'জনার প্রেমে বিভোর, কথার যেন আর শেষই হয় না ! এ-দিকে যে রাত প্রায় ভোর হ'য়ে এসেছে সে-দিকেও তাঁদের কিছুমাত্র খেয়াল নেই ! এমন সময় জুলিয়েটের ধাই তাঁকে শুতে যেতে ডাকলে ; তাই বাধ্য হ'য়ে অনিচ্ছাসঙ্গেও দু'জনকে পরস্পরের কাছ থেকে বিদায় নিতে হ'ল । যাবার সময় জুলিয়েট রোমিওকে ব'লে গেলেন, “যদি তুমি আমাকে সত্যি সত্যি ভালবেসে থাক— যদি আমাকে বিয়ে করলে তুমি সুখী হ'বে ব'লে মনে কর, তা' হ'লে আমি কাল তোমার কাছে একজন লোক পাঠিয়ে দেবো, তুমি বিয়ের স্থান ও সময় ঠিক ক'রে আমাকে খবর দেবে । বিয়ের পর আমি তোমারই হ'ব ; তখন তোমার সাথে এ পৃথিবীর এক প্রান্ত থেকে আর এক প্রান্ত পর্যন্ত যেতেও আমার পক্ষে কোন বাধা থাকবে না ।”

একে ভোর হ'য়ে গেছে, তার উপর জুলিয়েটের চিন্তায় তিনি তখন এতই বিভোর যে, রোমিও আর বাড়ীতে ফিরলেন না ; তিনি সেখান থেকে কাছেই লরেন্স নামে একজন পাদ্রীর মঠে গিয়ে উপস্থিত হ'লেন । লরেন্স অনেকটা আগেই উঠেছিলেন, তখন তাঁর প্রাতঃক্রিয়া ও উপাসনাদি প্রায় শেষ হ'য়ে এসেছিল । এত সকালে রোমিওকে দেখে তিনি ঠিকই অনুমান করলেন যে,

শেখস্পিয়রের গল্প

গতরাত্রে রোমিওর বরাতে আর যুমান হ'য়ে উঠে নি। রোজালিনের প্রতি রোমিওর অনুরাগের কথা তিনি সবই জানতেন; আর রোজালিন তাঁকে মোটেই ভালবাসেন না, বরং একটু অবজ্ঞার চোখেই যে দেখেন এও তাঁর অজানা ছিল না। রোমিও সবই তাঁকে বলতেন, এবং রোজালিনের দুর্ব্যবহারের জন্যে তাঁর কাছে প্রায়ই আক্ষেপ করতেন। তাই লরেন্স মনে ক'রেছিলেন যে, রোজালিনের চিন্তাতে বিভোর হ'য়েই হয়ত রোমিও সারা রাত জেগে কাটিয়েছেন! কিন্তু রোমিও যখন অকপটে তাঁকে জুলিয়েটের প্রতি নিজের নূতন অনুরাগের কথা জানালেন এবং সেই দিনই তাঁদের বিয়ে দিয়ে দেবার জন্যে বিশেষ ক'রে অনুরোধ করলেন, তখন তিনি যেন একেবারে অবাক হ'য়ে গেলেন। একটু উপহাস ক'রেই বললেন, ‘তা’ হ'লে দেখছি তোমাদের মত যুবা পুরুষদের ভালবাসা মোটেই আন্তরিক নয়, কেবল চোখের নেশা নাত্র।’ রোমিও উত্তর ক'রলেন, ‘রোজালিন যে আমাকে এতটুকুও ভালবাসে না তা’ ত আপনি বেশই জানেন, আর আমারও মোহ কেটে গেছে। এ-দিকে আমি ও জুলিয়েট পরস্পরকে সত্যি সত্যি ভালবেসেছি; আপনি পৌরহিত্য ক'রে বিয়ে দিয়ে দিলেই আমাদের সকল সাধ পূর্ণ হয়।’ রোজালিন রোমিওকে

রোমিও-জুলিয়েট

ভালবাসেন না, অথচ রোমিও তাঁকে অন্ধের মত ভালবাস্তেন দেখে লরেন্স রোমিওকে বরং একটু তিরস্কারই করতেন, কিন্তু তখন তাতে বিশেষ কোন ফলই হয় নি। লরেন্স, ক্যাপিউলেট ও মণ্টেগ উভয় পরিবারেরই পরম হিতৈষী ছিলেন। দু'পরিবারের বিবাদ-বিসম্বাদের একটা ভালরূপ মীমাংসা করবার জন্যে তিনি যথাসাধ্য চেষ্টাও করেছেন, কিন্তু এ-পর্যন্ত তাঁর সকল চেষ্টাই ব্যর্থ হয়েছে। এ জন্যে তিনি আন্তরিক দুঃখিতও ছিলেন। এর উপর আবার রোমিওকে তিনি খুবই স্নেহ করতেন, তাঁকে অদেয় তাঁর কিছুই ছিল না। এখন সব শুনে এবং রোমিও ও জুলিয়েট পরস্পরকে যার-পর-নাই ভালবাসেন জেনে, তিনি তাঁদের বিয়েয় পৌরহিত্য করতে রাজী হ'লেন। ভাবলেন, এ দু'জনায় বিয়ে হ'লে হয়ত ক্যাপিউলেট ও মণ্টেগ পরিবারের বংশগত শত্রুতা ক্রমে দূর হ'য়ে যাবে।

লরেন্স তাঁদের বিয়ের প্রস্তাব অনুমোদন করায় ও তা'তে পুরোহিতের কাজ করতে সম্মত হওয়ায় রোমিওর আনন্দের সীমা রইল না। জুলিয়েটও নিজের প্রেরিত লোকের মুখে সব খবর পেয়ে শীগ্গিরই গোপনে লরেন্সের মঠে এসে উপস্থিত হ'লেন। যথাসময়ে, যথাবিধি রোমিও ও জুলিয়েটের বিয়ে হ'য়ে গেল। বুড়ো পাদ্রী নবদম্পতির

শেখাপিয়রের গল্প

সর্ববাঙ্গাণ মঙ্গলের জন্মে ভগবানের কাছে প্রার্থনা করলেন ; আরও প্রার্থনা করলেন, যেন এই বিয়ে থেকে ক্যাপিউলেট ও মণ্টেগ পরিবারের ভয়ানক শত্রুতার শেষ হয় ।

বিয়ে হ'য়ে যেতেই জুলিয়েট তাড়াতাড়ি বাড়ী ফিরে গেলেন । গতরাত্রির মত আজ রাত্রেও রোমিও সেই বাগানে তাঁর সঙ্গে দেখা করবেন ব'লে প্রতিজ্ঞা করেছিলেন, তাই অধীরভাবে রাত্রির জন্মে প্রতীক্ষা করতে লাগলেন ।

এ-দিকে সেই বিয়ের দিনই দুপুরবেলা রোমিওর বন্ধু বেনভোলিও ও মার্কিউসিওর সঙ্গে প্রকাশ্য রাজপথে একদল ক্যাপিউলেটের দেখা হ'ল । সেই উগ্রপ্রকৃতি টাইবন্ট—গতরাত্রে ক্যাপিউলেট বাড়ী নিমন্ত্রণের সময় যিনি রোমিওকে মারবার জন্মে ক্ষেপে উঠেছিলেন—তিনিই ছিলেন এই ক্যাপিউলেট দলের নেতা । দু' দলের দেখা হ'তেই টাইবন্ট মার্কিউসিওকে মণ্টেগ রোমিওর সঙ্গে মেলামেশা করার জন্মে গালাগালি দিতে আরম্ভ করলেন । মার্কিউসিও-ও ছিলেন টাইবন্টেরই মত একজন বদ্রাগী যুবাপুরুষ ; সাহস বা বীর্যেও মার্কিউসিও কিছু কম ছিলেন না ; তাই তিনিও টাইবন্টকে মুখের উপরেই বেশ কড়া কড়া জবাব দিলেন । বেনভোলিও একটু ধীর-স্থির ; তিনি সাধ্যমত উভয়কেই খামিয়ে রাখতে চেষ্টা করলেন, কিন্তু তাতে কোন ফল

রোমিও-জুলিয়েট

হ'ল না। এমন সময় স্বয়ং রোমিও সেখানে এসে হাজির হ'লেন। রোমিওকে দেখে মারকিউসিওকে ছেড়ে টাইবন্ট তাঁকেই আক্রমণ করলেন এবং নানারকম অপমানসূচক গালি দিতে শুরু করলেন। রোমিও চিরদিনই সুবুদ্ধি ও শান্তস্বভাব। এই পারিবারিক শত্রুতা ও বিদ্বেষের মধ্যেও তিনি বড়-একটা থাকতেন না। এর উপর আবার জুলিয়েটের ভাই ব'লে টাইবন্টের সঙ্গে ঝগড়া করবার তাঁর একেবারেই ইচ্ছা ছিল না। তাই তিনি টাইবন্টের গালিগালাজ নীরবে সহ্য ক'রে যাচ্ছিলেন; যাতে তাঁর সঙ্গে কোনরূপ বিবাদ না বাধে সে-ই চেষ্টাই কচ্ছিলেন। কিন্তু টাইবন্ট মর্টেগ-মাত্রকেই ভীষণ ঘৃণা ক'রতেন; তিনি খাপ থেকে তরবারি বের ক'রে রোমিওকে আক্রমণ করলেন। রোমিওর দিক থেকে টাইবন্টের সঙ্গে বিবাদ না করবার যে কোন গুপ্ত কারণ থাকতে পারে, তা' মারকিউসিও জানতেন না, সুতরাং রোমিওর ব্যবহার তাঁর কাছে নিতান্ত কাপুরুষোচিত ও হীন ব'লেই মনে হ'ল। এ অপমান তাঁর সহ্য হ'ল না; তিনি নানারূপ অবজ্ঞাসূচক কথা ব'লে টাইবন্টকে উত্তেজিত ক'রে তুল্লেন ও তাঁকে আক্রমণ করলেন। রোমিও ও বেনভোলিও শেষ পর্যন্ত বিশেষ চেষ্টা ক'রেও তাঁদের নিরস্ত করতে পারলেন না। এর ফলে, যুদ্ধে

শেক্সপিয়রের গল্প

মারকিউসিওকে পরাস্ত ক'রে টাইবন্ট তাঁর প্রাণবধ করলেন। তখন রোমিও আর স্থির থাকতে পারলেন না। তিনি ভীম বিক্রমে, টাইবন্টকে আক্রমণ করলেন। সে প্রচণ্ড আক্রমণ সহ করতে না পেরে টাইবন্ট শীগ্গিরই তাঁর হাতে প্রাণ হারালেন।

দিন-দুপুরে প্রকাশ্য রাজপথে এ হেন সাংঘাতিক হাঙ্গামার কথা দেখতে না দেখতেই চারদিকে রাষ্ট্র হ'য়ে পড়ল। অল্প সময়ের মধ্যেই সে-স্থান লোকে লোকারণ্য হ'য়ে উঠল। ক্যাপিউলেট ও মণ্টেগ কর্তারাও সস্ত্রীক সেখানে এসে উপস্থিত হ'লেন। একটু পরেই স্বয়ং ভেরোনারাজ ও পারিষদবর্গের সঙ্গে সেখানে এসে হাজির হ'লেন। মারকিউসিও ছিলেন রাজারই আত্মীয়; তাঁর মৃত্যুতে রাজা খুবই ক্ষুব্ধ হয়েছিলেন। এর উপর ক্যাপিউলেট ও মণ্টেগদের বিবাদের জন্তে প্রায়ই নগরের শাস্তিভঙ্গ হ'ত বলে রাজাপ্রজা সবাই বিষম তিক্তবিরক্ত হ'য়ে উঠেছিলেন। আজকের ঘটনায় রাজার সত্যি ধৈর্যচ্যুতি হ'য়েছিল, তিনি আগে থেকেই দৃঢ় সঙ্কল্প ক'রে এসেছিলেন যে, প্রকৃত অপরাধীদের আজ বিশেষ ক'রেই শাস্তি দিবেন। বেনভোলিও আগাগোড়া সবই দেখেছিলেন। কি ক'রে হাঙ্গামা বাঁধলো রাজা তাঁকে সে-কথা জিজ্ঞেস করলেন। রোমিওকে বাঁচিয়ে

রোমিও-জুলিয়েট

এবং নিজের দলের লোকদের দোষ সম্ভবমত হালকা ক'রে দিয়ে তিনি যতটা পারলি^৩ ন স্য কথাই বলেন। ক্যাপিউলেট গিন্নী টাইবন্টের মৃত্যুতে খুবই শোকার্তা হয়েছিলেন, প্রতিহিংসায় তাঁর বুক জ্বলে যাচ্ছিল। ন্যায়বিচার ক'রে টাইবন্টের হত্যাকারীকে অতি কঠোর শাস্তি দিবার জন্মে তিনি রাজাকে উত্তেজিত করতে লাগলেন ; আরো বললেন যে, বেনভোলিও রোমিওর বন্ধু ও নিজে মণ্টেগ ব'লে নিরপেক্ষ ভাবে সব কথা বলেন নি, সুতরাং রাজা যেন তাঁর কথায় পুরোপুরি বিশ্বাস না করেন। এমনি ক'রে রোমিওর বিরুদ্ধে তিনি কত কথাই না বলেন ! তিনি ত জানতেন না যে, রোমিও তাঁর প্রিয়তমা কন্যা জুলিয়েটেরই স্বামী। ওদিকে মণ্টেগ-গিন্নী প্রাণাধিক পুত্রের প্রাণরক্ষার জন্মে সাধ্যমত চেষ্টা কচ্ছিলেন। তিনি অনেকটা উচিতমতই বলছিলেন যে, টাইবন্টকে বধ ক'রে রোমিও কোন অপরাধই করেন নি, কেন না, মারকিউসিওকে হত্যা করেছিলেন ব'লে টাইবন্টের ত প্রাণদণ্ড হ'তই। রাজা এদের কারো কথায় বিচলিত না হ'য়ে আগাগোড়া সব শুনলেন এবং রোমিওকে ভেরোনা থেকে নির্বাসিত করলেন। সছোবিবাহিতা জুলিয়েটের পক্ষে এ বড়ই মর্মান্তিক হ'ল ; রোমিওর

শেক্সপিয়রের গল্প

নির্বাসনে বিয়ের দিনই স্বামীর সাথে তাঁর চিরবিচ্ছেদ ঘটলো।

এদিকে দাঙ্গার পরেই রোমিও লরেন্সের মঠে আশ্রয় নিয়েছিলেন ; সেখানে থেকেই তিনি রাজার নিদারুণ আদেশের কথা জানতে পেলেন। এই নির্বাসনদণ্ডকে মৃত্যুর চেয়েও ভয়ানক বলে তাঁর বোধ হ'ল। কেন না, জুলিয়েটকে না দেখে বেঁচে থাকা, সে ত শুধু বিড়ম্বনা মাত্র। রোমিও যার-পর-নাই অধীর হ'য়ে পড়লেন। লরেন্স নানা কথা বলে তাঁকে প্রবোধ দিবার চেষ্টা ক'রতে লাগলেন। রোমিও একটু প্রকৃতিস্থ হ'লে লরেন্স বলেন, “আজ রাত্রেই গোপনে জুলিয়েটের সঙ্গে দেখা ক'রে তাঁর কাছ থেকে কিছুদিনের মত বিদায় নিয়ে এস। তার পর ভোরের আগেই এখান থেকে বরাবর মণ্টুয়াতে চ'লে যাও, এখনকার মত সেখানেই থাকগে। এদিকে সময় বুঝে তোমাদের বিয়ের কথা আমি যত শীগ'গির পারি প্রচার ক'রে দেবো ; হয়ত তাতেই তোমাদের দু' পরিবারের চির-বিবাদ ও মনোমানিন্য দূর হ'য়ে গিয়ে বান্ধবতা স্থাপিত হ'তে পারবে। এ হ'লে রাজা নিশ্চয়ই তোমায় ক্ষমা করবেন, আর তুমিও দেশে ফিরে আসতে পারবে। এখন দেশ ছেড়ে যেতে যে কষ্ট হচ্ছে, এর পর তা' থেকে শতগুণ

রোমিও-জুলিয়েট

সুখ পাবে সেখানে ফিরতে।” স্নেহশীল—শুভাকাঙ্ক্ষী লরেন্সের সদুপদেশে রোমিও ক্রমে শান্ত হ’লেন। তার পর তাঁর কাছে বিদায় নিয়ে, রোমিও জুলিয়েটের সঙ্গে দেখা করতে যাবার জন্যে বেরিয়ে পড়লেন; স্থির করলেন, সারারাত সেখানে কাটিয়ে খুব ভোরে উঠে একলা মণ্টুয়ার দিকে রওনা হবেন। বিদায়ের কালে লরেন্স রোমিওকে আশীর্ব্বাদ ক’রে বলেন, “এ দিকের জন্যে তুমি ব্যস্ত হোয়ো না, এখানকার সব খবরই মাঝে মাঝে পত্র লিখে তোমায় জানাব।”

রাত্রি হ’লে আগের রাত্রির মত পাঁচিল টপ্কে রোমিও জুলিয়েটদের বাড়ীর পিছনের সেই বাগানের ভিতর পড়লেন। সেখান থেকে অতি গোপনে জুলিয়েটের সাহায্যে তাঁর শোবার ঘরে গিয়ে উপস্থিত হ’লেন। মিলনের আনন্দে প্রথম খানিকক্ষণ পরম সুখে কাটল, কিন্তু ভাবী বিচ্ছেদের কথা স্মরণ হওয়ায় সে মিলনের সুখ বেশীক্ষণ স্থায়ী হ’ল না; তাঁরা খুবই উতলা ও শোকাকুল হ’য়ে উঠলেন। দেখতে দেখতেই যেন রাত কেটে গেল। পূর্বদিকে ভোরের আলো ফুটে উঠতে দেখে বিদায়ের সময় হয়েছে বুঝে, প্রণয়ীযুগল যার-পর-নাই শোকবিহ্বল হ’য়ে পড়লেন। পরে একটু স্থির হ’লে রোমিও পরম

শেক্সপিয়রের গল্প

‘দুঃখভারাক্রান্ত’ মনে প্রিয়তমা পত্নীর কাছ থেকে বিদায় নিলেন; ব’লে গেলেন যে, মন্টুয়া থেকে সব সময়ই তাঁকে চিঠি লিখবেন। ঘরের জানালা গলিয়ে রোমিও বাগানে নামলেন। জুলিয়েট একদৃষ্টে রোমিওকে দেখছিলেন, আর কেঁদে আকুল হচ্ছিলেন; নানারকম ভাবী অমঙ্গলের আশঙ্কা তাঁকে আরো ব্যাকুল ক’রে তুলছিল। দিন হ’লে যদি কেউ রোমিওকে ভেরোনার সীমার মধ্যে দেখতে পায়, তা’ হ’লে রাজার আদেশে নিশ্চয়ই তাঁর প্রাণ যাবে, তাই বাধ্য হ’য়ে রোমিওকে শীগ্গিরই চ’লে যেতে হ’ল।

এইবার হতভাগ্য প্রণয়ীযুগলের দুঃখের দিন আরম্ভ হ’ল। ক্যাপিউলেট কর্তৃক মেয়ের বিয়ের কথা কিছুই জানতেন না। রোমিও ভেরোনা ছেড়ে চ’লে যাবার অল্প দিন পরেই প্যারিস নামে একজন রূপবান, গুণবান ও সম্ভ্রান্তবংশীয় যুবকের সঙ্গে তিনি জুলিয়েটের বিয়ের সম্বন্ধ স্থির করলেন। পিতার প্রস্তাবে জুলিয়েট এক মহা-সমস্যার মধ্যে প’ড়ে গেলেন। তাঁর আগেই বিয়ে হ’য়ে গেছে এ-কথা গোপন ক’রে তিনি নানারূপ ওজর-আপত্তি করতে লাগলেন। কিন্তু তাঁর পিতা কোন আপত্তিই গ্রাহ্য করলেন না; দু’দিন পরেই প্যারিসের সঙ্গে তাঁর বিয়ের দিন স্থির করেছেন ব’লে তিনি চূড়ান্ত জবাব দিলেন।

রোমিও-জুলিয়েট

কোন বিপদ-আপদে পরামর্শের দরকার হ'লে জুলিয়েট লরেন্সের কাছে যেতেন। এ-সঙ্কটেও তিনি তাঁরই শরণা-পন্ন হ'লেন। লরেন্স বিয়ের প্রস্তাবের কথা পূর্বেই শুনে-ছিলেন; তিনি বল্লেন, “দেখ, এ-বিপদ থেকে উদ্ধার পাবার এক উপায় আছে, কিন্তু তুমি তা' পেরে উঠবে কি?” জুলিয়েট উত্তর কর্লেন, “আমার স্বামী বর্তমান; এ-অবস্থায় আবার বিয়ে হওয়ার চেয়ে আমার পক্ষে যে মরণও ভাল।” তখন লরেন্স বল্লেন, “তুমি বাড়ীতে ফিরে গিয়ে তোমার বাবার ইচ্ছামত এই বিয়েয় মত দাওগে। কাল রাত্রে শোবার সময় এই শিশিতে যা' আছে তা' খেয়ে ফেলো। এতে তোমাকে বিয়াল্লিশ ঘণ্টা সময় ঠিক মরার মত ক'রে রাখবে, সমস্ত শরীর ঠাণ্ডা হ'য়ে যাবে, জীবনের চিহ্নমাত্রও থাকবে না। বিয়ের দিন প্রাতে সবাই দেখতে এসে, হঠাৎ তোমার মৃত্যু হয়েছে ব'লে মনে করবে। তার পর চিরপ্রথমত তোমায় সাজিয়ে গুজিয়ে সমাধিস্থানে নিয়ে যাবে। যদি কোনরূপ ভয় না ক'রে আমার কথামত কাজ করতে পার, তা' হ'লে এই ওষুধ খাবার ঠিক বিয়াল্লিশ ঘণ্টা পরে তুমি নিশ্চয়ই আবার জেগে উঠবে; তোমার মনে হবে, যেন একটা স্বপ্ন দেখে জেগে উঠলে। এদিকে তোমার জ্ঞান হ'বার আগেই আমি

শেক্সপিয়রের গল্প

লোক পাঠিয়ে রোমিওকে সব জানিয়ে দেবো। সে গোপনে রাত্রে এখানে এসে তোমাকে সামাধি-মন্দির থেকে তুলে নিয়ে, আবার মন্টুয়াতে চ'লে যাবে।”—
লরেন্সের কাছ থেকে ওষুধের শিশিটি নিয়ে, তাঁর পরামর্শ মত সব কাজ করবেন ব'লে জুলিয়েট বাড়ী ফিরে গেলেন।

মঠ থেকে বাড়ী ফিরবার পথে প্যারিসের সঙ্গে জুলিয়েটের দেখা হ'ল। প্যারিস আবার বিয়ের প্রস্তাব করায় এবার তিনি লজ্জাশীলতার ভাণ ক'রে সে-প্রস্তাবে সম্মতি জানালেন। জুলিয়েট সত্যি সত্যি বিয়েয় রাজী হ'য়েছেন মনে ক'রে প্যারিস মহা খুসি হ'লেন। তাঁর কাছ থেকে এ-খবর পেয়ে ক্যাপিউলেট কর্তা ও গিন্নী মেয়ের বিয়েয় এমন সমারোহের আয়োজন করলেন যে, ভেরোনার লোকে এর আগে তেমন ব্যাপার আর কোন দিন চোখে দেখে নি।

বিয়ের আগের দিন রাত্রে শোবার সময় লরেন্সের দেওয়া সেই ওষুধের শিশিটি হাতে নিয়ে জুলিয়েটের মনে নানা রকম আশঙ্কা হ'তে লাগল; লরেন্স তাঁদের গোপনে বিয়ে দিয়েছেন, হয়ত নিজের দোষ যাতে না বেরিয়ে পড়ে এখন সে-জন্তে কৌশলে তাঁকে বিষ খাইয়ে মেরে ফেলতে চাচ্ছেন। আবার ভাবলেন, না, তাঁকে দিয়ে

রোমিও-জুলিয়েট

এ নিতাস্তই অসম্ভব ; সকলে চিরদিন তাঁকে পুণ্যাত্মা ব'লেই জানে, এমন কাজ তাঁকে দিয়ে হ'তেই পারে না । আবার মনে হ'ল, রোমিওর যখন সমাধিক্ষেত্রে এসে উপস্থিত হ'বার কথা তার আগেই যদি তিনি জেগে উঠেন, তবে তাঁর দশা কি হবে ? কিন্তু শেষটায় রোমিওর প্রতি গভীর ভালবাসা ও প্যারিসের উপর বিতৃষ্ণাই প্রবল হ'য়ে উঠল ; তিনি শিশির সবটুকু ওষুধ খেয়ে অজ্ঞান হ'য়ে বিছানার উপর ঢ'লে পড়লেন ।

এ-দিকে প্যারিস তাঁর ভাবী পত্নী জুলিয়েটকে ঘুম থেকে তুলবার জন্যে খুব জাঁকজমক ক'রে ভোরবেলাই ক্যাপিউলেট বাড়ীতে এসে উপস্থিত হ'লেন । তখনও ঘুম থেকে উঠেন নি দেখে, জুলিয়েটের ধাই তাঁকে জাগাতে গিয়ে দেখলে যে, তিনি বেশ সেজেগুজে শুয়ে রয়েছেন । অনেক ডাকাডাকি ক'রেও যখন ধাই তাঁকে জাগিয়ে তুলতে পারলে না, তখন তার যেন কেমন সন্দেহ হ'ল । ভাল ক'রে দেখে তার আর বুঝতে বাকী রইল না যে, জুলিয়েটের দেহে প্রাণ নেই । সে একেবারে ডাক ছেড়ে কেঁদে উঠল । তার কান্নায় ও চীৎকারে বাড়ীময় একটা সোরগোল প'ড়ে গেল । ক্রমে বাড়ীর কর্তা, গিন্নী, প্যারিস—সবাই সেখানে এসে উপস্থিত

শেক্সপিয়রের গল্প

হ'লেন। প্যারিস কত সুখস্বপ্নই না দেখেছিলেন, মনে মনে বিবাহিত জীবনের কত মোহন ছবিই না এঁকে-ছিলেন! সে-সবের এমন শোচনীয় পরিণাম হবে, বিয়ের আগেই যে মৃত্যু এসে তাঁদের চিরবিচ্ছেদ ঘটিয়ে দেবে, তা' তিনি কোন দিন স্বপ্নেও ভাবেন নি। এর চেয়েও বেশী মর্মান্তিক হ'ল ক্যাপিউলেট কর্তা ও গিন্নীর অবস্থা। বুড়া বয়সের প্রধান অবলম্বন একমাত্র কন্যা জুলিয়েটের মৃত্যুতে তাঁরা যার-পর-নাই শোকাকুল হ'লেন। বড় সাধ ক'রে তাঁরা জুলিয়েটকে সৎপাত্রের অর্পণ করতে যাচ্ছিলেন; কিন্তু এমনি তাঁদের অদৃষ্ট যে, সব সাধই, জীবনের সব সুখ-শান্তিই ফুরিয়ে গেল!

সু-খবরের চেয়ে কু-খবর বেশী শীগ্গির ক'রে চার-দিকে ছড়িয়ে পড়ে। লরেন্স তাঁর প্রতিশ্রুতি মত প্রকৃত রহস্য সব জানাবার জন্যে মর্টুয়ায় রোমিওর কাছে লোক পাঠিয়েছিলেন বটে, কিন্তু সে-লোক পৌঁছোবার আগেই রোমিও ভেরোনার অন্য একজন লোকের মুখে জুলিয়েটের মৃত্যুসংবাদ শুনতে পেলেন। জুলিয়েট যে সত্যি সত্যি মরেন নি, সবই যে একটা সাজান ব্যাপার, এ তো আর রোমিও জানেন না, তাই এক মহা অনর্থের সৃষ্টি হ'ল।

রোমিও-জুলিয়েট

গত রাত্রে রোমিও ভারি এক মজার স্বপ্ন দেখেছিলেন। তিনি যেন ম'রে গেছেন ; তাঁর প্রিয়তমা জুলিয়েট এসে যেন চুমো খেয়ে খেয়ে তাঁকে বাঁচিয়ে তুললেন। তখন তাঁর সুখের আর সীমা রইল না ; তিনি জুলিয়েটের প্রেমে বিভোর হ'য়ে পরম সুখে কাল কাটাতে লাগলেন। এই স্বপ্নের কথা থেকে থেকে স্মরণ হওয়ায় সে-দিন রোমিও বড়ই মনের আনন্দে ও খোসমেজাজে ছিলেন। মনের এই অবস্থায় ভেরোনার একজন লোককে আসূতে দেখে, তিনি ভাবলেন যে, হয়ত সে কোন সু-খবর নিয়েই এসেছে। কিন্তু লোকটির কাছে যে নিদারুণ সংবাদ তিনি পেলেন, তাতে তাঁকে শোকে অধীর ক'রে তুলল। এ যে তাঁর স্বপ্নের ঠিক বিপরীত ! তিনি জুলিয়েটকে জন্মের মত হারিয়েছেন, আর যে তাঁকে একটি বারের জন্তেও ফিরে পাবার আশা পর্য্যন্ত নেই, এই চিন্তায় তিনি প্রায় পাগল হ'য়ে উঠলেন। সে-দিন রাত্রেই ভেরোনায় গিয়ে একবার তাঁর প্রাণাধিকা জুলিয়েটের মৃতদেহ দেখে আসূবার সঙ্কল্প ক'রে তিনি তাঁর চাকরকে ঘোড়া তৈরী ক'রতে আদেশ ক'রলেন।

শোক-দুঃখ মানুষকে মরিয়া ক'রে তোলে। তখন আর তাদের হিতাহিত, ভাল-মন্দ জ্ঞান থাকে না। সময়

শেখাপিয়রের গল্প

বুঝে নানারূপ দুর্বুদ্ধিও এসে জোটে। আজ রোমিওর অবস্থাও সেইরূপ হ'ল। কয়েক দিন আগে তিনি মণ্টুয়ার এক ওষুধবিক্রেতার দোকানের সামনে দিয়ে যাচ্ছিলেন। দোকানীর জীর্ণ-শীর্ণ দীন মূর্তি দেখে, তার দোকানে জিনিষ-পত্রের নিতান্ত অভাব লক্ষ্য ক'রে রোমিওর তখন মনে হয়েছিল যে, মণ্টুয়ার আইন অনুসারে বিষ বিক্রয় করা নিষিদ্ধ ও প্রাণদণ্ডে দণ্ডনীয় হ'লেও এই হতভাগ্যকে অর্থের লোভ দেখিয়ে যে-কেউ বিষ সংগ্রহ করতে পারে। ঐরূপ কোন ভীষণ উপায় অবলম্বন ক'রেই হয়ত একদিন তাঁর নিজের শোচনীয় জীবন শেষ করতে হবে, এমন চিন্তাও যে তখন রোমিওর মনে একেবারে আসেনি তাও নয়। সে-সব কথা আজ উদ্ভ্রান্ত শোককাতর রোমিওর মনে প'ড়ে গেল। তিনি তখনই সেই ওষুধবিক্রেতার দোকানে গিয়ে উপস্থিত হ'লেন। দোকানী প্রথমে তাঁর কাছে বিষ বেচতে রাজি হ'ল না; কিন্তু রোমিও যখন তাকে অনেক টাকা দিতে চাইলেন তখন লোভে প'ড়ে সে তাঁর কাছে বিষ বেচলে।

বিষ সঙ্গে নিয়ে, জন্মের মত একবার জুলিয়েটের মৃত-দেহ দেখতে রোমিও ভেরোনা রওনা হ'লেন; ভাবলেন, তাঁকে একবার সাধ মিটিয়ে দেখে, এই বিষ খেয়ে, তাঁরই

রোমিও-জুলিয়েট

পাশে প্রাণত্যাগ করবেন। রাত দুপুরের সময় ভেরোনায় পৌঁছে ক্যাপিউলেটদের সমাধিক্ষেত্রে গিয়ে উপস্থিত হ'লেন। তিনি একটা আলো, একখানা কোদালী আর একটা পেঁচ খুলবার যন্ত্র সঙ্গে নিয়েছিলেন। সবেমাত্র জুলিয়েটের সমাধি খুঁড়তে আরম্ভ করেছেন, এমন সময় তিনি বিস্মিত হ'য়ে গুল্লেন, কে যেন বলেছে, “রে. দুরাখ্যা মর্টেগ, এখনো এ পাপ কাজ থেকে নিবৃত্ত হ', নইলে উপযুক্ত শিক্ষা পাবি।” এ হতভাগ্য প্যারিসের কণ্ঠস্বর ; জুলিয়েটের সমাধিতে পুষ্পাঞ্জলি দিবার জন্তে ও তাকে অশ্রুজলে অভিষিক্ত ক'রে মনের দুঃসহ দুঃখ-ভার লাঘব করবার আশায়, তিনিই এই গভীর রাতে সমাধিক্ষেত্রে এসেছিলেন। রোমিওর, জুলিয়েটের মৃতদেহ সমাধি খুঁড়ে তোলার উদ্দেশ্যে প্যারিস বুরো উঠতে পারেন নি ; তিনি ভাবলেন, মর্টেগরা ক্যাপিউলেটদের চিরশত্রু, তাই বোধ হয় রোমিও এই গভীর রাতে কোন কু-মতলব সিদ্ধির জন্তে সেখানে এসে উপস্থিত হয়েছেন। এ-কথা মনে হ'তেই তিনি রোমিওকে জুলিয়েটের মৃতদেহ সমাধি থেকে তুলতে নিষেধ করলেন ; আর বললেন যে, আইন অনুসারে রোমিও চিরনির্বাসিত হ'য়েছেন, ভেরোনা-রাজ্যে প্রবেশ

শেক্সপিয়রের গল্প

করলে প্রাণদণ্ড হবে তাঁর প্রতি এরূপ রাজাদেশও হয়েছে। সুতরাং প্যারিস তাঁকে ধরিয়ে দিলে নিশ্চয়ই তিনি প্রাণ হারাবেন। রোমিও প্যারিসের কথা গ্রাহ্যমাত্র না ক'রে বলেন, “তুমি যে-ই হও আমায় রাগিও না ; নিজের মঙ্গল চাওত এক্ষুনি আমার সামনে থেকে চ'লে যাও, নইলে টাইব্লেটের মত তোমারও আমার হাতে প্রাণ যাবে।” এ-কথা শুনে ঘৃণায় ও রাগে যার-পর-নাই উত্তেজিত হ'য়ে উঠে প্যারিস রোমিওকে ধরতে গেলেন। তার ফলে দু'জনের মধ্যে ভীষণ বিরোধ উপস্থিত হ'ল এবং শেষে প্রবলপরাক্রান্ত রোমিওর হাতে প্যারিস প্রাণ হারালেন। মরবার আগে প্যারিস রোমিওকে বলেন, “আমি নিতান্ত অভাগা ; যদি আমার উপর তোমার কিছুমাত্র দয়া হয়, তা' হ'লে আমাকে জুলিয়েটের পাশে সমাধি দিও।”

প্যারিস নিহত হ'লে তাঁর মুখের কাছে আলো ধ'রে ভাল ক'রে দেখে রোমিও তাঁকে চিন্তে পারলেন। প্যারিসের সঙ্গেই যে জুলিয়েটের বিয়ের প্রস্তাব স্থির হয়েছিল, মণ্টুয়া থেকে আসবার পথে এ-খবর তিনি শুনেছিলেন। ইনিও যে তাঁরই মত হতভাগ্য এ-কথা বুঝতে পেরে এখন প্যারিসের প্রতি রোমিওর মনে খুব সহানুভূতির একটা ভাব এল। প্যারিসের অন্তিম বাসনা

রোমিও-জুলিয়েট

‘পূর্ণ করবার জন্তে অতি যত্নে তাঁর মৃতদেহ’ তুলে নিয়ে তিনি জুলিয়েটের সমাধির দিকে অগ্রসর হ’লেন।

সমাধি খুলে রোমিও দেখলেন যে, জুলিয়েট তার ভিতর শায়িতা রয়েছেন; তাঁর অলৌকিক রূপরাশি কিছুমাত্র ম্লান হয় নি। রোমিও তন্ময় হ’য়ে সেই রূপরাশি দেখতে লাগলেন। এইভাবে কিছুক্ষণ কাটবার পর তাঁর সঙ্গে যে তীব্র বিষ ছিল তা’ পান ক’রে রোমিও মৃত্যুর কোলে ঢ’লে পড়লেন।

এ-দিকে জুলিয়েট যে-ওষুধ খেয়েছিলেন তার প্রভাব ক্রমেই ক’মে আসছিল এবং তিনি ধীরে ধীরে চেতনা লাভ কচ্ছিলেন। আবার নানা বিপাকে প’ড়ে লরেন্সের প্রেরিত লোক মন্টুয়ায় রোমিওর কাছে পৌঁছতে পারে নি খবর পেয়ে, লরেন্স নিজেই তখন একটি আলো ও একখানি কোদালি নিয়ে জুলিয়েটকে কবর থেকে উদ্ধার করবার জন্তে সমাধিক্ষেত্রে এসে উপস্থিত হ’লেন। কিন্তু সেখানে এসে একটি আলো জ্বলতে দেখে, আর মাটিতে ছ’খানি তরবারি, অনেকটা তাজা রক্ত এবং প্যারিস ও রোমিওর মৃতদেহ প’ড়ে রয়েছে দেখতে পেয়ে লরেন্স অত্যন্ত বিস্মিত হ’লেন। কেমন ক’রে যে এমন অনর্থের সৃষ্টি হ’ল লরেন্স তা’ ভাল ক’রে বুঝে উঠবার আগেই

শেখাপিয়রের গল্প

জুলিয়েট সম্পূর্ণ জ্ঞানলাভ করলেন। সামনেই লরেন্সকে দেখে জুলিয়েটের আগাগোড়া সমস্ত কথাই মনে পড়ল এবং তিনি তাঁকে রোমিওর কথা জিজ্ঞাসা করলেন। কিন্তু বাইরে লোকের শব্দ শুনে লরেন্স জুলিয়েটকে তাড়াতাড়ি তাঁর সঙ্গে চ'লে আসতে বললেন—আরও বললেন, ভগবানের ইচ্ছা নয় যে, তাঁদের মনোবাঞ্ছা পূর্ণ হয়, তাই তাঁদের সকল চেষ্টা ব্যর্থ হ'য়ে মহা অনর্থের সূত্রপাত হয়েছে। জুলিয়েট কিন্তু সে-স্থান ত্যাগ ক'রে যেতে স্বীকার হ'লেন না; ও-দিকে লোকের কোলাহলও ক্রমেই নিকটে আসছিল; সে-জন্মে লরেন্সও আর সেখানে থাকতে সাহস করলেন না—সেখান থেকে স'রে প'ড়লেন।

এতক্ষণ লরেন্সের সঙ্গে কথাবার্তায় ব্যস্ত থাকায় জুলিয়েট রোমিওকে দেখতে পান নি; এখন প্রথমেই তাঁর রোমিওর মৃতদেহের উপর দৃষ্টি পড়ল। রোমিওর হাতে একটা পাত্রের মত দেখে তাঁর আর বুঝতে বাকি রইল না যে, জুলিয়েট মরেছে মনে ক'রেই বিষ খেয়ে রোমিও আত্মহত্যা করেছেন। রোমিওকে ছেড়ে বেঁচে থাকা তাঁর পক্ষে বিড়ম্বনা মাত্র—এমন কি অসম্ভব; জুলিয়েট তাই একটুও দেরী না ক'রে রোমিওর ছোরা-

রোমিও-জুলিয়েট

খানা আমূল নিজের বুকে বসিয়ে 'দিয়ে স্বামীর সহগামিনী হ'লেন ।

প্যারিসের একজন ছোকরা চাকর তাঁর সঙ্গে ফুল নিয়ে এসেছিল । তাকে বাইরে অপেক্ষা করতে ব'লে তিনি সমাধি-ক্ষেত্রে ঢুকেছিলেন । পরে রোমিও ও প্যারিসের মধ্যে যুদ্ধ হ'তে দেখে সে ভয় পেয়ে সহরে ফিরে গিয়ে এই খবর দেয় এবং লোকের মুখে মুখে সারা সহরে সে-খবর ছড়িয়ে পড়ে । ঠিক যে কি হ'য়েছে তা' কেউ বড়-একটা বুঝে উঠতে পারলে না ; কিন্তু অনেকেই প্যারিস, রোমিও ও জুলিয়েটের নাম ক'রে চেষ্টাতে চেষ্টাতে ক্যাপিউলেটদের সমাধিক্ষেত্রের দিকে রওনা হ'ল । এই গোলমালে ক্যাপিউলেট-কর্তা, মণ্টেগ-কর্তা এবং ভেরোনারাজেরও নিদ্রা ভঙ্গ হ'ল ; ব্যাপার কি জান্-বার জন্যে তাঁরাও সমাধিক্ষেত্রে এসে উপস্থিত হ'লেন ।

এ-দিকে অনবরত অশ্রুবর্ষণ করতে করতে লরেন্স সেখান থেকে পালাতে যাচ্ছিলেন ; সন্দেহ হওয়ায় চৌকি-দারেরা তাঁকে গ্রেপ্তার ক'রে রাজার কাছে এনে হাজির করলে । তখন সমাধিস্থল লোকে লোকারণ্য হ'য়ে গেছে । রাজা লরেন্সকে এই ভীষণ ছবিবর্ণার কথা তিনি যা' জানেন তা' খুলে বলবার জন্যে আদেশ করলেন ।

শেখপিয়রের গল্প

লরেন্স যা' জানতেন কাঁপ্তে কাঁপ্তে সবই বলেন ।
বাকীটুকু প্যারিসের ছোকরা চাকরের ও রোমিওর সাথে
যে-চাকর এসেছিল তার কাছ থেকে শোনা গেল ।
রোমিওর চাকর মন্টেগ-কর্তাকে একখানা চিঠিও দিলে ।
পত্রে সব লিখে জানিয়ে রোমিও তাঁর মা-বাপের কাছে
ক্ষমা প্রার্থনা করেছিলেন । রোমিও ও জুলিয়েটের মধ্যে
যে সত্যিকার ভালবাসা জন্মেছিল, লরেন্স যে মন্টেগ ও
ক্যাপিউলেট—এই উভয় পরিবারের মঙ্গল কামনায়ই
তাঁদের বিয়ে দিয়েছিলেন ও নানাপ্রকারে তাঁদের সাহায্য
করেছিলেন, তা' সকলেই বুঝতে পারলেন । সব শুনে
উপস্থিত সকলেই খুব দুঃখিত হ'লেন ; মন্টেগ ও
ক্যাপিউলেট কর্তাদেরও দুঃখের ও আত্মগ্লানির পরিসীমা
থাকল না । তখন মন্টেগ ও ক্যাপিউলেট কর্তাদের
দিকে ফিরে ভেরোনারাজ বল্লেন, যে, এ তাঁদের
অমানুষিক শত্রুতারই বিষময় ফল ; প্রিয়তম পুত্রকন্যার
ভালবাসার মধ্য দিয়ে এমনি ক'রেই ভগবান তাঁদের
সেই অস্বাভাবিক বিচ্ছেদের জন্তে শাস্তি দিলেন ।

আজ মন্টেগ ও ক্যাপিউলেট পরিবারের বহুদিনের
শত্রুতার শেষ হ'ল ; পুত্রকন্যার মৃতদেহের সামনে
দাঁড়িয়ে দুই শোকাকুল বৃদ্ধ পরস্পরকে ভাই ব'লে

রোমিও-জুলিয়েট

আলিঙ্গন করলেন। তারপর মণ্টেগ-কর্ত্তা বলেন, যে, তাঁর সাথী বোমা জুলিয়েটের স্মৃতি চিরদিন ভেরোনার লোকের মনে জাগিয়ে রাখবার জন্মে তিনি তাঁর একটি সুবর্ণ প্রতিমা তৈরী করিয়ে দিবেন। ক্যাপিউলেট-কর্ত্তা বলেন, তিনিও রোমিওর একটি সুবর্ণ মূর্ত্তি স্থাপিত করে তাঁর স্মৃতিরক্ষার ব্যবস্থা করবেন।

আজীবন বিষম বিরোধে কাটিয়ে, তার পরিণামে পুত্রকন্যা বিসর্জন দিয়ে, শেষকালে বুড়া বয়সে মণ্টেগ ও ক্যাপিউলেট-কর্ত্তার মনোমালিণ্য ও শত্রুতা দূর হ'ল ; ছ'পরিবারে সখ্য স্থাপিত হ'ল। ভেরোনার লোকেরাও স্বস্তির নিঃশ্বাস ফেলে বাঁচল।

সব ভাল যার শেষ ভাল

রোজিলনের কাউন্ট বারট্রাম সম্প্রতি পিতার মৃত্যুতে তাঁর উপাধি ও সম্পত্তির অধিকারী হ'য়েছিলেন। ফ্রান্সের রাজার সঙ্গে বারট্রামের পিতার বিশেষ বন্ধুত্ব ছিল। বন্ধুর মৃত্যুর কথা শুনে তিনি তাঁর ছেলে যুবক বারট্রামকে বিশেষরূপে অনুগৃহীত ও আশ্রয়দানে আপ্যায়িত করবার সঙ্কল্প করলেন এবং তাঁকে আপন রাজধানী প্যারিস নগরে আনবার জন্তে লর্ড লাফু নামে একজন সম্ভ্রান্ত ও প্রবীণ সভাসদকে রোজিলনের পাঠিয়ে দিলেন।

বারট্রাম তাঁর জননী বিধবা কাউন্টেসের নিকট বাস করছিলেন। এমন সময় এক দিন লর্ড লাফু সেখানে এসে উপস্থিত হ'লেন ও বারট্রামকে রাজার অভিলাষের কথা জানালেন। সে-সময়ে ফ্রান্সের রাজার অপ্রতিহত ক্ষমতা ছিল; রাজ্যমধ্যে তাঁর ইচ্ছার বিরুদ্ধে কোন কাজ করবে এমন ক্ষমতা কারো ছিল না। রাজার সাদর নিমন্ত্রণও রাজাজ্ঞা বা অবশ্য পালনীয় আদেশরূপে গণ্য হ'ত এবং যত উচ্চপদস্থ প্রজাই হোন না কেন, কেউ সে-আদেশ অমান্য করতে পারতেন না।

সব ভাল যার শেষ ভাল

সুতরাং যদিও কাউন্টেস তখনও পর্যন্ত স্বামীর শোব ভুলতে পারেন নি—আর প্রিয় পুত্রকে বিদায় দিতেও তাঁর খুবই কষ্ট হ'চ্ছিল, তবুও তিনি রাজাদেশ অমান্ত করতে সাহস করলেন না। তিনি তখনই বারট্রামকে রাজসন্দর্শনে যাবার জন্তে অনুমতি দিলেন। কিন্তু এতে যে তাঁর বিরূপ কষ্ট হ'চ্ছিল, তা' লর্ড লাফু বেশই বুঝতে পারছিলেন। তাই তিনি কাউন্টেসকে সাহসনা দিয়ে বলেন, “মা, আপনাব পুত্রের জন্তে আপনি কোনরূপ চিন্তা করবেন না। কাউন্ট বারট্রাম আমাদের সদাশয় রাজার নিকট যাচ্ছেন। তিনি সেখানে গিয়ে বিশেষ উপকৃত হবেন ব'লেই আমার বিশ্বাস। এখন থেকে আমাদের রাজা তাঁর পিতৃস্থানীয় হ'লেন—তিনি পিতার স্থায় সর্বদা কাউন্টের তত্ত্বাবধান করবেন।”— এই সাহসনাবাক্যে কাউন্টেস একটু স্থির হ'লেন। তখন লাফু তাঁকে জানালেন যে, রাজা একটি উৎকট ব্যাধিতে ভুগছেন এবং চিকিৎসকেরা সে-বোগ ছুরারোগ্য ব'লে মত প্রকাশ কবেছেন। এ-কথা শুনে কাউন্টেস খুবই ব্যথিতা হ'লেন ও তাঁর পরিচর্যার জন্তে হেলেনা নামে যে যুবতীটি সেখানে উপস্থিত ছিলেন তাঁকে দেখিয়ে গভীর দুঃখ প্রকাশ ক'রে বলেন, “আহা, আজ

শেঙ্গপিয়রের গল্প

যদি এই হেলেনার পিতা বেঁচে থাকতেন!—বেঁচে থাকলে তিনি নিশ্চয়ই মহারাজকে রোগমুক্ত ক'রতে পারতেন।” তারপর তিনি লাফুকে হেলেনার সবিশেষ পরিচয় দিয়ে বলেন—“হেলেনা আমাদের দেশ-প্রসিদ্ধ ডাক্তার জেরাড-ডি-নার্বণের একমাত্র কন্যা। মৃত্যু-কালে তিনি একে আমার হাতে সঁপে দিয়ে গেছেন—আর সেই থেকে হেলেনা আমার কাছেই আছে। হেলেনা বড় ভাল মেয়ে ও খুব ধর্মশীলা,—মেয়েটি বাপের কাছে থেকেই এই মহৎ গুণগুলি পেয়েছে।”

কাউন্টেস যখন লাফুকে হেলেনার পরিচয় দিচ্ছিলেন, তখন হেলেনা নীরবে কেঁদে আকুল হচ্ছিলেন। এখন কাউন্টেস তা বুঝতে পারলেন এবং তাঁকে সান্ত্বনা দিয়ে মৃদু তিরস্কারের স্বরে বলেন—“ছিঃ মা, সব সময়েই কি তোমার বাবার কথা ভেবে ভেবে অমন ক'রে কাঁদতে আছে?”

এদিকে বারট্রামের ফ্রান্স যাত্রার সমস্ত আয়োজন ঠিক হ'লে তিনি তাঁর মায়ের কাছে বিদায় নিতে এলেন। কাউন্টেস সজলনয়নে আশীর্বাদ করতে করতে প্রাণতুল্য পুত্রকে বিদায় দিলেন এবং তাঁকে লাফুর হাতে সঁপে দিয়ে বলেন—“মহাশয়, আমার

সব ভাল যার শেষ ভাল

বারট্রাম রাজসভার রীতিনীতি কিছুই জানে না—আপনি তাকে সব সময় উপদেশ দিয়ে চালিয়ে নেবেন।”

ভদ্রতার খাতিরে বারট্রাম, সর্বশেষে হেলেনার কাছে থেকেও সংক্ষেপে বিদায় নিলেন ও তাঁকে বলেন, “হেলেনা, মার সুখ-সুবিধার দিকে বিশেষ দৃষ্টি রেখো—দেখো, তাঁর সেবা ও যত্নের যেন কোনরূপ ক্রটি না হয়। ভগবান্ তোমায় সুখী করুন।”—তারপর বারট্রাম লর্ড লাফুর সঙ্গে ফ্রান্স যাত্রা করলেন।

হেলেনা অনেক দিন থেকেই বারট্রামকে ভালবাসতেন। কাউন্টেস, লাফুর সঙ্গে তাঁর পরিচয় করে দেবার সময় তিনি যে নীরবে কেঁদে আকুল হ’ছিলেন সে তাঁর পিতার কথা স্মরণ করে নয়—বারট্রামের ফ্রান্স যাত্রাই তার কারণ। হেলেনা তাঁর পিতাকে ভালবাসতেন বটে, কিন্তু বারট্রামের প্রতি তাঁর ভালবাসা ছিল আরও গভীর। এই নূতন ভালবাসায় তাঁর মনপ্রাণ অধিকার করে নিয়েছিল—আর তাতে করে তিনি তাঁর পিতার শোকও ভুলতে পেরেছিলেন।—কিন্তু বারট্রামের ভালবাসা লাভ করা তাঁর পক্ষে সম্ভব কি? বারট্রাম রোজিলনের কাউন্ট—ফ্রান্সের একটি অতি প্রাচীন ও সম্ভ্রান্ত বংশের তিনি

শেখাপিয়রের গল্প

বংশধর। আর হেলেনা?—সম্রাটবংশে জন্ম হ'লেও মানসম্মত ও বংশমর্যাদায় বারট্রামের সঙ্গে তাঁর তুলনাই হ'তে পারে না। তাই হেলেনা কোন দিনই বেশী কিছু আশা করেন নি। প্রভুকে ভৃত্য যেরূপ সম্মান ও শ্রদ্ধা করে, তিনিও বারট্রামকে তাই ক'রতেন এবং দাসীরূপে থেকে তাঁর সেবা ক'রে জীবন কাটাবেন, এ ছাড়া অন্য কোন উচ্চ আকাঙ্ক্ষাকে মনে স্থান দিতে তিনি সাহস করতেন না। নিজের ও বারট্রামের ভেতরকার এই পার্থক্যকে তিনি এতই বেশী বলে মনে ক'রতেন যে, তিনি মনে মনে বলতেন—“কাউন্ট বারট্রাম আমার চেয়ে এতদূর শ্রেষ্ঠ যে, তাঁকে বিয়ে ক'রবার আশা করা ও সুনীল আকাশের একটি উজ্জ্বল নক্ষত্রকে ভালবেসে তাকে বিয়ে ক'রবার আশা করা, আমার পক্ষে একইরূপ অসম্ভব।”

বারট্রামকে পতিরূপে লাভ করা তাঁর পক্ষে অসম্ভব হ'লেও এতদিন সকল সময়েই তিনি তাঁকে চোখ ভরে দেখে পরিতৃপ্ত হ'তে পারতেন; কিন্তু এখন যে সেটুকু থেকেও তিনি বঞ্চিত হ'চ্ছেন! তাই বারট্রামের অনুপস্থিতি তাঁর পক্ষে গভীর শোক ও মহাছঃখের কারণ হ'য়ে উঠল।

সব ভাল যার শেষ ভাল

জেরাড-ডি-নার্‌বণ মৃত্যুসময়ে কয়েকটি অমূল্য ও
আশ্চর্য্য গুণবিশিষ্ট ঔষধের ব্যবস্থাপত্র ছাড়া মেয়ের
জন্ম অন্য কোন সম্পত্তি রেখে যেতে পারেন নি।
চিকিৎসাশাস্ত্রে গভীর জ্ঞান ও বহুদর্শিতার ফলে তিনি
ঐ অব্যর্থ ঔষধগুলি অবিষ্কার ক'রতে পেরেছিলেন।
রাজা বর্তমানে যে-অসুখে ভুগছেন ব'লে লাফু
কাউন্টসকে বলছিলেন, অন্যান্য ব্যবস্থাপত্রের ভিতর সেই
রোগের ঔষধের ব্যবস্থাপত্রও হেলেনার নিকটে ছিল।
হেলেনা স্বভাবতঃই অতি নম্রপ্রকৃতি ; এতদিন কোন
উচ্চ আশাকেই তিনি মনে স্থান দেন নি, নীরবেই
বারট্রামকে ভালবেসে এসেছেন। আজ রাজার
অসুখের কথা শুনে তাঁর মনে এক ছুরাকাজ্জ্বার উদ্রেক
হ'ল। তিনি সঙ্কল্প ক'রলেন, প্যারিসে গিয়ে রাজার
চিকিৎসার ভার নেবেন ও তাঁকে রোগমুক্ত ক'রবেন।
কিন্তু রাজা ও রাজচিকিৎসকগণ আগে থেকেই তাঁর
ব্যাধিকে ছুশ্চিকিৎস্য ব'লে স্থির ক'রে রেখেছেন ;
সুতরাং হেলেনার কাছে এই অব্যর্থ ঔষধের ব্যবস্থা-
পত্র থাকলেও এবং তিনি রাজাকে আরোগ্য ক'রবার
ভার নিতে চাইলেও তাঁরা যে তাঁর মত একজন
অশিক্ষিতা—দীন-হীনা কুমারীর কথায় বিশ্বাস করবেন,

শেখপিয়রের গল্প

এ-কথা তাঁর সম্ভবপর ব'লে মনে হ'চ্ছিল না। হেলেনার পিতা তাঁর সময়ের সর্বাপেক্ষা প্রসিদ্ধ চিকিৎসক ছিলেন; কিন্তু রাজাকে চিকিৎসা করার অনুমতি পেলে তাঁকে বোগমুক্ত ক'রবার যেরূপ দৃঢ় আশা হেলেনা মনে মনে পোষণ ক'চ্ছিলেন, তাঁর পিতা বেঁচে থাকলে তিনি নিজেও হয়তো সে-সম্বন্ধে ততটা সূনিশ্চয় হ'তে পারতেন না। হেলেনার দৃঢ় বিশ্বাস হ'য়েছিল যে, তাঁর সৌভাগ্যক্রমেই ঐ উৎকৃষ্ট ঔষধটি তিনি তাঁর পিতার কাছে থেকে পেয়েছেন— আর ঐ ঔষধ থেকেই ভবিষ্যতে অদৃষ্ট তাঁর উপর সূপ্রসন্ন হবে। হয়তো এ থেকে তাঁর স্বপ্নও সফল হ'তে পারে এবং একদিন তিনি কাউন্ট রোজিলনের পত্নী হবার সৌভাগ্যও লাভ ক'ব'তে পারেন।

বারট্রাম প্যারিস যাত্রা ক'রবার অল্পদিন পরেই হঠাৎ একদিন হেলেনার গোপন প্রেমেব কথা সবাই জানতে পারল। হেলেনা নিজেই ব'লে বারট্রামের কথা ভাব'ছিলেন, আব আপন মনে কত কি ব'লে তাঁর প্রতি গভীর ভালবাসার কথা ও তাঁর অনুসরণে প্যারিসে যাবার সঙ্কল্পের কথা প্রকাশ ক'চ্ছিলেন। বাড়ীর ভাগুরী আড়াল থেকে সে-সব শুন্তে পেয়ে

সব ভাল যার শেষ ভাল

কাউন্টেকে তা জানাল'। সব কথা শুনে কাউন্টেক হেলেনাকে ডেকে এনে, আদর ক'রে কাছে বসিয়ে, তিনি বারট্রামকে সত্যি সত্যি ভালবাসেন কিনা এ-কথা জানবার জন্তে নানারূপ প্রশ্ন 'ক'রতে লাগলেন। কাউন্টেক তাঁর গোপন ভালবাসার কথা জানতে পেরেছেন মনে ক'রে হেলেনা খুব ভয় খেয়ে গেলেন এবং তাঁর প্রশ্নগুলির সহজ সরল উত্তর না দিয়ে প্রকৃত কথা গোপন ক'রবার চেষ্টা ক'রতে লাগলেন। কাউন্টেক হেলেনার আকার-ইঙ্গিতে বেশই বুঝতে পারলেন যে, তিনি মনের ভাব গোপন ক'রছেন। কিন্তু কাউন্টেক যখন খুবই পীড়াপীড়ি ক'রতে লাগলেন, তখন হেলেনা তাঁর সামনে নতজানু হ'য়ে আপনার ভালবাসার কথা স্বীকার ক'রলেন ও করজোড়ে তার জন্তে ক্ষমা প্রার্থনা ক'রে বললেন—
“আমাদের পরস্পরের অবস্থার পার্থক্য সম্বন্ধে আমার বেশই জ্ঞান আছে ; আমাদের মিলনও যে সম্ভব-পর নয় তাও আমি বেশই জানি ; আর আমি তাঁকে ভালবাসি এ-কথারও কিছুই বারট্রাম জানেন না।” কাউন্টেক জিজ্ঞাসা ক'রলেন—“আচ্ছা মা, তুমি কি সম্প্রতি প্যারিসে যাবার সঙ্কল্প কর নি ?”

শেষপিয়রের গল্প

—লাফুকে রাজার রোগের কথা বলতে শুনে, তাঁকে রোগমুক্ত করতে পারবেন মনে করে হেলেনা যে ঐরূপ সঙ্কল্প করেছেন, সে-কথা তিনি স্বীকার করলেন। কাউন্টেস বলেন—“সত্যি করে বল ত মা, তুমি কি শুধু ঐ উদ্দেশ্যেই প্যারিসে যাবার সঙ্কল্প করেছ?” এই প্রশ্নের উত্তরে হেলেনা তাঁর প্যারিসে যাবার প্রকৃত উদ্দেশ্য সম্বন্ধে সব কথা কাউন্টেসকে খুলে জানালেন ও বলেন—“মা, আমার প্রভু—আপনার পুত্রের কাছে যাবার জন্যই আমি এরূপ সঙ্কল্প করেছি। তা’ না হ’লে প্যারিসে যাবার ইচ্ছা, রাজার অসুখ ও তার ঔষধের কথা এর আগে আর কখনও আমার মনে আসে নি।” কাউন্টেস ভাল-মন্দ কিছু না বলে হেলেনার সকল কথাই শুনলেন এবং ঔষধটিতে রাজার কোন উপকার হ’বার সম্ভাবনা আছে কিনা সে-সম্বন্ধে তাঁকে নানারূপ প্রশ্ন করে জানতে পারলেন যে, ডাক্তার জিরাড-ডি-নারবণের আবিষ্কৃত ঔষধগুলির মধ্যে ঐটিকেই তিনি সব চেয়ে গুল্যবান বলে মনে করতেন। মৃত্যুশয্যায় তিনি তাঁর একমাত্র কন্যাকে সকল ঔষধগুলির ব্যবস্থাপত্রই দিয়ে গেছেন। হেলেনাকে কাউন্টেস সত্যি সত্যি

সব ভাল যার শেষ ভাল

ভালবাসতেন, আর ডাক্তারও মৃত্যুসময়ে তাঁকে তাঁর হাতে সঁপে দিয়ে গেছেন এবং তাঁর সুখদুঃখ ও রাজার জীবন হেলেনার মতলবসিদ্ধির উপর নির্ভর ক'রছে বুঝতে পেরে কাউন্টেস হেলেনাকে আপন ইচ্ছামত কাজ ক'রবার অনুমতি দিলেন। তিনি প্রচুর অর্থ ও প্রয়োজনমত লোকজন সঙ্গে দিয়ে হেলেনার প্যারিস যাত্রার বন্দোবস্ত ক'রে দিলেন। যাত্রার সময় কাউন্টেস হেলেনাকে আশীর্বাদ ক'রে বলেন —“মা, ভগবান তোমার মনোবাঞ্ছা পূর্ণ করুন!”—তাঁর এই আন্তরিক আশীর্বাদ মাথায় নিয়ে হেলেনা প্যারিস অভিমুখে রওনা হ'লেন।

প্যারিসে পৌঁছে হেলেনা তাঁদের সেই পুরাণো বন্ধু লর্ড লাফুর সাহায্যে রাজার সঙ্গে দেখা ক'রবার অনুমতি পেলেন। কিন্তু রাজার সাক্ষাৎলাভ ক'রেও নিজের মতলবসিদ্ধির জন্মে হেলেনাকে বেশ বেগ পেতে হ'ল, কারণ রাজা প্রথমে কিছুতেই তাঁর ঔষধ ব্যবহার ক'রে দেখতে সম্মত হ'চ্ছিলেন না। অবশেষে হেলেনা রাজাকে জানালেন যে, তিনি দেশবিখ্যাত ডাক্তার জিরাড-ডিনারবণের একমাত্র কন্যা, আর পিতার কাছে থেকেই তাঁর সমস্ত বিদ্যা ও জীবনের অভিজ্ঞতার ফলস্বরূপ এই

শেক্সপিয়রের গল্প

অমূল্য ঔষধটি তিনি পেয়েছেন। কুর্তে... স্বামী...
বলেন যে, যদি এই ঔষধে ছ'দিনের মধ্যে রাজাকে
সম্পূর্ণ নীরোগ ও সুস্থ ক'রে দিতে না পারেন, তা' হ'লে
তিনি স্বেচ্ছায় মৃত্যুদণ্ড বরণ ক'রে নেবেন। ডাক্তার
জিরাড-ডি-নারবনের সুযশ ও কৃতিত্বের কথা রাজা
ভালরূপই জানতেন। সুতরাং শেষটায় তিনি হেলেনার
প্রস্তাবে সম্মত হ'লেন এবং তাঁর সঙ্গে এই সর্ত থাকল'
যে, যদি রাজা আরোগ্যলাভ না করেন, তা' হ'লে ছ'দিন
পরে হেলেনাকে প্রাণদণ্ডে দণ্ডিত করা হবে। কিন্তু যদি
তিনি সত্যি সত্যি রাজাকে ঐ-সময়ের ভেতর রোগ হ'তে
মুক্ত ক'রতে পারেন তা' হ'লে পুরস্কারস্বরূপ রাজকুমার-
গণ ব্যতীত সমস্ত ফ্রান্সদেশের যে-কোন ব্যক্তিকে
তিনি পতিরূপে লাভ করতে পারবেন; হেলেনার
প্রার্থনানুযায়ী রাজা এইরূপ অঙ্গীকার ক'রলেন।

এ-দিকে সেই আশ্চর্য্য ঔষধের গুণে ছ'দিনের
পূর্বেই রাজা সম্পূর্ণ আরোগ্য লাভ ক'রলেন। তখন
তিনি রাজ্যের সম্ভ্রান্ত ও গণ্যমান্য সকল অবিবাহিত
যুবককে আহ্বান ক'রে রাজসভায় সমবেত ক'রলেন
এবং তাঁদের মধ্যে থেকে আপন ইচ্ছামত একজনকে
পতিত্ব বরণ ক'রবার জগ্যে হেলেনাকে অনুমতি

ভাল যার শেষ ভাল

ভালবাসতেন, র কাউন্ট বারট্রামও অবশ্য তাঁদের মধ্যে ছিলেন ; সুতরাং হেলেনা আর কারো প্রতি লক্ষ্যমাত্র না ক'রে তাঁকেই নির্বাচন করলেন । রাজা তখন বারট্রামকে বল্লেন, “বারট্রাম, তুমি এ'কে পত্নী-রূপে গ্রহণ ক'রে সুখী হও, ইহাই আমার ইচ্ছা ।” বারট্রাম কিন্তু হেলেনাকে বিয়ে ক'রতে সম্মত হ'লেন না ; তিনি বল্লেন, “হেলেনা একজন সামান্য চিকিৎসকের কন্যা. আমাদের অর্থে ও আমার জননীর আশ্রয়ে প্রতিপালিতা : কুলে শীলে ধনে মানে কোন প্রকারেই সে আমার উপযুক্ত নয়—সুতরাং আমি তাকে কিছুতেই বিয়ে ক'রতে পারবো না ।” বারট্রামের এই সব কথা শুনে হেলেনা রাজাকে বল্লেন—“মহারাজ, আপনি যে আরোগ্যলাভ ক'রেছেন তাতেই আমি খুসী হ'য়েছি—আমার অণু কোন পুরস্কারের প্রয়োজন নেই ।” রাজা সে-কথা শুনলেন না ; তিনি বারট্রামকে বল্লেন—“বারট্রাম, আমি আদেশ ক'চ্ছি, তুমি হেলেনাকে স্ত্রীরূপে গ্রহণ কর ।” বারট্রাম রাজার আদেশ অমান্য ক'রতে সাহস ক'রলেন না ; নিতান্ত অনিচ্ছাসত্ত্বেও সেই দিনই তিনি হেলেনাকে যথারীতি বিয়ে ক'রলেন । কিন্তু অভিলষিত স্বামী লাভ ক'রেও এই বিয়েতে

শেখাপিয়রের গল্প

হেলেনা সুখী হ'তে পারলেন না, কারণ স্বামীর ভালবাসা লাভ করা তাঁর ভাগ্যে ঘটল না।

বিয়ের পরই বারট্রাম হেলেনাকে দিয়ে রাজার কাছ থেকে দেশে যাবার অনুমতি প্রার্থনা ক'রলেন। রাজার অনুমতি লাভ ক'রে হেলেনা যখন স্বামীকে সে-খবর জানাতে এলেন, তখন বারট্রাম বল্লেন—“দেখ হেলেনা, আমি এই হঠাৎ বিয়ের জন্তে একেবারেই প্রস্তুত ছিলাম না ; এতে আমাকে বড়ই বিচলিত ক'রে তুলেছে—সুতরাং আমি এখন যা' ক'র্বো তাতে তুমি আশ্চর্য হ'য়ো না। তুমি এক কাজ কর। একলা দেশে ফিরে গিয়ে আমার মায়ের কাছে থাক গে।”—বারট্রামের আচরণে হেলেনা আশ্চর্য হ'লেন না বটে, কিন্তু তিনি মনে খুবই কষ্ট পেলেন, আর বেশই বুঝতে পারলেন যে, বারট্রাম প্রকারান্তরে তাঁকে পরিত্যাগ ক'রে চ'লে যাচ্ছেন। তিনি স্বামীর নিকটে অনেক কাকুতিমিনতি ক'রলেন, কিন্তু অহঙ্কারী বারট্রামের মন কিছুতেই গল্লো না। তিনি বিদায়কালে ভাল মুখে হেলেনাকে ছ'টি কথামাত্রও না ব'লে সেখান থেকে চ'লে গেলেন।

দুঃখিনী হেলেনা যে-সঙ্কল্প নিয়ে প্যারিসে গিয়ে-ছিলেন তা' সফল হ'য়েছিল ; তিনি রাজাকে রোগমুক্ত

সব ভাল যার শেষ ভাল

ক'রে বারট্রামকে পতিরূপে লাভও করেছিলেন, কিন্তু আজ আবার তাঁকে বিষণ্ণ হৃদয়ে রোজিলনে শাণ্ডীর কাছে ফিরে আসতে হ'লো। সেখানে ফিরে তিনি বারট্রামের কাছে থেকে যে-চিঠি পেলেন তাতে তাঁর মনপ্রাণ আরও ভেঙ্গে প'ড়লো।

বারট্রাম লিখেছিলেন—“হেলেনা, যে-দিন তুমি আমার হাতের আংটি লাভ ক'র্বে, সেই দিন আমাকে স্বামী ব'লে সম্বোধন ক'রো ; কিন্তু সে-দিন তোমার জীবনে কোনো দিনই আসবে না। যতদিন আমার স্ত্রী জীবিত থাকবে ততদিন ফ্রান্সের সঙ্গে আমার কোন সম্পর্ক নেই।”

কাউন্টেস হেলেনাকে খুবই আদর ক'রে ঘরে নিয়ে গেলেন ও সকল কথা শুনে তাঁকে নানাপ্রকারে প্রবোধ দিতে চেষ্টা ক'রতে লাগলেন, কিন্তু কিছুতেই পুত্র-বধুকে একটুকুও প্রফুল্ল ক'রতে পারলেন না।

পরদিন সকালবেলা হেলেনাকে আর কোথাও দেখতে পাওয়া গেল না। কিন্তু কাউন্টেসের নামে লেখা হেলেনার একখানা চিঠি হ'তে তাঁর হঠাৎ মে-স্থান ছেড়ে চ'লে যাবার কারণ জানতে পারা গেল। এই চিঠিতে তিনি লিখেছিলেন—“মা, আমার জগেই যে

শেক্সপিয়ারের গল্প

আজ আপনার প্রিয়তম পুত্র দেশত্যাগী, এ আমার পক্ষে খুবই দুঃখের—কষ্টের কারণ হ'য়েছে। আর এই অপরাধের প্রায়শ্চিত্তের জন্মেই আমি সেন্ট জ্যাকোয়েস-লি-গ্র্যাণ্ডের পবিত্র মন্দিরের উদ্দেশ্যে তীর্থযাত্রা ক'চ্ছি। আমার একটি অনুরোধ—আপনার গৃহ ত্যাগ ক'রে আমি যে জন্মের মত চলে যাচ্ছি, এ-খবরটা যে ক'রেই হোক আপনার পুত্রকে দিবেন।”

এ-দিকে বারট্রাম প্যারিস পরিত্যাগ ক'রে ফ্লোরেন্সে গিয়ে সেখানকার ডিউকের সৈন্যবিভাগে প্রবেশ ক'রলেন এবং একটি যুদ্ধে বিশেষ সাহসিকতার পরিচয় দিয়ে নিজেকে খুবই বিখ্যাত ক'রে তুললেন। সেই সময়ে একদিন তিনি তাঁর মায়ের চিঠিতে হেলেনা যে চির-কালের জন্মে তাঁদের গৃহ ত্যাগ ক'রে চ'লে গেছেন, এই সু-খবরটি পেলেন। এই খবর পেয়ে বারট্রাম বাড়ীতে ফিরে যাবার আয়োজন ক'চ্ছেন এমন সময় স্বয়ং হেলেনা ফ্লোরেন্স নগরে এসে উপস্থিত হ'লেন।

সেন্ট জ্যাকোয়েস-লি-গ্র্যাণ্ডের তীর্থক্ষেত্রে যেতে হ'লে ফ্লোরেন্স নগর দিয়ে যেতে হোতো। হেলেনাও সেই তীর্থযাত্রার পথেই ফ্লোরেন্সে এসে উপস্থিত হ'য়েছিলেন। সেখানে এসে তিনি শুন্তে পেলেন যে,

সব ভাল যার শেষ ভাল

সেখানকার একজন দানশীলা বিধবা ঐ তীর্থযাত্রী স্ত্রীলোকগণকে নিজ বাটীতে আশ্রয় দিয়ে অতি যত্নের সঙ্গে তাঁদের স্নানাহারের ব্যবস্থা ক'রে দিয়ে থাকেন। সুতরাং হেলেনাও ঐ বিধবার বাটীতে গেলেন। বিধবাও হেলেনাকে পরম আদরে অভ্যর্থনা ক'রলেন এবং সেই বিখ্যাত নগরে দেখনার মত যা'-কিছু আছে সব দেখে যেতে হেলেনাকে অনুরোধ ক'রলেন। তিনি হেলেনাকে বলেন যে, ডিউকের সৈন্যদলটিই সর্বপ্রথমে দেখা উচিত, আর ঐ সৈন্যদলে হেলেনার স্বদেশবাসী কাউন্ট রোজিলনও আছেন এবং তিনি নানা যুদ্ধে অশেষ বীরত্বের পরিচয় দিয়ে এখন অতি উচ্চপদে অধিষ্ঠিত হ'য়েছেন।—সেখানে তাঁর প্রিয়তম বারট্রামকে দেখতে পাবেন শুনে হেলেনা অতি আগ্রহের সঙ্গে সৈন্যদল দর্শনে চ'ল্লেন। বিধবা ত আর হেলেনার প্রকৃত পরিচয় জানেন না, তাই পথে যেতে যেতে তিনি তাঁকে বারট্রামের সঙ্গকে যা'-কিছু জানেন সব বলতে লাগলেন এবং এখানে এসে বারট্রাম যে তাঁর কন্যা ডায়োনাকে দেখে তাঁর প্রতি খুব অনুরক্ত হ'য়েছেন, সে কথাও বলেন। তিনি আরও বলেন যে, বারট্রাম প্রতিরাতে তাঁর কন্যার জানালার নীচে এসে নানা কথা

শেক্সপিয়ারের গল্প

ব'লে ডায়েনার প্রতি তাঁর ভালবাসা প্রকাশ ক'রে থাকেন—বিশেষতঃ আগামী কাল ভোরে তিনি স্বদেশ যাত্রা ক'রবেন ব'লে গত রাতে তিনি ডায়েনাকে তাঁর ভালবাসা প্রত্যাখ্যান না ক'রবার জন্তে খুবই পীড়াপীড়ি ক'রেছিলেন, কিন্তু তিনি বিবাহিত ব'লে ডায়েনা তাঁর কথায় কানও দেন নি।

তাঁর প্রিয়তম বারট্রাম ডায়েনাকে ভালবাসেন শুনে প্রথমটায় হেলেনা মনে খুবই কষ্ট পেলেন, কিন্তু পরে বারট্রামকে লাভ করবার একটি উপায়ের কথা তাঁর মনে পড়ায় তিনি ধৈর্যধারণ ক'রে আপনার প্রকৃত পরিচয় বিধবা ও তাঁর কন্যাকে জানালেন এবং তাঁকে পতিলাভে সাহায্য ক'রবার জন্তে তাঁদের অনুরোধ ক'রলেন। তাঁর ছুঃখে ছুঃখিতা হ'য়ে বিধবা ও তাঁর কন্যা তাঁদের সাধামত হেলেনাকে সাহায্য ক'রতে প্রতিশ্রুত হ'লেন। তখন হেলেনা তাঁদের বললেন—
“আমার স্বামী আমাকে বলেছিলেন যে, কোনদিন যদি আমি তাঁর হাতের আংটি লাভ ক'রতে পারি, তা' হ'লেই তিনি আমাকে গ্রহণ ক'রবেন—তা' ছাড়া আর কোন রকমেই তিনি আমাকে স্ত্রী ব'লে স্বীকার করবেন না। আজ যখন তিনি ডায়েনার ঘরের জানালার

সব ভাল যার শেষ ভাল

নীচে আসবেন, তখন যদি আপনারা তাঁকে আপনাদের বাড়ীতে আনার এবং আমাকে ডায়েনা ব'লে পরিচয় দিয়ে তাঁর সঙ্গে ডায়েনার ঘরে থাকবার অনুমতি দেন, তা' হ'লে হয়তো আমি তাঁর আংটিটি লাভ ক'রতে পারি। আর সেটি লাভ ক'রতে পারলেই আমার স্বামীকেও আমি পেতে পারব।”—এ-প্রস্তাবে বিধবা ও তাঁর কন্যা সম্মত হ'লেন।

তারপর হেলেনা বারট্রামের কাছে মিথ্যা ক'রে এই খবর পাঠালেন যে তাঁর পত্নী চিরছঃখিনী হেলেনা কিছু দিন হোলো প্রাণত্যাগ ক'রেছেন। হেলেনা মনে ক'রেছিলেন যে, এতে তাঁর কাজের অনেক সুবিধা হ'বে; বারট্রাম তাঁকে হেলেনা ব'লে সন্দেহও ক'রবেন না এবং নিজেকে বিবাহবন্ধন থেকে মুক্ত মনে ক'রে তিনি নিশ্চয়ই আজ রাত্রে ডায়েনার জানালার নীচে আসবেন ও প্রকৃত ডায়েনা ভেবে তাঁর (হেলেনার) কাছে বিয়ের প্রস্তাবও ক'রবেন।

সন্ধ্যার অল্প পরেই সেজেগুজে বারট্রাম ডায়েনার জানালার নীচে এসে উপস্থিত হ'লেন। হেলেনা ও প্রস্তুত হ'য়েই ছিলেন; তিনি বারট্রামকে ঘরে নিয়ে এলেন। বারট্রাম হেলেনাকে ডায়েনা ব'লেই মনে

শেক্সপিয়রের গল্প

ক'রলেন এবং তাঁর রূপে, বিনয়ে ও মধুর ব্যবহারে একেবারে মোহিত হ'য়ে প'ড়লেন। হেলেনাকে ত তিনি কত দিনই দেখেছেন, কিন্তু কোন দিনই তিনি তাঁকে তেমন লক্ষ্য ক'রে দেখেন নি বা তাঁর সঙ্গে তেমন মেলামেশা করেন নি। আজ কিন্তু তিনি যতই তাঁকে দেখতে লাগলেন, আর যতই তাঁর সঙ্গে আলাপ ক'রতে লাগলেন, ততই তাঁর প্রতি বেশী ক'রে আকৃষ্ট হ'তে লাগলেন। শেষে বারট্রাম ধর্মসাক্ষী ক'রে প্রতিজ্ঞা ক'রলেন যে, তিনি হেলেনাকে বিয়ে ক'রবেন। তখন চতুরা হেলেনা ভালবাসার চিহ্নরূপ বারট্রামের হাতের আংটিটি চেয়ে নিলেন এবং নিজের হাত থেকে ফ্রান্সের রাজার দেওয়া একটি আংটি খুলে সযত্নে বারট্রামকে পরিয়ে দিলেন। তখন রাত্রি ভোর হ'য়ে আসছে দেখে হেলেনা বারট্রামকে বিদায় দিলেন এবং বারট্রামও প্রিয়তমার কাছে থেকে বিদায় নিয়ে স্বদেশের দিকে যাত্রা ক'রলেন।

হেলেনা যে-সঙ্কল্প ক'রেছিলেন তা' সিদ্ধির পক্ষে ডায়েনা ও তাঁর মার আরও সাহায্য নেওয়া দরকার হবে বুঝে, তিনি তাঁদের তাঁর সঙ্গে প্যারিসে যেতে রাজী ক'রলেন। তাঁরা প্যারিসে পৌঁছে দেখলেন যে, রাজা

সব ভাল যার শেষ ভাল

রোজিলনে বারট্রামের মাতা কাউন্টেসের সঙ্গে দেখা ক'রতে গেছেন। তখন হেলেনাও আর কিছুমাত্র দেবী না ক'রে রোজিলন যাত্রা ক'রলেন।

রাজা তখনও তাঁর জীবনদায়িনী হেলেনার কথা ভুলে যান নি; তাই রোজিলনে পৌঁছে কাউন্টেসের সঙ্গে দেখা হ'তেই তিনি হেলেনার খোঁজ ক'রলেন। কাউন্টেসের কাছে থেকে সকল কথা শুনে এবং হেলেনা আর বেঁচে নেই জেনে, রাজা খুবই দুঃখিত হ'লেন। তিনি তখনই বারট্রামকে ডেকে পাঠালেন। বারট্রাম রাজার সম্মুখে উপস্থিত হ'য়ে হেলেনার প্রতি অণ্যায় ব্যবহারের জন্যে আন্তরিক দুঃখ প্রকাশ করায় তিনি তাঁর মৃত পিতা ও জননী কাউন্টেসের কথা স্মরণ ক'রে তাঁকে ক্ষমা ক'রলেন। কিন্তু হেলেনাকে রাজা যে আংটি উপহার দিয়েছিলেন সেটি বারট্রামের আঙ্গুলে দেখতে পেয়ে, রাজার মুখ গম্ভীর হ'য়ে উঠল'।—তাঁর বেশই স্মরণ হোলো যে, হেলেনা প্রতিজ্ঞা ক'রেছিলেন, যতদিন জীবিত থাকবেন ততদিন কিছুতেই তিনি ঐ আংটি পরিত্যাগ ক'রবেন না—কেবলমাত্র বিশেষ কোন বিপদে পড়ে' সাহায্যের প্রয়োজন হ'লেই তিনি সেটা রাজার কাছে পাঠিয়ে দেবেন। তখন

শেখাপিয়রের গল্প

তিনি কি ক'রে ঐ আংটিটি পেয়েছেন, রাজা বারট্রামকে সেই কথা জিজ্ঞাসা ক'রলেন।—কিন্তু তিনি তার কোন ভাল উত্তর দিতে পাচ্ছেন না দেখে, রাজার মনে সন্দেহ হোলো—তাঁর ভয় হোলো, হয়তো বা বারট্রাম নিজেই তাঁর স্ত্রীকে মেরে ফেলেছেন। তখন রাজা তাঁর রক্ষীদের, বারট্রামকে বন্দী ক'রতে আদেশ ক'রলেন। ঠিক সেই সময়ে ডায়েনার জননী ডায়েনাকে সঙ্গে ক'রে সেখানে এসে উপস্থিত হ'লেন এবং বারট্রাম তাঁর মেয়েকে বিয়ে ক'রবেন ব'লে প্রতিজ্ঞা ক'রেছেন, অথচ আজ পর্যন্তও বিয়ে করেন নি, সুতরাং বারট্রামের প্রতি তাঁর মেয়েকে বিয়ে ক'রবার জন্যে আদেশ হোক—এই মর্মে রাজার কাছে একখানা আবেদন-পত্র উপস্থিত ক'রলেন। রাজা হয়তো তাঁর প্রতি আরও বিরক্ত হবেন, এই ভয়ে বারট্রাম ডায়েনাকে বিয়ে ক'রবেন ব'লে যে প্রতিজ্ঞা ক'রেছিলেন, সে-কথা একেবারেই অস্বীকার ক'রলেন। ডায়েনা তখন, বারট্রাম ডায়েনাত্রমে হেলেনাকে যে-আংটিটি উপহার দিয়েছিলেন, সেই আংটিটি রাজাকে দেখিয়ে বলেন—“মহারাজ, আমাকে বিয়ে ক'রবেন ব'লে প্রতিজ্ঞা ক'রে বারট্রাম এই আংটিটি আমাকে

সব ভাল যার শেষ ভাল

পরিয়ে দিয়েছিলেন, আর আমিও নিজ হাত থেকে একটি আংটি খুলে তাঁকে পরিয়ে দিয়েছিলাম ; ঐ দেখুন, সে-আংটিটি এখনও ঠাণ্ড হাতে আছে।”—এই ব’লে রাজা হেলেনাকে যে-আংটিটি উপহার দিয়েছিলেন, ডায়েনা বারটামের হাতের সেই আংটিটি দেখিয়ে দিলেন। এতে রাজার মনে আরো বেশী সন্দেহ হোলো ; তিনি ডায়েনাকে বন্দী ক’রবার জন্যে রক্ষিগণকে আদেশ ক’রলেন এবং বল্লেন—“তোমরা কি ক’রে এই আংটিটি পেলে তা’ খুলে না বলে তোমাদের ছ’জনেরই প্রাণ-দণ্ড হবে।” ডায়েনা বল্লেন—“মহারাজ, আমি এক জহুরীর কাছে থেকে এই আংটিটি কিনেছিলাম ; আপনার অনুমতি পেলে আমার মা গিয়ে সেই জহুরীকে এখানে নিয়ে আসতে পারেন, আর তা হ’লে আপনিও সমস্ত ঘটনা বুঝতে পারবেন।” রাজার অনুমতি পেয়ে ডায়েনার জননী তখনই হেলেনাকে সেখানে নিয়ে এলেন।

হেলেনাকে দেখে সকলের বিস্ময়ের ও আনন্দের পরিসীমা থাকুল না। তাঁর কাছে রাজা সকল কথাই জানতে পারলেন—আর বারটামও তখন বুঝতে পারলেন যে, তিনি ডায়েনা ভেবে প্রকৃতপক্ষে

শেঙ্গুপিয়রের গল্প

হেলেনাকেই, তাঁর আংটিটি দিয়ে এসেছিলেন। তখন হেলেনাকে পত্নীরূপে গ্রহণ ক'রতে তাঁরও কোন আপত্তি হোলো না, বারট্রামের জননী কাউন্টেসও এতদিন পরে তাঁর পুত্রবধূকে ফিরে পেয়ে পরম সুখী হ'লেন। পিতার ঔষধের গুণেই যে এতদিনে অদৃষ্ট তাঁর প্রতি সুপ্রসন্ন হোলো—আর স্বামীর ভালবাসা পেয়ে, নামে ও কাজে—ছ'রকমেই যে এখন তিনি রোজিলনের কাউন্টেস হ'তে পারলেন, এ ভেবে ও পিতার কথা স্মরণ ক'রে এত সুখেও আজ হেলেনার চোখে জল এল'।

আর ডায়েনা ?—তিনি হেলেনাকে সাহায্য ক'রেছেন ব'লে রাজা তাঁর সভার একজন সম্ভ্রান্ত ব্যক্তির সঙ্গে তাঁর বিয়ে দিয়ে দিলেন। তখন সকলেই সুখ-স্বচ্ছন্দে দিন কাটাতে লাগলেন।

প্রকাশক

শ্রীশিবিরকুমার নিয়োগী, এম-এ, বি-এম,

৩৪, কলেজ ষ্ট্রট, কলিকাতা।

দ্বিতীয় সংস্করণ

বৈশাখ, ১৩৪৩

“শ্রীধর প্রেস”

শ্রীযতীন্দ্রনাথ বসু দ্বারা মুদ্রিত

২৩নং মেছুয়া বাজার ষ্ট্রট,

কলিকাতা।

দাম এক টাকা

বরদা এজেন্সী, ৬৪, কলেজ স্ট্রীট, কলিকাতা

—অধ্যাপক ডক্টর সুকুমাররঞ্জন দাশের—

দেশবন্ধু চিত্তরঞ্জন

দেশবন্ধু চিত্তরঞ্জন দাশ মহাশয়ের জীবন-কথা—ঐহার
বহুমুখী প্রতিভার বিশদ আলোচনা।

বাধাই—সচিত্র। দাম ১।০ দেড় টাকা।

অধ্যাপক ধীরেন্দ্রনাথ মুখোপাধ্যায়, এম-এ, প্রণীত

শ্রী অরবিন্দ

কবীন্দ্র রবীন্দ্রনাথ ঠাকুরকে “অরবিন্দ রবীন্দ্রের লহ
নমস্কার!”—বলিয়া একাধিক বার অভিবাদন করিয়া-
ছেন, সেই ‘দেশ-আত্মার বাণীমূর্তি,’ ‘জাতীয়তার
দার্শনিক,’ ঋষি শ্রী অরবিন্দের পুত্র জীবন-চরিত।

বাধাই—সচিত্র। দাম ১।০ দেড় টাকা।

—শ্রী কেদারনাথ মিত্র, এম-এ, বি-এল, প্রণীত—

মুসলমান ভক্ত-চরিত

প্রসিদ্ধ মুসলমান মহাপুরুষদিগের জীবনী ও উপদেশ।

বাধাই—দাম ১।০ পাঁচ সিকা।

বরদা এজেন্সী, ৬৪, কলেজ ষ্ট্রীট, কলিকাতা

শ্রীশিশিরকুমার নিয়োগী, এম-এ, বি-এস প্রণীত

মহাবীর নেপোলিয়ান

অলৌকিক প্রতিভাশালী, মহামানব, মহাবীর নেপোলিয়ানের অত্যাশ্চর্য্য জীবনী। পূর্ব ও অধুনা প্রকাশিত বহু প্রসিদ্ধ গ্রন্থ হইতে অভিনব তথ্যাদি সংগ্রহ করিয়া রচিত।

সুদৃশ্য বাঁধাই—সচিত্র। দাম ১।।০ দেড় টাকা।

শেক্সপিয়ারের গল্প

Lamb's Tales from Shakespeare অনুসরণে লিখিত মহাকাব্যের পাঁচটি বিখ্যাত নাটকের গল্প। (রাজা লিয়ার, ম্যাকবেথ, শীতের গল্প, রোমিও-জুলিয়েট, সব ভাল বার শেষ ভাল)।

মনোরম বাঁধাই—সচিত্র। দাম ১ এক টাকা।

শেক্সপিয়ারের আরো গল্প

মহাকাব্যের আরো পাঁচটি প্রসিদ্ধ নাটকের গল্প।

সুন্দর বাঁধাই সচিত্র। দাম ১ এক টাকা।

—অধ্যাপক ডক্টর রাধাকমল মুখোপাধ্যায়ের—

মনোময় ভারত

তরুণ ভারত

এক কথায় বই দুইখানাকে বিশ্বসভ্যতায় ভারতের বাণী বলা যাইতে পারে। প্রত্যেকের দাম ১।০ পাঁচ সিকা।

বিশ্বভারত গ্রন্থমালা

সুপ্রসিদ্ধ সাহিত্যিক

শ্রীযুক্ত খগেন্দ্রনাথ মিত্রের

মহাত্মা গান্ধী

মহাত্মাজীর সুসম্পূর্ণ জীবন-কথা। মহাত্মাজীর আত্মজীবনীতে বর্ণিত সকল অবশ্যজ্ঞাতব্য বিষয় ও আধুনিকতম ঘটনাবলী সম্বলিত।

সুন্দর ছাপা, কাগজ, বাঁধাই সচিত্র। দাম ১।০ দেড় টাকা।

বিশ্বভারতীর অধ্যাপক

—প্রভাতকুমার মুখোপাধ্যায়ের—

ভারতে জাতীয় আন্দোলন

জাতীয় আন্দোলনের বিস্তারিত ইতিহাস।

‘প্রবাসী’-সম্পাদক শ্রীযুক্ত রামানন্দ চট্টোপাধ্যায় লিখিত ভূমিকা সম্বলিত।—দাম ২।০ আড়াই টাকা।

ভারত-পরিচয়

বর্তমান ভারতের প্রাকৃতিক, ঐতিহাসিক, সামাজিক, রাজ-নৈতিক ও অর্থ-নৈতিক অবস্থার বিস্তারিত আলোচনা। সমগ্র ভারতবর্ষকে সকল দিক হইতে জানিতে পারিবার মত সকল উপকরণই ইহাতে আছে। ডাঃ প্রমথনাথ বন্দ্যোপাধ্যায়, মহামহো-পাধ্যায় বিধুশেখর শাস্ত্রী, জগদানন্দ রায়, ডাঃ রাধাকমল মুখোপাধ্যায়, শ্রী সুর ষড়নাথ সরকার ও শ্রীযুক্ত রামানন্দ চট্টোপাধ্যায় প্রভৃতি বিশেষজ্ঞগণের সাহায্যে এই পুস্তক রচিত হইয়াছে।

২০০ পৃষ্ঠা—সুন্দর ছাপা ও বাঁধাই—দাম ৫. পাঁচ টাকা।

বরদা এজেন্সী, ৬৪, কলেজ স্ট্রীট, কলিকাতা

—অধ্যাপক ডক্টর ফণীন্দ্রনাথ বসু—

আচার্য জগদীশচন্দ্র

বাংলা-ভাষায় বিশ্ববরেণ্য আচার্য শ্রী ডক্টর
জগদীশচন্দ্র বসু মহাশয়ের একমাত্র বিস্তারিত ও
প্রামাণ্য জীবনচরিত ।

মনোরম ছাপা, কাগজ, বাঁধাই—সচিত্র । দাম ১।০ দেড় টাকা ।

আচার্য প্রফুল্লচন্দ্র

ঋষিকল্প আচার্য শ্রী প্রফুল্লচন্দ্র রায়ের একমাত্র প্রামাণ্য জীবনী ।

সচিত্র—দাম ১।০ পাঁচ সিকা ।

—অধ্যাপক দুর্গামোহন মুখোপাধ্যায়ের—

মহারাজ নন্দকুমার

বাংলার অধঃপতিত যুগের অপ্রতিদ্বন্দ্বী ব্রাহ্মণ-বীর মহারাজ
নন্দকুমারের অভিনব জীবন ও “Judicial murder” কাহিনী ।

দাম ১।০ পাঁচ সিকা ।

সিপাহী যুদ্ধ

সিপাহী যুদ্ধের প্রকৃত ইতিহাস । দাম ১।০ দেড় টাকা ।

খাশি টলষ্টয়

রাশিয়ার জগদ্বিখ্যাত মনীষি ও লেখক মহাত্মা

কার্টলিও টলষ্টয়ের সচিত্র জীবনী ।

দাম ১।০ ; সুদৃশ্য বাঁধাই ৫০ আনা ।

